



**AGINDUA, KULTURA ETA HIZKUNTZA POLITIKAKO
SAILBURUARENA, EUSKADIKO JARDUERA FISIKO ETA KIROLAREN
LEGE-AURREPROIEKTUA EGITEKO PROZEDURARI AURRETIKO
ONARPENA EMATEN DIONA**

Aldaketa egiteko, Xedapen Orokorrak Egiteko Prozedurari buruzko abenduaren 22ko Legearen (8/2003 Legea) II. kapitulura jo behar da, non ezartzen baita xedapen orokorrak egiteko prozedura xedapen horien gaiaren gainean eskumena duen saileko sailburuaren aginduz hasiko dela.

Lege horretako 7.1 artikuluan ezartzen denez, «xedapen orokorren egitasmoak idatzitakoan, prozedura hasteko agindua eman duen organoak aldez aurreko onarpena eman beharko die, dagozkion negoziazio-, entzunaldi- eta kontsulta-izapideak egin aurretik».

Kultura eta Hizkuntza Politikako sailburuaren agindu baten bidez, hasiera eman zitzaion Euskadiko Jarduera Fisiko eta Kirolaren Lege-aurreproiektua egiteko prozedurari.

Aurreproiektuaren testua idatzirik, eta entzunaldia eta kontsulta izapideak hasi aurretik, hasiera emateko aginduak duen helburuaz bat, aldez aurretik onartu behar da.

Hori guztia dela eta, honako hau

EBAZTEN DUT:





Lehenengoa.- Euskadiko Jarduera Fisiko eta Kirolaren Lege-aurreproiektu hau onartzea.

Bigarrena.- Xedapen hori prestatzeko prozeduraren instrukzio-izapideekin aurrera egitea.

Kultura eta Hizkuntza Politikako sailburua

BINGEN ZUPIRIA GOROSTIDI



EUSKADIKO JARDUERA FISIKOAREN ETA KIROLAREN LEGEA

ZIOEN AZALPENA

Euskal Autonomia Erkidegoak, Autonomia Estatutuaren 10.36 artikulua araberak, eskumen eskusiboa du kirol-arloan. Lege hau, lehentasunezko eskumen-titulu horren babesean ez ezik, beste eskumen-titulu batzuen babesean ere egituratu da (hala nola hirigintzari, garraioari, hezkuntzari, kulturari, gizarte-zerbitzuei eta osasunari lotutako eskumen-tituluen babesean). Izan ere, jarduera fisikoaren eta kirolaren sustapena (Lege honen funtsezko helburuetako bat, alegia) zeharkako eginkizuna da, eta botere publikoen hainbat jarduketa-esparru hartzen ditu eraginpean.

Kirol-arloko eskumen horren babesean, Legebiltzar honek otsailaren 19ko 5/1988 Legea (Soin Kulturarena eta Kirolarena) onartu zuen hasiera batean, eta lege horrek lehiaketako kirol federatua zuen ardatz nagusi. Geroago, lege hori ekainaren 11ko 14/1998 Legearekin (Euskadiko Kirolaren Legea) ordeztu zen. Lege horren bidez, erregulazioaren ardatza kirol antolatuz edo lehiaketako kirolaz bestelako kirol-adierazpen batzuetara zabaldu eta jarduera fisikoa eta kirola jolas-izaerarekin sustatu nahi izan zen.



Euskal kirol-sistemako agente publiko eta pribatuek orain arte indarrean zegoen kirolaren esparru juridikoa berrikusteko prozesuan sistema horrekiko gogobetetze-maila handia agertu badute ere, 14/1998 Legea indarrean jarri zenetik bi hamarkada joan direnean bidezko hartu da kirolaren fenomenoak bizi izan dituen eraldaketak islatzeko esparru juridiko berri bat sortzea. Kirolaren egungo errealitatea 1998koaren desberdina da, problematika eta premia berriak ditu, eta horrek legegintza-esparrua eguneratzera bultzatu ditu botere publikoak.

Euskal kirolerako araubide juridiko berri honetan, protagonismo berezia dute jarduera fisikoaren eta kirolaren sustapenak, kirol inklusiboagoa lortzeko helburuak, gobernantza oneko ereduak txertatzeak, desberdintasunen desagerrarazteak, emakumeen kirolaren sustapenak, kirol-erakundeetan organo paritarioak osatzeko betebeharrak, administrazio publikoek obesitateari eta egoneko bizitzari aurre egiteko lanean betetzen duten zeregina argitzeak eta kirol federatuaren egiturak berrantolatu eta arrazionalizatzeak.

Herritarrek osasunari, aisiari edo ongizateari lotutako arazoak direla eta egiten duten jarduera fisikoa hartzen ari den gero eta garrantzi handiagoak, lehiaketako kirol federatuaren indarraren galerari kontrajarrita, agerian utzi du orain arte bi errealitate horiei eskainitako legegintza-arreta asimetrikoa. Jarduera fisikorik ez egitea laugarren heriotza-faktoririk garrantzitsuena da, gizarte-ondorio nabarmenak ditu, eta osasun-kostu handiak dakartza estatuentzat; nolahi ere, Lege hau bat dator Osasunaren Mundu Erakundeak horren aurrean agertutako kezkekin. Gainera, bereziki kezkegarria da egungo haurren egoneko bizitzaren eta obesitatearen maila handia, aisialdian gailu elektronikoak erabiltzeak eragiten duen adikzioak, joan-etorriak egiteko joera berriek, elikadura-ohitura txarrek eta antzeko beste arazoi batzuek bultzatua.

Osasunaren Mundu Erakundearen arabera, jarduera fisiko erregularrak kardiopatiak, istripu baskularrak, diabetesa eta minbizia jasateko arrisku txikiagoa eta osasun mental eta bizi-kalitate hobea dakar. Era berean, ezin da ahaztu jarduera fisiko erregularra lagungarria dela ikasketetan eta lanean errendimendu hobea lortzeko. Hori dela eta, gobernu-maila guztiek paradigma-aldaketa bat egin behar dute, gizarte aktiboagoa sortzeko eta jarduera fisiko erregularrak dakartzan askotariko onurak behar bezala helarazteko.

Euskadin egindako azterlanek agerian utzi dutenez Euskadiko herritarrek egiten duten jarduera fisikoa kuantitatiboki mailarik onenak dituzten herrialdeetan egiten denaren antzekoa bada ere, Lege berri honek urrundu egin behar du autoatseginkeriatik, zuzendu beharreko hutsune batzuk baitaude: gizonen jarduera fisikoaren eta emakumeenaren arteko desberdintasun nabarmena, goimailako ikasketak hastean jarduera fisikoa uzteko joera, lantokietarako edo ikasteko zentroetarako joan-etorri aktiboaren maila txikia eta gizarte-kolektiborik ahulenen kirol-jardunaren maila txikia. Hori guztia dela eta, beste era batean ekin behar zaio kirolaren fenomenoari.



Kirol-sistemako agenteekin (kirol-klubak, kirol-federazioak, udalerriak, foru-aldundiak, prestakuntza-zentroak, profesionalen elkargoak, kirol-zerbitzuetako enpresak eta abar) orain arte indarrean zegoen kirol-arloko esparru juridikoaren balioa egiaztatu denez gero (ez baitu gatazka esanguratsurik sortu aplikazioaldian), Lege hau esparru horretan oinarrituta egituratu da funtsean.

Lehentasunezko lan-ardatzetako bat jarduera fisikoaren eta kirolaren alderdi guztietan berdintasun erreala eta eraginkorra lortzea dela kontuan hartuta, genero-ikuspegia txertatu da zeharka Legean, arlo honetako politika publiko guztietan jarraitu beharreko printzipio gisa.

Legearen I. Titulua Legearen aplikazio-esparruari eta printzipio orokorreki buruzkoa da, eta aurreko testua errespetatzen du funtsean. Sartu diren aldaketen artean, azpimarratu beharra dago lege-testu berriak jarduera fisikoaren eta kirolaren sustapena eta askotariko gizarte-arloetan eskumenak dituzten administrazio publikoek zeharka parte hartu beharra nabarmentzen dituela. Jarduera fisiko eta kirol-jarduera handiagoko euskal gizarte aktiboago bat lortzeko erantzukizuna, kirol-administrazioarena ez ezik, hainbat gobernu-mailarena ere bada.

II. Tituluak jarduera fisikoaren eta kirolaren eskumen-egituraketa lantzen du, aurreko Legearen jarraibideetan oinarrituta. Doikuntza tekniko txiki batzuk baino ez dira egin. Legeak udalerriei eskumen berririk esleitzen ez dienez gero, lege-testu honetan ez da txertatu behar Euskadiko Toki Erakundeei buruzko apirilaren 7ko 2/2017 Legearen 18.3 artikuluan eskatutako eranskina. Legeak jarduera fisikoaren eta kirolaren sustapenaren ardatz nagusitzat hartzen du udalerria berriz, herritarrengandik hurbilen dagoen administrazio publikoa baita, kirol-arloko ekipamendu, gune eta zerbitzu gehienek titularrak, baina ez da ahaztu behar Autonomia Erkidegoko eta foru-aldundietako administrazio publikoekin partekatutako erantzukizuna dela.

Jarduera fisikoaren eta kirolaren administrazio-egituraketari buruzko titulu horretan, Kirolaren Euskal Kontseiluaren eraldaketa azpimarratu beharra dago. Izan ere, Legearen eduki berrietara egokitutako izen berria hartzeaz gain (Jarduera Fisikoaren eta Kirolaren Euskal Kontseilua), organikoki sendotu egiten da Legean, 14/1998 Legean aurreikusitako batzorde independente guztiak biltzen baititu.

III. Titulua Lege honen berritasun nagusietako bat da 14/1998 Legearekin alderatuta, jarduera fisikoa eta kirola sustatzeko neurri multzo bat jasotzen baitu, Legearen izenburuari berari eta helburuei jarraikiz. Lege-testuaren hasieran egoteak (sarrerako eta eskumenei buruzko tituluen ondoren) garbi islatzen du Lege honetan jarduera fisikoaren eta kirolaren sustapenari eman nahi zaion garrantzi handia. Izan ere, Legearen zutabeetako bat da, eta pertsonen bizikaltate hobea lortzeko, gaixotasunei aurrea hartzeko, garapen pertsonalerako eta ongizate indibidual eta kolektiborako egiten duen ekarpen handiari lotuta dago. Legearen helburu handietako bat euskal gizarte aktiboago bat lortzea da.



Lege honek jarduera fisikoaren sustapenaren esparruan biltzen dituen aurreikuspen batzuk ekainaren 26ko 8/1997 Legean (Antolamendu Sanitarioaren Legea) oinarrituta daude. Lege horrek Euskadiko osasun-arloko erakunde-esparrua zaintzeko funtzioa esleitzen dio Autonomia Erkidegoko Administrazio Orokorrari, eta hark esparru hori politika sektorial guztietan kontuan hartzen dela zaintzeko bidezkoak diren neurriak hartuko ditu eta osasun-arloko ekintzak osatuko dituzten diziplina anitzeko ekintza positiboan diseinua bultzatuko du. Hori dela eta, III. Tituluak zeregin erabakigarria esleitzen die osasunaren, hezkuntzaren eta kirolaren arloko administrazioei jarduera fisikoaren eta kirolaren sustapenaren bidez osasunaren babesa batera bermatzeko. Ildo horretan, adibidez, udalerrietan osasun-zentroekin koordinatuta jarduera fisikoaren inguruko orientazio-zerbitzuak progresiboki ezartzeko aukera finantzatuko da.

IV. Tituluak ere berritasunak dakartza, xedapen ugari biltzen baititu jarduera fisikoan eta kirolean gobernantza egokia bermatzeko eta kirol-erakundeek eta Euskadin antolatzen diren jarduerak gardentasunaren, kudeaketaren eraginkortasun eta efizientziaren, parte-hartze demokratikoaren, berdintasun eraginkorraren, gizarte-inklusioaren eta abarren printzipioei jarrai diezaieten sustatzeko. Ikuspuntu sistematikotik, titulu hau ere Legearen lehen zatian kokatu da, bi arrazoi nagusirengatik: bere zeharkako izaera eta euskal kirol-sistemara gobernantza onaren estandarrak eramateko apustu garbia. Herrialde bateko kirol-sistemaren maila, kirol-emaizten arabera ez ezik, gobernantza onaren kalitatearen arabera ere neurtu behar da. Jarduera fisikoak eta kirolak, gaitasun atletikoen eta lehiaketetan lortutako emaitzen dimentsioaz gain, Lege honek alde batera utzi nahi ez duen gizarte- eta hezkuntza-dimentsio bat ere badute.

Kirolari lotutako gobernantza onaren esparruan, herritarrek kirolaren esparruan bi hizkuntza ofizialetako edozein erabiltzeko duten eskubidea eta kirolarien eta gainerako parte-hartzaileen hizkuntza-eskubideak bermatu nahi dira Lege honen bidez, kirol-jarduera ofizialaren esparruan bereziki, botere publikoen erantzukizuna baita herritarrek euskara erabiltzeko duten eskubidea bermatzea eta gure hizkuntzaren ezagutza eta erabilera babestea eta bultzatzea, euskararen erabilera normalizatzeko azaroaren 24ko 10/1982 Legeak ezartzen duenari jarraikiz.

V. Tituluak euskal kirolaren elkarte-egituraren segmentuak arautzen ditu, eta Lisboako Itunean aitortutako kirolaren izaera espezifikoa du abiapuntu. Legearen berritasun nagusia federazio-sistemaren funtsezko berrantolaketa da. Aurreko Legearen zioen azalpenean, berariaz onartzen zen federazio-egitura berregituratzeko beharra (dimentsio desegokia baitzuen), eta, Legearen bidez, irtenbide bat eman nahi izan zitzaion federazioen atomizazioari. Izan ere, kirol-federazio gehiegi daude, eta batzuen ezarpena ia hutsala bada ere, dituzten kostuak onartezinak dira altxor publikorako. Hori dela eta, 14/1998 Legean kirol-federazioak sortzeko baldintza berriak ezarri ziren, eta kirol-federazio gisa



jarraitzeko dimentsio egokirik ez zuten kirol-federazioei emandako aitortpena errebokatze mekanismo batez hornitu ziren babes-administrazio publikoak.

Bi hamarkada hauetako esperientziak agerian utzi duenez, ordea, neurri horiek ez dute emaitza onik eman, eta, gainera, gatazka ugari sortu dira lurralde-federazioen eta euskal federazioen artean, hauteskunde-alderdiak, eskumen-alderdiak eta alderdi ekonomikoak direla eta. Hori guztia dela eta, Legeak arrazionalizatu eta berrantolatu egin du federazio-egitura. Horrek abantaila ugari ekar ditzake. Adibidez, sortutako egungo gatazka asko saihesten lagun dezake, giza baliabideak eta baliabide materialak optimizatuko dira, eta federazioak erakunde sendoagoak izango dira eta erronka berriak beren gain hartzeko ahalmen handiagoa izango dute.

Esparru juridiko berriarekin, federazioen hauteskunde-sistema ere nabarmen sinplifikatuko da. Orain arte, euskal federazioen hauteskunde-prozesuak lurralde-federazioen hauteskunde-prozesuetan oinarriuta egiten ziren, eta federazio horien gatazkek hauteskunde-sistema baldintzatzen zuten, euskal federazioen batzar nagusiak lurralde-federazioen batzar nagusietan oinarrituta osatzen baitziren. Gainera, Lege berriarekin, kirol-federazioen batzar nagusiak kirol-erakundeetako ordezkariak baino ez dituzte osatuko, errealitateak agerian utzi baitu kirol-federazioek bigarren mailako elkarte gisa (kirol-erakundeen elkarte gisa) dihardutela. Horrela, beraz, Lege berriarekin, kirol-klubak eta kirol-elkarteak kirol federatuaren erabakigune bihurtuko dira. Horren truk, pertsona fisikoen estamentuen presentzia areagotu egingo da kirol-federazioen administrazio-organoetan.

Kirol-federazioen administrazio-funtzio publikoei dagokienez, despublikazio partziala egin da, eta izaera publikoa kendu zaie lehiaketa ofizialen antolaketari, euskal kirolaren ordezkartzaren antolamenduari eta programak gauzatzeko beharrezkoa den administrazioarekiko lankidetzari.

Era berean, ezin da alde batera utzi Lege berriak desgaitasuna edo dibertsitate funtzionala duten pertsonen eskaintzen dien arreta. Pertsona horiek talde kaltebera eta ugaria osatzen dute, eta kirol-sistemak, egindako aurrerapen ukalezina gorabehera, ez die erabateko inklusioa erraztu. Legearen bidez, kirol inklusioa lortzeko eta jarduera fisikoaren eta kirolaren esparruan kolektibo horren oinarriko eskubideen errespetua bermatzeko oztopoak desagerrarazi nahi dira.

VI. Titulua kirol-lehiaketei eta lizentziei buruzkoa da, eta ez du eraldaketa handirik izan. Nolanahi ere, azterketa medikoen nahitaezotasuna ñabartu da. Legearen arabera, Eusko Jaurlaritza berriaz gaituko da beharrezkotzat hartzen den kasuetan nahitaezotasun hori erregelamenduz ezartzeko, baina nahitaezotasun hori lizentzia mota oro emateko orokortzea saihesten da. Era berean, ezin da ahaztu Legeak kirol-ekitaldien leihatila bakarra sortzeko oinarriak



ezartzen dituela. Leihatila hori kirol-ekitaldien antolatzaileen komunikazio, adierazpen, baimen eta lizentzia guztien inguruko informaziogunea eta izapidetze elektronikoko integraleko gunea izango da, eta kirol-ekitaldien antolaketa erraztea eta jarduera horiek garatzeko ingurune lagungarriago eta gardenago bat sortzea du helburu.

VII. Tituluak hainbat eduki ditu. Lehenik eta behin, eskola-adineko jarduera fisikoa eta kirola lantzen du, eta berritasun esanguratsu bat dakar. Aurreko Legean, kirolaren segmentu horrek nahitaezko eskolatzealdian zeuden ikasleak (hau da, 6-16 urtekoak) biltzen zituen. Orain, berriz, 0-6 urtekoak ere sartuko dira, eta babes berezia eskainiko zaie osasunaren esparruan, erakunde publiko eskudunen eta esparru horri lotutako agenteen arteko adostasunaren ondorioz. Testu artikulatu berriak, halaber, bereziki azpimarratzen ditu hezkuntza-alderdiak. Kirolean agertzen den indarkeriaren, arrazakeriaren, xenofobiaren edo intolerantziaren aurkako borroka ez da zehapen-arauen zeregin eskusiboa. Aitzitik, portaera horiek kirol-sistemaren oinarritik hasita desagerrarazi behar dira, eta beharrezkoak diren errespetua, tolerantzia eta joko garbia helarazi behar dira hastapen-adin horietan egiten den kirolean.

14/1998 Legean bezala, arreta berezia eskaintzen zaio unibertsitate-esparruan egiten den jarduera fisikoari eta kirolari, unibertsitateen autonomia errespetatuta. Berritasun nagusia Legearen titulu horretan lanbide-heziketako zentroak sartu izana da. Hezkuntza-sektore hori ez zen kontuan hartzen aurreko lege-testuan.

VIII. Titulua kirol-teknikarien prestakuntzari, ikerketari eta berrikuntzari buruzkoa da. Orain arte indarrean zegoen Legearekin alderatuta, titulazioen eskakizuna desagertu egin da, eta arlo hori kirol-lanbideak izateko eta horietan jarduteko aukera arautzen duen Lege berriak arautuko du. Tituluak Jarduera Fisikoaren eta Kirolaren Euskal Eskolaren zeregina berregiten du berriz, eta sail arteko lidergoa esleitzen dio kirol-taldeko koordinazioan.

IX. Tituluak kirolarien laguntza eta babesa arautzen ditu, eta goi-mailako kirola arautzen duen Titulutik bereizi da. Berritasunik esanguratsuen zera da, Lege honetatik aurrera Euskal Autonomia Erkidegoko herritarren kirol-jardunari lotutako osasun-laguntza osasun-sistema publikoak emango duela, bere kontura. Estatuko eta nazioarteko kirol-lehiaketetako parte-hartzeari lotutako osasun-laguntza baino ez da salbuetsita egongo.

Goi-mailako kirola X. Tituluan lantzen da. Erregulazioaren oinarria orain arte indarrean zegoen araudia da. Alde batetik, gobernu-istantzia guztien eskumenak argitzen dira titulu horretan, eta Eusko Jaurlaritzari ematen zaio protagnismorik handiena. Legeak berriaz aitortzen du Basque Team Fundazioak betetzen duen zeregina (erakunde horrek laguntza ematen du eta goi-mailako kirolaren programa batzuk kudeatzen ditu).



Bestetik, ahalik eta arau-mailarik handiena eman nahi izan zaio emakume kirolariek haurdunaldian eta ama izatean behar duten babesari, eta ondorio negatiboak galarazi nahi izan dira, hala nola laguntzen eta dirulaguntzen galera lehiatu ez izanaren aitzakiarekin. Horretarako, kirolariek goi-mailako kirolari gisa dituzten eskubideak gordeko dituzte haurdunaldia igaro eta ama izan ondoren.

Legeak, XI. Tituluaren bidez, kirol-arloko ekipamenduen eta zerbitzuen esparrua lantzen du. Gaur egun beharrezkotzat hartzen ez diren aurreikuspen batzuk kendu egin dira (kirol-ekipamenduen eraikuntza-baldintzei lotutako alderdietan bereziki), beste arau-tresna batzuetan araututa baitaude. Halaber, ikuspegi berriak txertatu dira ekipamendu horien plangintzan.

XII. Tituluak, indarkeriaren fenomenoaren prebentzioari dagokionez, jarduera fisikoari eta kirolari lotutako beste alderdi batzuk gaineratzen dizkio aurreko legegintza-tratamenduari, hala nola arrazakeria, xenofobia eta intolerantzia. Prebentzioari buruzko titulu hori fenomeno horiek kirol-arloko diziplina-ikuspegitik eta administrazio-arloko zehapen-ikuspegitik lantzen dituzten Legearen tituluekin osatzen da.

Lege berri honen XIII. Titulua kirol-arloko diziplina-araubideari buruzkoa da. Azpimarratu beharreko berritasunen artean, honako hauek ditugu: arau-hauste berrien tipifikazioa, ohiko eta ezohiko prozeduren argitzea, arau-hausteen egilea zehazteko zereginaren hobekuntza, eta diziplina-erantzukizuna aldatzen duten zirkunstantzien araubidea (erantzukizun hori erantzukizun ia objektibo gisa konfiguratzen da, doloaren edo erruaren iuris tantum presuntzioarekin). Arau-hausteen tipifikazioari dagokionez, nabarmendu beharra dago indarkeriari, arrazakeriari, xenofobiari eta intolerantziari lotutako arau-hauste berri batzuk txertatu direla eta kirol-arloko ustelkeriari, partidetan egindako iruzurrei, apustuei eta abarri lotutako arau-haustek tipifikatu direla.

XIV. Tituluan jasota dagoen administrazio-arloko zehapen-araubideari dagokionez, kirol-arloko diziplina-araubidean sartutakoen antzeko doikuntzak egin dira arau-hausteen tipifikazioaren arloan. Halaber, zehatzeko administrazio-ahala une bakoitzean zer administrazio publikok baliatu behar duen argitu nahi izan da. Bestalde, kirol-ikuskapenaren araubidea ere argitu da.

Kirol-arloko justiziari buruzko XV. Tituluari dagokionez, azpimarratu beharra dago kirol-gatazka batzuen administrazio-izaera eta izaera pribatua bereizteko egin den ahalegina, aurkaratze jurisdikzionalako araubide desberdina argitu ahal izan dadin. Bestalde, Kirol Justiziako Euskal Batzordea osatzeko baldintzak eta funtzionamendu-araubidea sinplifikatu egin dira.

Xedapen gehigarriek, iragankorrek, indargabetzaileek eta azkenek Legearen eraginkortasun egokirako beharrezkoak diren hainbat aurreikuspen biltzen dituzte.



I. TITULUA

XEDAPEN OROKORRAK

1. artikulua.- Xedea eta aplikazio-esparrua.

1.- Lege honen xedea da Euskal Autonomia Erkidegoan jarduera fisikoa eta kirola arautzea eta sustatzea.

2.- Lege honen ondorioetarako, parte-hartze antolatu baten edo beste mota bateko parte-hartzearen bidez egoera fisiko eta psikikoa adieraztea edo hobetzea, gizarte-harremanak garatzea eta maila guztietako lehiaketetan emaitzak lortzea helburu duen jarduera fisiko oro hartuko da kiroltzat.

3.- Lege honen ondorioetarako, muskulu eskeletikoek egiten duten eta energia-gastua dakarren gorputz-mugimendu oro hartzen da jarduera fisikotzat.

4.- Lege honen esparrutik kanpo geratzen da *e-sport* izeneko (joko elektronikoen) eta antzeko edozein jardueraren erregulazioa; nolana ere, jarduera horiek beste arau batean erregulatu ahal izango dira, erakunde antolatzaileen, erakunde horietan parte hartzen duten pertsona fisiko eta juridikoen eta hirugarrenen eskubide eta interes legitimoak behar bezala babestu ahal izan daitezen.

2. artikulua.- Printzipio gidariak.

1.- Jarduera fisikoa eta kirola interes publikoko gizarte-jarduerak dira, eta pertsonen prestakuntzan eta garapen integralean, pertsonen osasunaren eta bizi-kalitatearen mantentzean edo hobekuntzan eta ongizate indibidual eta sozialean laguntzen dute.

2.- Pertsona guztiek jarduera fisikoa eta kirola askatasun osoz eta borondatez egiteko duten eskubidea eta botere publikoek eskubide horren eraginkortasunerako baliabide egokiak ezartzeko eskubidea aitortzen dira.

3.- Euskal botereek, beren eskumenen esparruan, jarduera fisikoa eta kirola egiteko eskubidearen eraginkortasunera zuzendutako politika bat ezarriko dute, honako printzipio gidari hauei jarraikiz:

a) Jarduera fisikoaren eta kirolaren presentzia hezkuntza-sisteman eta lan- eta familia-esparruan, bizi-ohitura osasungarriak sustatuz eta egoneko bizitzaren eta obesitatearen aurka jardunez.



- b) Jarduera fisikoa eta kirola gizarte-sektore guztietara (eta, bereziki, egoerarik ahulenean daudenetara) zabaltzeko programa bereziak onartzea eta gauzatzea.
- c) Pertsona guztiek jarduera fisikoa eta kirola berdintasun-baldintzetan eta ekitatez egitea eragozten duten oztopo guztiak kentzea.
- d) Jarduera fisikoa eta kirola desgaitasun motaren bat duten herritarrengan sustatzea.
- e) Emakumeak kirol-jardunean erabat, maila guztietan eta diskriminaziorik gabe integratzea erraztuko duten baldintzak sustatzea.
- f) Jarduera fisikoa eta kirola astialdirako aukera eta osasun-ohitura gisa sustatzea eta horretan laguntzen duten ekintzak babestea.
- g) Goi-mailako ikasketak egiten hastean edo lan-merkatuan sartzean kirol-jarduna uzteko joerari aurre egiteko programak bultzatzea.
- h) Lehiaketako kirola antolatzea eta sustatzea.
- i) Jarduera fisikoaren eta kirolaren alorrean ikerketa zientifikoa eta berrikuntza bultzatzea, haren kalitatea hobetzeko helburuarekin eta modernizatzeko, ezagutza helarazteko eta euskal kirol-sistema hobetzeko tresna gisa.
- j) Jarduera fisikoa eta kirola bultzatzea, lurraldea egituratzen laguntzen duten elementutzat hartuta.
- k) Jarduera fisikoa eta kirola Euskadiko garapen ekonomiko eta sozialaren eragile gisa bultzatzea.
- l) Kirola hainbat balio (hala nola hobekuntza pertsonala, talde-lana, elkartasuna, laguntasuna, joko garbia, tolerantzia, ekitatea eta berdintasuna) sustatzen lagun dezakeen baliabidetzat hartzea.
- m) Kirol-teknikarien prestakuntza antolatu eta bultzatzea, ikastetxe publiko eta pribatuen eta kirol-federazioen parte-hartzearekin.
- n) Kirolarientzako arreta mediko espezializatuko sistema bat antolatu eta bultzatzea.
- o) Kirol-instalazioen segurtasun eta higienezaren arloko prebentzio-eta kontrol-sistema bat antolatu eta bultzatzea, eta desgaitasuna duten pertsonen erraz iristeko aukera bermatzea.
- p) Kirolariak helburu politikoekin, ekonomikoekin edo beste mota batzuetakoekin egindako abusuzko esplotazio guztietatik babesteko beharrezkoak diren neurriak hartzea.
- q) Jarduera fisikoan eta kirolean indarkeria, arrazakeria, xenofobia eta intolerantzia desagerrarazteko bidezkoak diren neurriak hartzea.
- r) Kirol-asoziazionismoa antolatzea eta sustatzea, eta kirolaren antolamendu-egitura pribatuak onartzea eta babestea.
- s) Kirol-arloko boluntarioak babestea eta laguntzea.
- t) Kirolaren antolamendu-egitura pribatuen profesionalizazioa bultzatzea.
- u) Goi-mailako kirola antolatzea eta sustatzea, kirol-federazioen parte-hartzearekin.
- v) Kirol-ekitaldietan parte hartzen dutenei arriskuen estaldura egokia bermatuko dieten neurriak hartzea.



- w) Administrazio publikoen arteko eta haien eta kirol-federazioen eta/edo beste edozein kirol-erakunderen arteko lankidetzaren arduratsua kirol-arloan.
- x) Natura-ingurunea jarduera fisikorako eta kirolerako behar bezala balia dadin sustatzea, eta ingurumenaren babesarekin bateragarri egitea.
- y) Animaliek parte hartzen duten kirol-jardueretan, animalien osasuna eta ongizatea babestea.
- z) Kirol-instalazioen sare egoki bat planifikatu eta sustatzea.
- aa) Oinarrizko lehiaketako kirola antolatzea eta sustatzea (ikasleena bereziki), euskal kirolaren maila guztiak garatzeko eragile gisa.
- bb) Lehiaketako euskal kirola Estatuan eta nazioartean babestea.
- cc) Bertako kirol-modalitateak babestea, sustatzea eta kirol-ondare gisa aitortzea.
- dd) Jarduera fisikoa eta kirola euskararen erabilera sustatzeko tresna gisa baliatzea.
- ee) Kirola kultura osatzen duen elementu gisa eta gizarte-kohesiorako elementu gisa aitortzea.
- ff) Ideia olinpikoak eta paralinpikoak aitortzea eta babestea.
- gg) Jarduera fisikoan eta kirolean dopina eta pertsonaren osasunaren eta duintasunaren kontrako eta integritatearen kontrako beste edozein jardunbide desagerrarazteko neurriak hartzea.
- hh) Jarduera fisikoaren eta kirolaren babes pribatua (eta emakumeen kirolaren babesa bereziki) jarduketa publikoaren osagarri gisa sustatzeko neurriak hartzea.
- ii) Unibertsitateetan eta lanbide-heziketako zentroetan jarduera fisikoa eta kirola antolatzea eta sustatzea.
- jj) Espetxeetako presoek jarduera fisikoa eta kirola egiteko programak sustatzea, haien gizarteratzea lortzeko.

II. TITULUA

ADMINISTRAZIO-ANTOLAMENDUA

3. artikulua.- Erakunde komunak.

1.- Euskal Autonomia Erkidegoko erakunde komunek Autonomia Estatutuari jarraikiz Euskal Autonomia Erkidegoari dagozkion eta Lege honetan edo ordenamendu juridikoaren gainerakoan lurralde historikoetako foru-organoei, udalerriei eta gainerako toki-erakundeei esleitzen ez zaizkien eskumen guztiak baliatzen dituzte jarduera fisikoaren eta kirolaren arloan.

2.– Bereziki, honako eskumen hauek baliatzen dituzte Autonomia Erkidegoko erakunde komunek:



- a) Euskal Autonomia Erkidegoko Kirol Erakundeen Erregistroa arautzea eta kudeatzea.
- b) Kirol-arloko diziplina-araubidea arautzea.
- c) Goi-mailako kirola antolatzea eta babestea.
- d) Euskadiko kirol-federazioak onartzea, haiei laguntzea, finantzatzea, ikuskatzea eta kontrolatzea (beren funtzio publikoak betetzen dituztela bermatzeko), beren jarduera pribatua kaltetu gabe.
- e) Gaitasun-azterketa medikoak arautzea.
- f) Jarduera Fisikoaren eta Kirolaren Euskal Kontseilua arautzea eta antolatzea.
- g) Kirol Justiziako Euskal Batzordea arautzea eta antolatzea.
- h) Kirol-federazioen, kirol-kluben eta gainerako kirol-erakundeen araubidea arautzea.
- i) Kirol-kluben onura publikoaren deklarazioak arautzea.
- j) Kirol-lizentzien araubidea arautzea.
- k) Eskola-kirolaren oinarriak eta printzipio orokorrak, haien kirol-arloko diziplina-araubidea eta lehiaketak arautzea.
- l) Administrazio publikoek kirol-ekipamenduen erroldak egiteko irizpide uniformeak onartzea.
- m) Kirol-erakundeen zuzendaritzako kideentzako estatutu bat onartzea.
- n) Autonomia Erkidegoko kirol-ekipamenduen errolda onartzea eta eguneratzea.
- o) Ingurune naturalean egiten diren kirol-jarduera arriskutsuen antolaketa arautzea.
- p) Indarkeriaren prebentzioa, kontrola eta errepresioa arautzea.
- q) Kirol-modalitate eta kirol-azpimodalitate berriak aitortzeko irizpideak eta baldintzak onartzea.
- r) Jarduera bat kirol-modalitate edo kirol-azpimodalitate gisa kalifikatzea.
- s) Kirolariaren osasun-txartela arautzea.
- t) Unibertsitate arteko kirol-jarduerak antolatu eta koordinatzea.
- u) Kirol-ekitaldien antolaketa arautzea.
- v) Jarduera fisikoa sustatzeko politika publikoak arautzea eta, hala badagokio, gauzatzea.
- w) Autonomia Estatuaren arabera Autonomia Erkidegoari dagozkion eta legeetan lurralde historikoetako foru-organoei aitortzen ez zaizkien kirol-arloetan legeak egitea eta gauzatzea.

4. artikulua.- Lurralde historikoetako foru-organok.

Lurralde historikoetako foru-organok honako eskumen hauek baliatuko dituzte beren lurralde-esparruan:



- a) Eskola-adineko jarduera fisikoaren eta kirolaren arloko Autonomia Erkidegoko araudia garatzea eta udal-administrazioarekin koordinatuta gauzatzea.
- b) Pertsona guztien jarduera fisikoa eta kirola sustatzeko kirol-politika onartzea eta erakunde komunekin eta udal-administrazioarekin koordinatuta gauzatzea.
- c) Kirol-ekipamenduen lurralde-plan sektorialak onartzea.
- d) Dagokion lurralde historikoko kirol-ekipamenduen errolda onartzea eta eguneratzea.
- e) Kirol-ekipamenduen eraikuntza, zabalkuntza eta erreforma finantzatzeko planak onartzea eta gauzatzea.
- f) Goi-mailako kirolera iristeko aukerak dituzten etorkizun handiko kirolariei laguntza teknikoa eta ekonomikoa ematea.
- g) Lurraldean helbideratutako kirol-klubei eta gainerako kirol-elkarteei laguntza teknikoa eta ekonomikoa ematea, eta, horretarako, bidezkoak diren dirulaguntzak ematea eta jarduera dirulaguntzaren helburuarekin bat datorrela kontrolatzea.
- h) Lurraldeko kirol-federazioak onartzea, haiei laguntzea, finantzatzea eta kontrolatzea (beren funtzio publikoak betetzen dituztela bermatzeko), beren jarduera pribatua kaltetu gabe.
- i) Udaleko kirol-zerbitzuak koordinatzea, zerbitzu horiei laguntzea eta zerbitzu horien kudeaketa mankomunatua bultzatzea.
- j) Lege honen eta garatzen duten arauen indarrez dagozkien gainerako eskumenak eta egitekoak baliatzea, baita azaroaren 25eko 27/1983 Legearen (Autonomia Erkidegoko Erakunde Komunak eta Lurralde Historikoetako Foru Organoen arteko Harremanei buruzko Legea) 12. artikuluan zehaztutakoaren arabera eskualdatu edo eskuordetu daitezkeenak ere.

5. artikulua.- Udalerriak.

Udalerriek honako eskumen hauek baliatuko dituzte beren lurralde-esparruan:

- a) Eskola-adinean jarduera fisikoa eta kirola egiteko programa propioak diseinatu eta gauzatzea, eta lurralde historikoetako foru-organoek onartutako eta finantzatutako programak gauzatzea, lurralde historikoekin koordinatuta.
- b) Udaleko kirol-ekipamenduak eraiki, zabaldu eta hobetzea, baita kudeatzea eta mantentzea ere.
- c) Pertsona guztien jarduera fisikoa eta kirola sustatzeko programa propioak diseinatu eta gauzatzea, eta lurralde historikoetako foru-organoek onartutako eta finantzatutako programak gauzatzea.
- d) Udalerriko kirol-ekipamenduen errolda onartzea eta eguneratzea.
- e) Lege honen, gainerako lege-xedapenen eta legea garatzen duten arauen indarrez esleituta dituzten eskumen eta funtzio guztiak eta apirilaren 7ko 2/2016 Legearen (Euskadiko Toki Erakundeei buruzko Legea) III.



Tituluan ezarritakoari jarraikiz beren gain har ditzaketan edo eskuordetu daitezkeen eskumen eta funtzio guztiak baliatzea.

6. artikulua.- Jarduera Fisikoaren eta Kirolaren Euskal Kontseilua.

1.- Jarduera Fisikoaren eta Kirolaren Euskal Kontseilua Euskal Autonomia Erkidegoko kirol-politikari lotutako gaietan administrazio publikoei aholkularitza emateko, kontsulta eta jarraipena egiteko eta eztabaida sektoriala egiteko organo goren da, eta kirol-arloan eskumena duen Autonomia Erkidegoko Administrazio Orokorreko Sailari atxikita dago.

2.- Autonomia Erkidegoko Administrazio Orokorreko, Euskadiko foru- eta udal-administrazioetako eta euskal kirol-federazioetako ordezkariak osatuko dute Jarduera Fisikoaren eta Kirolaren Euskal Kontseilua. Halaber, jarduera fisikoaren eta kirolaren esparruan ospe handia duten pertsonak osatuko dute Kontseilua. Pertsona horiek esparru horretan eskumena duen Autonomia Erkidegoko Administrazio Orokorreko Sailaren titularrak izendatuko ditu.

3.- Jarduera Fisikoaren eta Kirolaren Euskal Kontseiluaren osaera, izendapen-sistema, funtzionamendu-araubidea eta funtzioak erregelamenduz ezarriko dira. Nolanahi ere, nahitaezkoa izango da Kontseiluak kirolari lotutako xedapen orokorren proiektuetan esku hartzea.

4.- Jarduera Fisikoaren eta Kirolaren Euskal Kontseiluaren barruan, Lege honetan aurreikusitako azpibatzordeak eta Osoko Bilkurak erabakitzen dituen guztiak eratuko dira. Halaber, arlo berak eraginpean hartutako administrazio publikoen jarduketan koordinazioa bermatzeko erakunde arteko koordinazio-mahai bat eratu da, emaitza komun bat eraginkortasunez eta efizientziaz, hutsunerik eta bikoiztasunik gabe lortzeko helburuarekin.

7. artikulua.- Jarduera Fisikoaren Euskal Agentzia

1.- Jarduera Fisikoaren Euskal Agentzia sortzen da, eta honako hauez arduratuko den erakundea izango da:

- a) Autonomia Erkidegoko Administrazio Orokorren barruan, jarduera fisikoa sustatzeko politikak planifikatzea eta koordinatzea.
- b) Euskadin jarduera fisikoa sustatzeko plan publikoak koordinatzea eta bultzatzea, tokiko autonomia erabat errespetatuz.
- c) Euskadiko jarduera fisikoaren eta kirolaren egoeraren eta bilakaeraren ikuspegi orokor eta etengabe bat ematea.
- d) Euskal Autonomia Erkidegoko kirol-zerbitzu publikoak erabiltzeko kirol-txartel bakarraren sorkuntza eta abiaraztea bultzatzea.
- e) Joerak aurreikustea eta herritarren jarduera fisikoaren eta kirolaren jardun handiagoa eta hobea sustatzera bideratutako neurriak proposatzea.



- f) Euskal Autonomia Erkidegoko aurrekontu orokorretan jarduera fisikoa sustatzeko baliabide ekonomikoak eta materialak kudeatzea.
- g) Jasotzen dituen funts publiko eta pribatuen beste edozein transferentzia kudeatzea. Euskadiko beste administrazio publiko batek Eusko Jaurlaritzarekin jarduera fisikoa sustatzeko baliabide ekonomiko batzuen transferentzia erregularra adosten badu, ekarpen hori agentziak kudeatuko du, hitzarmen bidez adierazten diren baldintzen arabera.
- h) Autonomia Erkidegoko Administrazio Orokorreko sailak eta erakundeak jarduera fisikoa sustatzeko politikaren plangintzan aholkatzea.
- i) Jarduera fisikoa sustatzeko politika publikoaren, politika horrek duen eraginaren eta politika horri lotutako ekintzen eta tresnen urteko ebaluazioak egitea.
- j) Autonomia Erkidegoko Administrazio Orokorreko sailek jarduera fisikoa sustatzeko egindako jardueren koherentzia bermatzea, Lege honetan adierazitako printzipioen eta helburuen esparruan.
- k) Autonomia Erkidegoko biztanleriaren jarduera fisikoaren maila eta jarduera fisikoaren garapena baldintzatzen duten elementuen bilakaera ebaluatzea.
- l) Euskal Autonomia Erkidegoko Administrazio Orokorra ordezkatzeko jarduera fisikoaren sustapenari lotutako kanpoko proiektuetan.
- m) Autonomia Erkidegoko Administrazio Orokorreko beste sail batzuei eta Euskadiko beste administrazio publiko batzuei babes eta laguntza eskaintzea jarduera fisikoaren sustapenari lotutako ekimenak garatzeko.
- n) Gizarte-eragileekiko elkarriketari eustea.
- o) Jarduera fisikoaren esparruan sentsibilizatzea eta heztera zuzendutako jarduketak bultzatzea eta gauzatzea.
- p) Agentziaren helburuak lortzen lagunduko duten ekimen publikoak edo pribatuak babestea eta sustatzea.
- q) Indarrean dauden xedapenek esleitzen dizkioten gainerakoak.

2.- Jarduera Fisikoaren Euskal Agentzia zuzenbide pribatuko entitate publiko bat da, nortasun juridiko propioa eta bere helburuak betetzeko helburuarekin jarduteko ahalmena du, eta kirol-arloan eskumena duen Autonomia Erkidegoko Administrazio Orokorreko sailari atxikita dago.

3.- Jarduera Fisikoaren Euskal Agentziak Lege honi, bere antolamendu- eta funtzionamendu-erregelamenduari eta haiek garatzen dituzten xedapenei jarraituko die. Bere eginkizunak baliatzean, zuzenbide pribatuari jarraituko dio funtsean, baina zuzeneko esleipen edo eskuordetze bidez administrazio-ahalak baliatzen dituenean, zuzenbide publikoari helduko dio. Euskal Autonomia Erkidegoko Ogasun Nagusiaren berezko arloei dagokienez, berriz, arlo horien inguruan berariaz aplikatu beharreko xedapenei jarraituko die, eta haiekiko kontraesanik ez dakarren neurrian, zuzenbide pribatuari.

4.- Bere funtzioak betetzeko, eta betiere kasu bakoitzean aplikatu beharreko araudiaren barruan, Agentziak honako hauek egin ahal izango ditu:



a) Jarduera fisikoa sustatzeko programak, proiektuak eta gainerako ekimenak egiteko laguntzen eta dirulaguntzen deialdiak kudeatu. Agentziaren dirulaguntza-jarduerak, Agentziaren izaera juridikoarekin bateragarria den orotan, Euskadiko Ogasun Nagusiaren Antolarauei buruzko Legearen testu bateginean jasotako dirulaguntzei buruzko araudi erregulatzailan xedatutakoari jarraituko dio.

b) Beste administrazio publiko batzuetatik eta edozein pertsona eta erakunde publikotatik laguntzak eta dirulaguntzak lortu, baita dohaintza pribatuak ere.

c) Bere helburuak lortzeko beharrezkoak diren administrazio- eta xedapen-egintzak eta eragiketa ekonomiko eta finantzarioak egin.

d) Bere funtzioak betetzeko beharrezkoak diren hitzarmenak eta kontratuak egin, kasu bakoitzean aplikagarria den araudiari jarraikiz.

5.- Agentziaren gobernu-organoak Lehendakaritza, Artezkaritza Kontseilua eta Zuzendaritza dira.

6.- Artezkaritza Kontseilua osatuko dutenak honako hauek dira:

a) Lehendakaritza; Agentziako lehendakariari edo, haren ordeztan, lehendakariordeari dagokio.

b) Bost bokal, Autonomia Erkidegoko Administrazio Orokorreko sailak eta erakundeak ordezkatzuz; Agentziaren antolamendu- eta funtzionamendu-erregelamenduak ezarriko ditu.

c) Idazkaritza; Agentziako zuzendariari dagokio, eta Artezkaritza Kontseiluko eskubide osoko kidea izango da.

8. artikulua.- Basque Team Fundazioa.

Basque Team Fundazioa Joko Olinpikoetan eta Joko Paralinpikoetan Euskadiko kirolarien, kirol-teknikarien eta kirol-epaileen prestaketa, parte-hartzea eta ordezkaritza sustatzeaz eta goi-mailako kirola sustatzeaz arduratuko den euskal sektore publikoko erakundea izango da, beste erakunde batzuek esku hartzeko aukera galarazi gabe.

III. TITULUA

JARDUERA FISIKOAREN SUSTAPENA

9. artikulua.- Helburuak.



Administrazio publikoek jarduera fisikoa sustatuko dute, jarduera hori ahalik eta jende kopururik handienera iritsi ahal izan dadin, eta sustapena honako helburu hauek lortzera bideratuko da:

- a) Pertsonen bizi-kalitatea hobetzea.
- b) Patalogiei aurrea hartzea.
- c) Bizi-estilo osasungarriari lotutako ohiturak hartzea.
- d) Autoestimua eta autonomia pertsonala hobetzea.
- e) Baterako jardunaren bidez sozializatzea eta integratzea, desgaitasun motaren bat duten pertsonen kasuan bereziki.
- f) Egoneko bizitzak eragindako patologiei lotutako osasun- eta farmazia-gastua murriztea.
- g) Lotutako lanbideen eta enpresa-jardueren bitartez enplegua eta aberastasun ekonomikoa sortzea.
- h) Pertsonaren garapen integralean laguntzea, haurtzaroan eta nerabezeroan bereziki.

10. artikulua.-Neurri orokorrak.

Administrazio publikoek, aurreko artikuluan ezarritako helburuak lortzeko, honako neurri hauek hartu beharko dituzte beren eskumenen esparruan, genero-ikuspegia txertatuta:

- a) Jarduera fisikoaren esparruko jardunbide egokiei buruzko komunikazio-kanpainak egitea, horrek pertsonen ongizaterako dakartzan onura ugarien inguruko sentsibilizaziorako eta ezagutzarako.
- b) Joan-etorriak oinez, bizikletaz edo beste baliabide gurpildun batzuetan egiteko aukera sustatzeko kanpainak egitea.
- c) Zenbait gune publikotan herritar guztiek parte hartzeko aldizkako jarduerak antolatzea.
- d) Osasunaren esparruko, hezkuntzaren esparruko, kirolaren esparruko, gizarte-zerbitzuen esparruko eta intereseko beste edozein esparrutako profesionalen prestakuntza sendotzea, gizarte aktiboago baten aldeko sentsibilizazioa eta ezagutzak areagotzeko.
- e) Kirol-asoziazionismoa bultzatzea, lehiaketa ofizialetatik kanpo egiten den jarduera fisikoaren sustapenean protagonismo handiagoa har dezan.

11. artikulua.-Arreta bereziko taldeentzako neurriak.

1.- Administrazio Publikoek, beren eskumenen esparruan, jarduera fisikoa sustatuko dute gizarteratzeko eta gizarte-kohesiorako faktore gisa, eta bereziki kontuan hartuko dituzte haurrak, nerabeak, gazteak eta gizarte-talderik ahulenak edo gizarte-bazterkeria jasateko arriskuan daudenak (langabeak, etorkinak eta gizarte-eremu ahuletan bizi diren pertsonak bereziki). Horretarako, kolektibo horietara zuzendutako programak gaituko dira.



2.- Horretarako, kirol-arloko eskumenak eta gizarte-talde horiei lotutako eskumen sektorialak dituzten administrazio publikoek talde horien integrazioan eta haien ongizatearen hobekuntzan eraginkortasunez lagunduko duten jarduketak egiteko lankidetzak-mekanismoak ezarriko dituzte.

3.- Kirol-federazioek babes berezia emango diete administrazio-egoitza Euskal Autonomia Erkidegoan duten atzerriko kirolari adingabeei, jarduera fisikoaren eta kirol-jardunaren bidez gizartean txerta daitezen ahalbidetzeko.

4.- Administrazio Publikoek, beren eskumenen esparruan, atzerritarrek jarduera fisikoa egiteko aukera sustatuko dute gizartean txertatzeko bide gisa, eta haren eraginkortasuna zainduko dute. Halaber, kirol-erakundeetan dauden arau-oztopoak edo oztopo faktikoak kenduko dituzte.

12. artikulua.- Hezkuntza-arloko neurriak.

1.- Ikastetxe publikoek zein pribatuek, beren autonomian babestuta, jarduera fisikoa ikasleen ohitura bihurtzeko neurri egokiak hartuko dituzte. Horretarako, ikastetxe bakoitzaren hezkuntza-proiektuan eguneroko jarduera fisikoa sustatzeko ekintza egokiak txertatuko dira, bizitza aktibo, osasungarri eta autonomo baterako garapen egokia bermatzeko moduko baldintzetan.

2.- Autonomia Erkidegoko Administrazio Orokorrak Gorputz Hezkuntzako irakasgaiaren ordu kopurua gehitzeko bidezkoak diren xedapenak hartuko ditu eta, horren arabera, irakasgai hori astean hiru ordutan emango da Lehen Hezkuntzako eta Derrigorrezko Bigarren Hezkuntzako maila guztietan. Halaber, beste etapa batzuetan Gorputz Hezkuntzako irakasgaiaren ordu kopuru nahikoa bermatzeko bidezkoak diren xedapenak hartuko ditu.

3.- Ikastetxeek, beren autonomian babestuta, honako hauek sustatzeko neurri egokiak hartuko dituzte:

a) Ikasleen jarduera fisikoa; horretarako, eskola-ordutegiaren barruan telefono mugikorrek edo beste gailu elektroniko batzuk ikasgelatik kanpo erabiltzeko aukera mugatuko da, hezkuntza-arrazoiengatik edo beste edozein premia-arrazoiengatik erabilera hori beharrezkoa denean izan ezik.

b) Ikasleen, irakasleen eta gainerako langileen joan-etorri aktiboak; horretarako, bizikletak eta joan-etorri aktiboak egiteko beste baliabide batzuk aparkatzeko instalazioen ezarpena bultzatuko da.

c) Segurtasun-baldintza egokiak (eta, bereziki, argiztapen-baldintzak) ikastetxeetarako oinezkoen sarbideetan, ikastetxeetako kolektibo guztien joan-etorri aktiboak bultzatzeko (toki-erakundeekin lankidetzan).

d) Ikasleak, irakasleak eta gainerako langileak jarduera fisikoari lotutako zerbitzu publikoetara deribatzeko aukera.



13. artikulua.-Garraioaren eta bide-segurtasunaren arloko neurriak.

Garraioaren arloan eskumena duten administrazio publikoek honako neurri hauek hartu beharko dituzte beren eskumenen esparruan:

- a) Pertsonen mugikortasun aktiboa bultzatuko duten garraio intermodaleko estrategiak onartzea eta gauzatzea.
- b) Garraio-zerbitzuak hobetzea, joan-etorriak bizikletaz edo beste baliabide aktibo batzuetan egiteko aukera ahalbidetzeko eta sustatzeko.
- c) Bide-segurtasuna eta oinezkoen, txirrindularien eta beste baliabide gurgildun batzuk erabiltzen dituzten pertsonen segurtasuna hobetzeko neurriak inplementatzea.
- d) Oinezkoentzako eta bizikleten erabiltzaileentzako guneeetan ibilgailu motordunen joan-etorrietarako mugak ezartzea, desgaitasuna duten pertsonen kasuan izan ezik.

14. artikulua.-Hirigintzaren arloko neurriak.

Hirigintzaren arloan eskumenak dituzten administrazio publikoek honako hauek egiteko neurriak hartuko dituzte:

- a) Udalerri guztietan mugikortasuna, malgutasuna eta tonifikazio muskularra hobetzera zuzendutako ariketa fisiko sinpleak egiteko ekipamendu espezifikoa duten parke osasungarriak edo sarbide libreko gunek daudela bermatzeko.
- b) Pertsona guztiek beren landa- edo hiri-inguruneetan guneguruetarako sarbide ekitatiboa izateko duten eskubidea babesteko duten ingurune fisikoak sortzeko eta mantentzeko.
- c) Joan-etorriak oinez, bizikletaz edo beste baliabide aktibo batzuetan egiteko aukera sustatuko duten hiri-plangintzako politikak txertatzeko.

15. artikulua.- Kirol-ekipamenduak eskuragarri izateko neurriak. Kirol-txartel bakarra.

1.- Jarduera fisikoaren eta kirolaren jarduna eskuragarri izateko oztopoak desagerrarazte aldera, administrazio publikoek, beren eskumenen esparruan, kirol-ekipamenduen eskaintza publiko bateratua, koordinatua eta pertsonen premietara eta egoeretara egokitua egiteko beharrezkoak diren neurriak hartuko dituzte, eta, zehazki, herritarrei administrazio publiko guztien kirol-instalazioak erabiltzeko aukera emango dien kirol-txartel bakarra jarriko dute abian. Jarduera Fisikoaren Euskal Agentziak kirol-txartel bakarraren sorkuntza eta abiaraztea bultzatu eta koordinatu beharko du Euskal Autonomia Erkidegoaren eremuan, lurralde historikoetako foru-organoekin eta udalerriekin lankidetzan



2.- Autonomia Erkidegoko Administrazio Orokorrak ikastetxe publikoetako kirolguneak eskola-ordutegitik kanpo erabiltzeko eta bertan jarduera fisikoa eta kirola egiteko aukera sustatzera zuzendutako erabakiak hartuko ditu. Gune horiek eskola-ordutegitik kanpo baino ezin izango dira erabili, betiere irakaskuntza-jardueraren garapen normala eta ikastetxeen funtzionamendu egokia eta urteko programazio orokorra kaltetzen ez bada.

16. artikulua.- Gizarte-zerbitzuen arloko neurriak.

1.- Kirolaren eta gizarte-zerbitzuen arloan eskumenak dituzten administrazio publikoek honako neurri hauek hartuko dituzte beren eskumenen esparruan:

- a) Adinekoen jarduera fisikoa sustatzea eta, ildo horretan, zahartze aktiboaren aldeko kultura bultzatzea eta adinekoen ongizatea eta bizi-kalitatea hobetzen lagunduko duten ohitura osasungarriak sortzea.
- b) Adinekoen kolektiboari jarduera fisikoa egiteko beharrezkoa den informazioa emateko sentsibilizazio-kanpainak egitea.
- c) Adinekoen autoestimua, osasunaren eta ongizatearen hobekuntza bultzatuko duten jarduera fisikoaren eta kirolaren arloko belaunaldi arteko programen diseinua eta gauzatzea sustatzea.
- d) Desgaitasuna duten pertsonen jarduera fisikoa egiteko aukera sustatzea eta erabateko integrazioa lortzeko oztopo guztiak desagerraraztea.
- e) Desgaitasuna duten pertsonen prestaketa fisikoaz arduratutako pertsonen trebakuntza espezifikorako neurri egokiak bultzatzea, jarduera fisikoak desgaitasuna duten pertsonen osasunean eta bizi-kalitatean izan ditzakeen ondorioak kontuan hartuta.

2.- Kirolaren eta gizarte-zerbitzuen arloan eskumena duten administrazio publikoek egoera txarrean edo bazterkeria-arriskuan dauden pertsonen zuzendutako jarduerak antolatze bategarriko programak sortuko dituzte.

17. artikulua.- Lan-arloko neurriak.

Kirolaren eta lanaren arloan eskumenak dituzten Euskal Autonomia Erkidegoko administrazio publikoek, beren eskumenen esparruan, lan-esparruan jarduera fisikoa sustatzeko programak ezartzeko baterako neurriak hartuko dituzte, langileen osasuna eta ongizatea hobetzeko osagarri gisa.

18. artikulua.- Osasunaren arloko neurriak.

1.- Osasunaren eta kirolaren arloan eskumenak dituzten Autonomia Erkidegoko Administrazio Orokorreko sailek jarduera fisikoa bideratzeko zerbitzuen sorkuntza sustatuko dute elkarrekin, lehen mailako arretako



zerbitzuek osasun-arrazoien ondorioz ez-aktiboak diren edo premia bereziak dituzten pertsona gisa identifikatzen dituzten pazienteentzat.

2.- Sail horiek osasuna jarduera fisikoaren bidez sustatzeko baterako neurriak hartuko dituzte. Horretarako, jarduera fisikoaren jardunaren onurei eta kontuan hartu beharreko neurriei buruzko informazioa eta gomendio espezifikoak zabalduko dituzte, eta patologia jakin batzuen prebentziora eta tratamendura bideratutako programen bidez sustatuko dute jardun hori.

19. artikulua.- Kontratazioaren arloko neurriak.

Euskal Autonomia Erkidegoko administrazio publikoek eta gainerako botere esleitzailleek jarduera fisikoaren babesari lotuta dauden eta administrazio-kontratazioari buruzko araudi erregulatuarekin bat datozen klausula sozialak txertatuko dituzte administrazio-kontratuak esleitzeko prozeduretan, administrazio-klausula partikularren agirietan. Klausula horietan, gizonek eta emakumeek jarduera fisikoaren esparruan dituzten egoera eta premia desberdinak hartu beharko dira kontuan.

IV. TITULUA

GOBERNANTZA ONA JARDUERA FISIKOAN ETA KIROLEAN

20. artikulua.- Gobernantza ona jarduera fisikoan eta kirolean.

1.- Jarduera fisikoan eta kirolean, gobernantza onak integritatea, gardentasuna, berdintasuna, ekitatea, gizarte-inklusioa eta “governantza on” kontzeptuari lotutako beste edozein balio bermatu beharko ditu.

2.- Euskal Autonomia Erkidegoko administrazio publikoek, beren eskumenen esparruan, jarduera fisikoan eta kirolean gobernantza oneko gutxieneko estandar batzuk betetzearen baldintzapean jarriko dute jarduera fisikoaren eta kirolaren finantzaketa publikoa eta kirol-ekitaldietarako hautagaitzen babesa.

21. artikulua.- Kirol-lehiaketan integritatea.

Euskal Autonomia Erkidegoko administrazio publikoek –beren eskumenen esparruan– eta kirol-erakundeek kirol-lehiaketan integritatearen aurkako jardunbide oro desagerrarazteko prebentzio-neurriak hartuko dituzte.

22. artikulua.- Gardentasuna.



1.- Gardentasunaren arloko legegintza orokorrari jarraikiz bidezkoak diren betebeharrak galarazi gabe, kirol-federazioek, Kirol Federazioen Batasunak eta kirol-arloan eskumena duen Autonomia Erkidegoko Administrazio Orokorreko sailak finkatzen dituen erakunde guztiek honako informazio hau emango dute argitara beren webguneetan:

- a) Batzar Nagusiak onartutako aurrekontua.
- b) Aurreko ekitaldiko aurrekontuaren likidazioa.
- c) Kontu-auditoretzari buruzko txostena, nahitaezkoa denean.
- d) Jasotako dirulaguntza publikoen zerrenda; ematen duen erakundea, zenbatekoa eta helburua adierazi beharko dira.
- e) Emandako laguntzen zerrenda; zenbatekoa, helburua eta onuradunak adierazi beharko dira.
- f) Antolamendu-egitura; gobernu-organoak, administrazio-organoak eta ordezkari-organok osatzen dituzten pertsonak identifikatu beharko dira.
- g) Egoitza fisikoa, jendeari arreta eskaintzeko ordutegia, telefonoa eta helbide elektronikoa.
- h) Gobernu-organoak, administrazio-organoak eta ordezkari-organok osatzen dituzten pertsonen identifikazioa eta jaso dituzten ordainsariak, konpentsazioak edo dietak.
- i) Batzar Nagusien eta administrazio-organoen aktetan jasotako erabakien laburpena.
- j) Izenpetutako hitzarmenen zerrenda.
- k) Estatutuak, erregelamenduak, gobernantza onaren kodeak eta gainerako xedapen orokorrak eta zirkularrak.
- l) Onartzen diren gobernantza onaren kodeen betetze-mailari buruzko txostenak.

2.- Batzar nagusien eta administrazio-organoren aktei buruzko informazioa emateko betebeharratik, hirugarrenetik gatazkak edo bereziki babestu beharreko datu pertsonalak eraginpean hartzeagatik edo antzeko arrazoiengatik erreserba behar duten edukiak salbuetsi ahal izango dira.

3.- Informazioa era seguruan, garbi eta doan argitaratu beharko da dagokion egoitza elektronikoan. Edukiak erraz aurkitzeko moduan argitaratu beharko dira.

4.- Informazioa argitaratu eta eguneratzeko ardura erakundeko lehendakariarena izango da.

23. artikulua.- Berdintasuna.

1.- Euskal Autonomia Erkidegoko administrazio publikoek, beren eskumenen esparruan, herritarrei jardura fisikoa eta kirola egiteko aukera ematean honako printzipio hauek aplikatzera bideratuko dute beren gobernu-ekintza: tratu-berdintasuna, ekitatea, aniztasunaren errespetua, genero-ikuspegiaren



txertatzea, sexuaren araberako rolen eta estereotipoen desagerraraztea eta emakumeen eta gizonen ordezkariak orekatua kirol-erakundeen kudeaketa- eta zuzendaritza-organoetan.

2.- Berdintasuna era erreal eta eraginkorrean lortzeko emakumeek jarduera fisikoa eta kirola egiteko aukera (bizitzako etapa guztietara zuzendutako eta maila guztietako programa espezifikoaren bidez) eta kudeaketa- eta erabaki-esparruetan parte hartzeko aukera sustatuko dute botere publikoek.

3.- Administrazio publikoen laguntza-deialdietan, berdintasunaren, ekitatearen eta genero-ikuspegiaren printzipioen erabateko errespetua baloratuko da erakunde eskatzaileen antolamenduan eta funtzionamenduan.

4.- Lege honen esparruan sartuta dauden kirol-lehiaketa guztietan, berdintasunaren eta ekitatearen printzipioa bete beharko da sarietan, sari ekonomikoak ematen direnean.

5.- Administrazio publikoek sustatuko dute instalazio edo gune publikoetan kirol-jarduerak antolatzen dituzten pertsona fisiko edo juridikoek bi sexu-erakundeentzako kirol-programak antolatzea (mistoak edo bestelakoak), justifikatutako arrazoien kasuan izan ezik.

6.- Kirol-federazioen eta kirol-jarduerak antolatzen dituzten gainerako erakundeen araudietan, berdintasunaren eta ekitatearen printzipioa bete beharko da, eta debekatuta egongo da lehiaketa-oreka edo aukera-berdintasuna zaintzeko beharrezkoa ez den sexu-identitatearen diskriminazio oro.

7.- Lege honen babesean jarduera fisikoa eta kirola sustatzeko garatutako programa guztiek genero-inpaktua ebaluatu beharko dute ezinbestez, nagusiki emakumeen eta gizonen artean dauden desberdintasunak zuzentzeko helburuarekin.

8.- Euskal Autonomiako administrazio publikoek eta kirol-erakundeek kirol-jardun inklusiboa bermatzeko eta sexu-identitatearen gaia behar bezala lantzeko neurri egokiak hartuko dituzte.

9.- Administrazio publikoek eta kirol-erakundeek bermatuko dute lesbiana, gay, transexual eta intersexualek jarduera fisikoa eta kirola egitean sexu-orientazioagatik, genero-identitateagatik, genero-adierazpenagatik, sexu-garapenagatik edo antzeko zirkunstantziengatik diskriminaziorik ez jasateko duten eskubidea. Horretarako:

a) Jarduera fisikoak eta kirol-jarduerak aurreiritzi, xaxatze, indarkeria edo intolerantzia oro eragozteko edo zailtzeko baldintzetan egingo direla bermatzeko beharrezkoak diren neurriak hartuko dituzte.

b) Jarduera fisikoan eta kirolean LGTBIfobiaren aurkako protokoloen onarpena eta inplementazioa sustatuko dute.



10.- Euskal Autonomia Erkidegoko administrazio publikoek haurdunaldiagatik, amatasunagatik eta antzeko arrazoiengatik emakume kirolarien eskubideak diskriminatzen dituzten jardunbideak identifikatzeko, prebenitzeko eta zehatzeko politikak garatuko dituzte.

11.- Kirol-federazioek eta Kirol Federazioen Batasunak berdintasun-batzorde bat eratu beharko dute. Batzorde horrek, besteak beste, esparru horretan bere barruan gertatutako gorabeherak kudeatuko ditu, eta beren politiketan genero-ikuspegia txertatzen eta emakumeen aurkako indarkeria mota oro desagerrarazten lagunduko die elkartutako erakundeei.

24. artikulua.- Gizarte-inklusioa.

1.- Kirol-federazioek eta Kirol Federazioen Batasunak kirol inklusiboaren batzorde bat osatuko dute. Batzorde horrek desgaitasuna duten kirolariak kirolaren esparruan erabat txertatzeko aukera bermatzeko beharrezkoak diren politikak sustatuko ditu, haien erabateko integrazioa eragozten duten oztopoak desagerraraziko ditu, eta elkartutako erakundeei helburu hori lortzen lagunduko die.

2.- Administrazio publikoek, beren eskumenen esparruan, interes orokorrekotzat hartuko dituzte desgaitasuna duten pertsonen kirol inklusiboa eta hori sustatzen duten programak.

3.- Lege honen barnean hartutako erakundeek eta Euskal Autonomia Erkidegoko kirol-lehiaketen antolatzaileek desgaitasuna duten pertsonen kirol-jarduna sustatu eta bultzatuko dute, baita kirol inklusiboko jarduerak egiteko aukera ere.

4.- Administrazio publikoek, kirol-erakundeekin lankidetzan, agerikotasun handiagoa emango diete komunikabideetan kirol inklusiboari eta desgaitasuna duten pertsonen kirolari.

V. TITULUA

KIROL-ERAKUNDEAK

I. KAPITULUA

XEDAPEN OROKORRAK

25. artikulua.- Kirol-erakundeak: motak.



Lege honen ondorioetarako, kirol-klubak, kirol-elkarteak, kapitaleko kirol-sozietateak, kirol-federazioak eta Euskal Kirol Federazioen Batasuna hartuko dira kirol-erakundetzat.

26. artikulua.- Izenak.

Kirol-klub, kirol-elkarte eta kirol-federazio izenak Lege honetan izen horiekin araututako erakundeek baino ez dituzte erabiliko. Debekatuta dago nahasbide izan daitekeen izen berdin edo antzeko oro erabiltzea.

II. KAPITULUA

KIROL-KLUBAK

27. artikulua.- Kontzeptua eta araubide juridikoa.

1.- Lege honen ondorioetarako, pertsona fisikoek edo juridikoek osatzen dituzten eta kirol mota bat edo gehiago sustatzeko edo egiteko helburua duten irabazi asmotik gabeko eta nortasun juridikoko elkarte pribatuak hartuko dira kirol-klubtzat, lehiaketa ofizialetan parte hartzen duten ala ez kontuan hartu gabe.

2.- Kirol-klubek, eraketari, inskripzioari, azkentzeari, antolamenduari eta funtzionamenduari lotutako alderdi guztietan, Lege honen arauari eta garatzen duten xedapenei, beren estatutu eta erregelamenduei eta beren organoek balio osoz hartutako erabakiei jarraituko diete.

3.- Klubei atxikita dauden kirol-federazioen estatutuak eta erregelamenduak aplikatuko zaizkie.

4.- Kirol-kluben estatutuek erregelamenduz finkatzen diren alderdiak arautu beharko dituzte, beren barne-egitura eta funtzionamendu-araubidea printzipio demokratikoei eta ordezkaritza-printzipioei jarraikiz osatuko dute, eta ordezkaritza- eta administrazio-organo guztien hautaketa bazkide guztien boto aske, zuzen, berdin eta sekretu bidez egitea ezarriko dute.

5.- Kirol-klubek eratzen direnetik izango dute nortasun juridikoa, eta erregistroan inskribatzeak Lege honen ondorioetarako ofizialki aitortzen direla baino ez du adieraziko.

III. KAPITULUA

KIROL-ELKARTEAK



28. artikulua.- Kontzeptua eta araubide juridikoa.

1.- Pertsona juridikoak Euskal Autonomia Erkidegoko Kirol Erakundeen Erregistroan sartu ahal izateko, kirol-jarduerak egin beharko dituzte beren helburu nagusiaren osagarri gisa, lehiaketa ofizialetan parte hartzen duten ala ez kontuan hartu gabe. Horretarako, nortasun juridikorik gabeko kirol-elkartek eratu ahal izango dituzte beren baitan.

2.- Kirol-elkartek, eraketari, inskripzioari, azkentzeari, antolamenduari eta funtzionamenduari lotutako alderdi guztietan, Lege honen arauetara eta garatzen duten xedapenei, erakunde nagusien mendeko gisa dituzten arauetara eta beren organoek balio osoz hartutako erabakiei jarraituko diete.

3.- Kirol-elkarteei atxikita dauden kirol-federazioen estatutuak eta erregelamenduak aplikatuko zaizkie.

IV. KAPITULUA

KAPITALEKO KIROL-SOZIJETATEAK

29. artikulua.- Araubide juridikoa eta Euskal Autonomia Erkidegoko Kirol Erakundeen Erregistroan inskribatzea.

1.- Estatuko kirol-legeriak berariaz aitortzen dituen eta helbidea Euskal Autonomia Erkidegoan duten kirol-sozietate anonimoek eta kapitaleko beste edozein kirol-sozietatek adierazitako Estatuko legeriari jarraituko diote.

2.- Egoitza soziala Euskal Autonomia Erkidegoko lurralde-esparruan duten eta Lege honen eta bere erregelamenduzko xedapenen ondoriozko onura espezifikoak baliatu nahi dituzten kapitaleko kirol-sozietateek Euskal Autonomia Erkidegoko Kirol Erakundeen Erregistroan inskribatu beharko dute.

3.- Euskal Autonomia Erkidegoan finkatuta dauden eta Euskal Autonomia Erkidegoko Kirol Erakundeen Erregistroan inskribatzen diren kapitaleko kirol-sozietateak kirol-klubtzat hartuko dira kirol-federazioetan inskribatzeari eta parte-hartzeari dagokionez.

4.- Inskribatzeko prozedura eta baldintzak erregelamenduz finkatuko dira.

V. KAPITULUA

KIROL-FEDERAZIOAK



30. artikulua.- Kontzeptua eta araubide juridikoa.

1.- Lege honen ondorioetarako, beren lurralde-esparruan kirol mota bera sustatzen edo egiten duten kirolari, teknikari, epaile, elkarte eta taldeak biltzen dituzten irabazi asmotik gabeko eta nortasun juridikoko erakunde pribatuak hartuko dira kirol-federaziotzat.

2.- Kirol-federazioek Lege honi, garatzen duten xedapenei, beren estatutu eta erregelamenduei eta beren organoek balio osoz hartutako erabakiei jarraituko diete.

3.- Kirol-federazioek, beren eskudantzia propioez gain, administrazio-funtzio publikoak beteko dituzte eskuordetzan. Kasu horretan, administrazio publikoaren agente laguntzaile gisa jardungo dute.

31. artikulua.- Kirol federatuaren antolamendua.

1.- Euskal kirol-federazioak, oro har eta lurralde-federazioak dituzten modalitateak salbuetsita, Euskal Autonomia Erkidegoan beren kirol motako kirol-jarduera eta kirol-lehiaketa ofizialak bultzatzen, kalifikatzen, baimentzen eta bideratzen dituzten erakunde bakarrak dira.

2.- Kirol-federazioek beren estatutu eta erregelamendu propioen bidez arautuko dute beren egitura eta funtzionamendu-araubidea, demokraziaren, ordezkagarritasunaren eta genero-ikuspegiaren txertatzearen printzipioei jarraikiz.

3.- Euskal kirol-federazioek Autonomia Erkidegoko lurralde-antolamendura egokituko dute beren antolamendua eta funtzionamendu-araubidea.

4.- Kirol-modalitate bakoitzeko euskal federazioa euskal kirol federatuaren ordezkari bakarra izango da Estatuko eta nazioarteko esparruan. Kirol-federazioek sustatu eta bideratu egingo dute beren kirol-selektzioek Estatuko eta nazioarteko kirol-jardueretan eta kirol-lehiaketetan parte hartzeko aukera.

5.- Kirol-federazioek, halaber, aisialdiko kirol-jardueraren sustapena hartuko dute beren gain, lurralde historikoetako foru-organoekin eta udalerriekin lankidetzan.

32. artikulua.- Estatutuak.

1.- Kirol-federazioen estatutuek honako alderdi hauek arautu beharko dituzte gutxienez:

- a) Izena eta helburuak.



- b) Egoitza soziala.
- c) Kirol-modalitatea eta kirol-azpimodalitateak.
- d) Egitura organikoa.
- e) Federazio-organoen titularrak aukeratzeko eta kargugabetzeko sistema.
- f) Lurralde-antolamenduko araubidea, euskal federazioen kasuan.
- g) Funtzionamendu-araubidea, oro har, eta kide anitzeko organoen erabakiak, bereziki.
- h) Ekonomia- eta finantza-araubidea.
- i) Dokumentu-araubidea.
- j) Kirol-arloko diziplina-araubidea.
- k) Azkentzeko eta desegiteko araubidea.
- l) Estatutuak eta erregelamenduak onartzeko eta aldatzeko prozedura.

2.- Kirol-federazioen gobernu, administrazio eta ordezkartzako ezinbesteko organoak izango dira Batzar Nagusia, Zuzendaritza Batzordea, Lehendakaritza eta estatutuetan aurreikusitako beste edozein organo.

3.- Batzar Nagusia kirol-federazioen gobernu-organo gorena izango da. Bertan, kirol-klubak, kirol-elkarteak eta kapitaleko kirol-sozietateak baino ez dira ordezkaturik egongo. Kirol-federazioen estatutuek adierazitako erakundeen boto-haztapen bat ezarriko dute, federazio-lizentzien kopurua, kirol-esparruko jarduera eta erregelamendu bidez arautu beharreko beste datu objektibo batzuk kontuan hartuta.

4.- Zuzendaritza Batzordea administrazio-organoa izango da; Batzar Nagusiak hautatu beharko du zerrenda itxien bidez, eta federazio-estamentu guztietako ordezkariak bildu beharko ditu.

5.- Lehendakaritza federazioaren organo betearazlea eta ordezkartzakoa izango da, haren lege-ordezkaritza izango du, administrazio- eta gobernu-organoak zuzenduko ditu eta haien erabakiak betearaziko ditu. Hautaketa boto aske eta sekretu bidez egingo da, baita boto haztatua bidezkoa denean ere. Ezin izango da, inola ere, federazio bateko eta kirol-klub, kirol-elkarte edo kapitaleko kirol-sozietate bateko lehendakaria izan aldi berean.

6.- Kirol-federazioen organoak hautatzeko, beren hauteskunde-erregelamenduari jarraituz egingo dituzte beren hauteskunde-prozesuak, epeen barruan eta, hala badagokio, kirol-arloan eskumena duen Autonomia Erkidegoko Administrazio Orokorreko Sailak horretarako duen araudiaren arabera.

33. artikulua.- Kirol-modalitate eta kirol-azpimodalitate berrien aitorpena.



1.- Kirol-arloan eskumena duen Autonomia Erkidegoko Administrazio Orokorreko Sailak, Euskal Autonomia Erkidegoan kirola antolatzeko beharrari datzekion interes publikoko arrazoiak direla eta, kirol-modalitate berri bat eta haren barrukotzat hartu beharreko azpimodalitateak kalifikatzeko irizpideak eta baldintzak finkatuko ditu. Halaber, aurrez kirol-modalitatetzat hartu zen, baina halakotzat hartzea eragin zuten baldintzak betetzen ez dituen kirol-jardueraren kasuan, kirol-modalitatearen kalifikazioa errebokatu ahal izango du.

2.- Nolanahi ere, kirol-modalitate eta kirol-azpimodalitate berriak aitortzeko, beharrezkoa izango da jarduera fisiko esanguratsu bat. Irizpide horrek ez du eraginik izango Legea indarrean jarri aurretik kirol-modalitateei emandako aitorten ofizialean, modalitate horiek jarduera fisiko esanguratsuen baldintza betetzen ez badute ere.

3.- Kirol-arloan eskumena duen Autonomia Erkidegoko Administrazio Orokorreko Zuzendaritzari dagokio jarduera bat kirol-modalitate gisa kalifikatzea eta modalitate hori osatzen duten azpimodalitateak zehaztea, Jarduera Fisikoaren eta Kirolaren Euskal Kontseiluaren txostena jaso ondoren.

34. artikulua.- Euskal federaziorik ez dagoenean.

Kirol-modalitate jakin batean euskal federaziorik ez badago, kirol-arloan eskumena duen Autonomia Erkidegoko Administrazio Orokorreko Zuzendaritzak Euskadiko Kirol Federazioen Batasuna edo beste edozein kirol-erakunde gaitu ahal izango du, bi urteko aldi baterako gehienez eta behin edo gehiagotan, euskal federazioen berezko funtzio publikoak bere gain hartzeko.

35. artikulua.- Kirol-federazio berrien eraketa.

1.- Kirol-federazio bat onartzeko arrazoiak honako hauek izan daitezke:

- a) Sortu berria izatea.
- b) Beste batetik bereiztea.
- c) Lehendik zeuden bik edo gehiagok bat egitea.

2.- Euskal kirol-federazio berriak eratzeko, kirol-arloan eskumena duen Autonomia Erkidegoko Administrazio Orokorreko Zuzendaritzaren administrazio-onarpenera beharko da, eta hark honako irizpide hauen arabera eman edo ezetsiko du onarpen hori:

- a) Jardueraren interes publikoa.
- b) Jardueraren ezarpen-maila nahikoa.
- c) Kirol-modalitatea ofizialki aitortuta egotea.
- d) Federazio berriaren bideragarritasun ekonomikoa.
- e) Federazio berriaren antolamendu-ahalmena.



3.- Euskal kirol-federazio bat eratzeko, honako baldintza hauek bete beharko dira:

- a) Sortze-akta eta estatutuak erregelamenduz ezarritako baldintzetan aurkeztea.
- b) Jarduera Fisikoaren eta Kirolaren Euskal Kontseiluaren txostena.
- c) Kirol-arloan eskumena duen Autonomia Erkidegoko Administrazio Orokorreko Zuzendaritzak onarpena ematea.
- d) Euskal Autonomia Erkidegoko Kirol Erakundeen Erregistroan inskribatzea.

4.- Lurraldeko kirol-federazio bat aurrez azkentzen eta berrantolatzen den kasuan baino ezin izango da eratu. Nolanahi ere, honako baldintza hauek bete beharko dira eratu ahal izateko:

- a) Sortze-akta eta estatutuak arauz ezarritako baldintzetan aurkeztea.
- b) Jarduera Fisikoaren eta Kirolaren Euskal Kontseiluaren txostena.
- c) Dagokion Foru Aldundiak onarpena ematea.
- d) Euskal Autonomia Erkidegoko Kirol Erakundeen Erregistroan inskribatzea.

36. artikulua.-Aitorpen ofiziala eta eskusibotasuna. Desgaitasuna duten kirolariak biltzen dituzten kirol-federazioak.

1.- Euskal Autonomia Erkidegoaren esparruan, euskal federazio bakarra aitortu ahal izango da kirol-modalitate bakoitzeko. Halaber, lurralde historiko bakoitzean, lurraldeko federazio bakarra aitortu ahal izango da kirol-modalitate bakoitzeko, Legeak baimentzen dituen modalitateetan. Era beran, kirol-azpimodalitate bakoitza kirol-modalitate bakar batean sartuta egon daiteke.

2.- Arau orokor horretatik salbuetsita daude desgaitasuna duten kirolariak biltzen dituzten kirol anitzeko federazioak.

3.- Kirol-arloan eskumena duen Autonomia Erkidegoko Administrazio Orokorreko Zuzendaritzak eta kirol-arloan eskumena duten lurralde historikoetako foru-organoek desgaitasuna duten kirolariak dagokion kirol-modalitateko kirol-federazioetan pixkanaka sartzeko aukera erraztuko dute, desgaitasun motaren bat duten pertsonak kirol-lehiaketa ofizialetan parte hartzeko aukera modalitateari edo azpimodalitateari dagokion federazioaren esparruan gauzatu dadin.

4.- Kirol-federazioek desgaitasuna duten pertsonen kirol-federazioetan bildutako kirol egokituaren modalitateak integratu beharko ditu nahitaez, integrazio hori Estatuko eta nazioarteko kirol-federazioen esparruan egin



denean. Integrazio hori jatorriko eta helburuko federazioen batzar nagusiek berretsi beharreko akordio baten bitartez islatuko da.

5.- Integrazio horretan, desgaitasuna duten pertsonen kiroleko ordezkariak dagokion kirol-federazioko kide anitzeko organoetan presentzia haztatua dutela ziurtatuko da.

6.- Aurreko paragrafoetan aurreikusitako integrazioa lortzen ez den bitartean, desgaitasuna duten pertsonentzako kirol-federazioek beren estatutuetan jasota dauden kirol-modalitateak eta kirol-espezialitateak garatuko dituzte, gainerako kirol-federazioekin lizentziak elkarri aitortzeko sistemak ezartzeko aukera galarazi gabe.

37. artikulua.- Administrazio-funtzio publikoak.

1.- Kirol-federazioek honako administrazio-funtzio publiko hauek beteko dituzte:

- a) Lehiaketa ofizialak kalifikatzea eta baimentzea.
- b) Federazio-lizentziak ematea, ukatzea, ezerezteak eta antzekoak egitea.
- c) Federazioen hauteskunde-prozesuak kontrolatzea.
- d) Kirol-arloko diziplina-ahala baliatzea.
- e) Kirol Justiziako Euskal Batzordearen ebazpenak betearaztea.
- f) Beren estatutuak eta Lege hau garatzen duten xedapenetan zehazten diren erregelamenduak onartzea.
- g) Euskal kirolaren ordezkariak antolatzea Estatuko eta nazioarteko lehiaketetan.
- h) Arau bidez eskuordetu daitekeen beste edozein funtzio publiko.

2.- Kirol-arloan eskumena duten administrazio publikoek aurreko atalean zerrendatutako funtzio publikoak eta Lege honen ondoriozko betebeharrak guztiak behar bezala betetzen direla bermatzeko finantzaketa eta beharrezkoak diren baliabideak eman beharko dizkiete kirol-federazioei.

3.- Kirol-federazioek ezin izango dituzte ezein kasutan eskuordetu beren esku utzitako funtzio publikoak, administrazio eskudunak baimendu gabe.

4.- Euskal federazioek kirol-arloan eskumena duen Autonomia Erkidegoko Administrazio Orokorreko Sailaren Zuzendaritzarekin lankidetzan beteko dituzte beren funtzioak.

5.- Kirol-arloan eskumena duen Autonomia Erkidegoko Administrazio Orokorreko Sailaren eta lurralde historikoetako foru-organoen kontrolatik kanpo garatuko da administrazio-funtzio publikoak betetzeko egiten den eta Lege



honetan aurreikusitakoaren arabera Kirol Justiziako Euskal Batzordeak kontrola dezakeen federazio-jarduera.

6.- Nolanahi ere, honako federazio-jarduera hauek pribatuak izango dira:

- a) Federazio-organoez federazioaren antolamenduaren inguruan hartzen dituzten erabakiak eta neurriak.
- b) Lehiaketaren antolaketari, inskripzioei, jaitsierei, igoerei eta gainerako gorabeherei lotutako alderdiak, diziplina-gaiak izan ezik.
- c) Federazioaren barruko antolamendu-funtzionamenduaren inguruan sortzen diren gatazkak, hauteskunde-prozesuen kontrolari buruz aurreikusitakoa galarazi gabe.
- d) Mota orotako kirol-lehiaketen ustiapen ekonomikoaren inguruan sortzen diren gatazkak.
- e) Federazioek lehiaketen antolaketa materialaren inguruan pertsona fisiko eta juridikoekin egiten dituzten hitzarmenak eta kontratuak.

38. artikulua.-Federazioekiko atxikipena.

1.- Pertsona fisikoak eta juridikoak kirol-federazioetan sartzeko, dagokion federazio-lizentzia emango da.

2.- Pertsona fisikoak eta juridikoak kirol-federazioetan sartuta egotea ezinbesteko baldintza izango da lehiaketa federatu ofizialetan parte hartzeko.

39. artikulua.- Euskal federazioak goragoko lurralde-esparruko federazioetan sartzea.

Euskal federazioak goragoko esparruko kirol-federazioetan sartu ahal izango dira. Nolanahi ere, eta parte-hartze hori bermatzeko, Euskal Autonomia Erkidegoan federatutako pertsona fisiko edo juridikoek eskubidea izango dute beti nahi izanez gero goragoko lurralde-esparruko kirol-federazioetan sartzeko, euskal federazioek federazio horietan ez sartzea erabakitzen badute.

40. artikulua.- Kautelazko neurriak.

1.- Euskadiko eta lurraldeetako kirol-federazioen esku utzitako funtzio publikoak benetan betetzen direla bermatzeko, kirol-arloan eskumena duen Autonomia Erkidegoko Administrazio Orokorreko Zuzendaritzak eta lurralde historikoetako foru-organoez, beren eskumenen esparruan, honako jarduketa hauek egin ahal izango dituzte (jarduketa horiek ez dute ezein kasutan zehapen-izaerarik izango):

- a) Federazioen liburuak eta dokumentuak ikuskatzea.



b) Kide anitzeko organoei dei egitea eskuordetutako funtzio publikoekin zuzenean edo zeharka lotutako gai guztiak eztabaidatzeko eta ebazteko, aurretik dei egin ez bazaie.

c) Kautelaz eta arrazoiak emanez, kide anitzeko organoetako lehendakaria eta gainerako kideak zigortzea, baldin eta eskuordetutako funtzio publikoekin zuzenean edo zeharka lotutako administrazioko edo diziplinako ustezko arau-hauste astunen edo oso astunen ondorioz kide horien aurka diziplina-espedita hasten bada.

d) Kautelaz eta arrazoiak emanez, gobernu-organoei lehendakaria eta gainerako kideak zigortzea, baldin eta eskuordetutako funtzio publikoak betetzeari uzten badiote.

e) Kontabilitatearen eta kudeaketaren auditoretzak edo beste fiskalizazio mota batzuk egin daitezten eskatzea.

f) Lege honetan araututako beste kirol-erakunde batzuk administrazio-funtzio publiko jakin batzuk betetzeko aldi baterako gaitzea, baldin eta funtzio publiko horien garapena bermatzeko aparteko premia larria badago.

g) Eskuordetutako funtzio publikoak behar bezala betetzen direla bermatzeko beharrezkoak diren kautelazko neurri guztiak hartzea.

2.- Kirol-federazioen kide anitzeko organoetako lehendakaria eta gainerako kideak zigortzen diren kasuan, kirol-arloan eskumena duen Autonomia Erkidegoko Administrazio Orokorreko Sailaren Zuzendaritzak eta lurralde historikoetako foru-organoei kontu-hartzaileak izendatu ahal izango dituzte aldi baterako.

41. artikulua.- Gobernantza Onaren Kodea.

1.- Kirol-federazioek Gobernantza Onaren Kodea onartu beharko dute, eta, bertan, integritatearen, gardentasunaren, berdintasunaren, ekitatearen eta gizarte-inklusioaren balioak eta "governantza on" kontzeptuari lotuta dagoen beste edozein balio jasoko dira. Kode horretan, beharrezkoa izango da:

a) Federazioek egiten dituzten transakzio ekonomiko guztien kudeaketari eta kontrolari lotutako arauak biltzea, federazioak nagusiki laguntza publikoen bidez finantzatuta dauden ala ez kontuan hartu gabe.

b) Federazio-organoen osaeraren eta funtzionamenduaren arloko jarduketak hobetzeko irizpideak ezartzea.

c) Interes-gatazkak aurreikustea eta identifikatzea.

d) Edozein motatako legez kanpoko ekintzei aurrea hartzea.

e) Jarduera garatzeko egitura garden eta antolatu bat ezartzea.

f) Genero-ikuspegia txertatzea.

2.- Kode hori onartzea eta betetzea kontuan hartu beharreko irizpidea izango da kirol-arloan eskumena duen Autonomia Erkidegoko Administrazio Orokorreko Sailak kirol-federazioei ematen dizkien laguntza publikoetan.



3.- Gobernantza Onaren Kodean, federazio-organoen jarduketa-arauak jasoko dira, eta haiek kontrolatzeko organoak identifikatuko dira. Nolanahi ere, honako gutxieneko eduki hauek ezarriko dira:

- a) Federazioan kargu bat betetzeagatik jasotzen diren datu eta informazio guztiak sekretuan gordetzea; datu eta informazio horiek ezin izango dira norberaren, hirugarren pertsonen edo lotutako erakundeen onurarako erabili.
- b) Federazioaren ondarea behar ez bezala erabiltzeko eta federazioko kargu jakin bat baliatuta ondare-abantailak lortzeko debekua.
- c) Federazioko edo edozein federazio-organotako kide gisa ezagutzen diren negozio-aukerak norberaren onurarako baliatzeko debekua.
- d) Legearen, estatutuen eta erregelamenduen edota federazioaren interesaren kontrako erabakiei aurka egiteko betebeharra.
- e) Bidezko kontabilitate-idazpenak federazioko kideen esku jartzea, betiere eskaera arauz ezarritako bidetik egiten bada.
- f) Batzarreko kideekin, zuzendaritzako langileekin, teknikariek eta administrazioko langileekin kontratuak izenpetzeko debekua, kontratu horien suntsiarazpen-klausuletan indarreko lan-legeriak nahitaezko gisa ezarritakoak baino kalte-ordain handiagoak aurreikusten badira.
- g) Federazioak organoetako kideekin edo haiei lotutako hirugarrenekin egiten dituen transakzio ekonomikoen bolumenari buruzko aldizkako informazioa lantzea.
- h) Ogasun Publikoaren eta Gizarte Segurantzaren aurkako deliturik eta Administrazio Publikoaren aurkako arau-hauste astunik egin ez izanaren erantzukizunpeko deklarazioa aurkezteko betebeharra federazioko lehendakaria izateko.
- i) Eragiketak baimentzeko sistema baten ezarpena; bertan, eragiketa bakoitza nor baimendu behar duen eta baimena zer eragiketak behar duten (zenbatekoa edo izaera kontuan hartuta) zehaztuko da.
- j) Interes partikularreko edozein gairi buruzko eztabaidetan eta bozketetan parte hartzeko debekua.

4.- Garrantzi ekonomiko handiko kirol-federazioek, halaber, honako betebeharrak izango dituzte:

- a) Aurkeztu behar duten memoria ekonomikoan, federazioaren gobernu, administrazio eta ordezkartzako organoetako kideei beren funtzioak betetzean sortutako gastuak ordaintzeko edota erakundeari egindako zerbitzuen lansari gisa dirutan edo gauzatan emandako ordainsariei buruzko informazioa ematea.
- b) Federazioko zuzendaritzako langileek eta kargudunek federazioarekin merkataritza-loturak edo lotura profesionalak dituzten hornitzaileekin edo erakundeekin dituzten kontratu-harremanei,



merkataritza-harremanei edo familia-harremanei buruzko informazioa ematea.

c) Administrazio-zuzenbideari lotutako funtzioen inguruko arloetan, Euskal Autonomia Erkidegoko gardentasun publikoari buruzko legerian aurreikusitako publizitate aktiboko betebeharrak betetzea; horretarako, bidezko gardentasun-ataria izan beharko dute beren webgunean.

d) Obren, horniduren eta zerbitzuen kontratazioan, prozeduren publizitate, konkurrentzia eta gardentasunaren, hautagaien arteko diskriminaziorik ezaren eta tratu-berdintasunaren eta lehia askearen printzipioei jarraitzea.

5.- Kirol-arloan eskumena duen Autonomia Erkidegoko Administrazio Orokorreko Zuzendaritzak finkatuko du zein federazio hartu behar diren garrantzi ekonomikoko federaziotzat.

6.- Eusko Jaurlaritzak kirol-federazioen ordezkartza- eta administrazio-organoen agintaldien muga ezarri ahal izango du erregelamenduz, federazio-erakundeak berritzeko prozesua bermatze aldera.

7.- Gobernantza onaren kodeen aplikazioaren jarraipena hirugarren pertsona independenteen edota kirol-erakundearekin edo haren administrazio-organoko kideekin familia-loturarik, lotura ekonomikorik, lotura profesionalik edo antzekorik ez duten pertsonen osatutako barne-organo baten esku utziko da. Emaitzako txostenak webgunean argitaratuko dira.

42. artikulua.- Hizkuntza ofizialak.

1.- Euskal Autonomia Erkidegoko kirol-federazioen hizkuntza ofizialak euskara eta gaztelania dira.

2.- Kirol-federazioek bi hizkuntza ofizialak erabili beharko dituzte honako dokumentu hauetan gutxienez:

- a) Federazio-lizentziak.
- b) Ematen dituzten txartelak, agiriak eta antzeko dokumentuak.
- c) Estatutuak, erregelamenduak eta zirkularrak.
- d) Lehiaketak iragartzen dituzten kartelak.
- e) Federazio-organoen deialdiak.
- f) Gobernu- eta administrazio-organoen bilkuren aktak.

3.- Ziurtagiriak interesdunak aukeratzen duen hizkuntza ofizialean egin beharko dira.

4.- Kirol-federazioek hizkuntza-normalizazioko planak landu, onartu eta gauzatu beharko dituzte, federazioaren bizitzan euskararen erabilera normala



pixkanaka bermatzeko. Betebehar hori bete ezean, dirulaguntzak jasotzeko gaitasuna galduko dute.

5.- Autonomia Erkidegoko Administrazio Orokorreko organo eskudunek eta lurralde historikoetako foru-organoei kirol-federazioen barruan hizkuntza-normalizazio egokia lortzeko beharrezkoak diren baliabideak eta laguntza tekniko egokia eman beharko dizkiete kirol-federazioei.

43. artikulua.-Federazioen arauen publizitatea.

1.- Euskal kirol-federazioen estatutuak eta erregelamenduak eta haien aldaketak, administratiboki onartu ondoren, Euskal Autonomia Erkidegoko Kirol Erakundearen Erregistroan inskribatuko dira, dagokion kirol-federazioaren eta kirol-arloan eskumena duen Autonomia Erkidegoko Administrazio Orokorraren Zuzendaritzaren egoitza elektronikoetan argitaratuko dira, eta ez dute ondoriorik izango osorik argitaratu arte.

2.- Lurralde-federazioen estatutuek eta erregelamenduek publizitate-baldintza berak bete beharko dituzte, baina publizitatea, federazioaren egoitza elektronikoan ez ezik, lurralde historikoko foru-organoen egoitza elektronikoan ere argitaratu beharko da.

44. artikulua.- Zuzendaritzako langileak.

1.- Kirol-arloan eskumena duen Autonomia Erkidegoko Administrazio Orokorrak federazioetako zuzendaritzako langileen etengabeko prestakuntza eta funtzioak behar bezala betetzeko doako aholkularitza teknikoa sustatuko ditu.

2.- Federazioetako zuzendaritzako langileei ordaindu ahal izango zaie. Nolanahi ere, ordainsari hori ezin izango da ordaindu dirulaguntza publikoen kontura, eta agintaldia amaitzean amaituko da.

45. artikulua.- Ekonomia- eta ondare-araubidea.

1.- Kirol-federazioek kirol-arloan eskumena duen Autonomia Erkidegoko Administrazio Orokorraren Zuzendaritzak erregelamenduz finkatutako kontabilitateko printzipioak eta arauak aplikatuko dituzte, eta kontu-auditoretzak egingo zaizkie.

2.- Kirol-federazioek ezin izango dute aurrekontu defizitatorik onartu, kirol-arloan eskumena duen Autonomia Erkidegoko Administrazio Orokorraren Zuzendaritzak baimentzen duen salbuespenezko kasuetan izan ezik.

3.- Kirol-federazioek ezin izango dute urte anitzeko gasturik konprometitu dagokion administrazio-baimenik gabe, gastu horiek erregelamenduz ezartzen



den ehunekoa baino handiagoak badira eta lehendakariaren agintaldia gainditzen badute.

4.- Kirol-federazioek industria-jarduerak, merkataritza-jarduerak edo lanbide-jarduerak egin ahal izango dituzte, baina errendimendu ekonomikoak kirol-helburu propioetara zuzendu beharko dituzte.

46. artikulua.- Lehiaketa federatuen ustiapen ekonomikoa.

1.- Kirol-federazioak beren kirol-lehiaketen ustiapen ekonomikorako eskubideen titular bakarrak dira, eta ez dute parte-hartzaileen baimen edo adostasun indibiduala eta esanbidezkoa behar. Horretarako, kirol-federazioek komenigarritzat hartzen dituzten akordioak ezarri ahal izango dituzte hirugarren pertsonekin eta probak antolatzen dituztenekin.

2.- Pertsona fisikoak eta juridikoak lehiaketa federatuetan inskribatzeak irudiaren publizitate-eskubideen lagapena eragingo du automatikoki, kirol-federazioei lehiaketa horiek ekonomikoki ustiatzeko aukera ahalbidetzeko beharrezkoak diren baldintzetan.

47. artikulua.-Onura publikoaren deklarazioa.

1.- Kirol-federazioak onura publikoko erakundeak dira.

2.- Onura publikoaren deklarazioak honako hauek eragingo ditu:

- a) Erakundearen izenaren ondoren «onura publikoko» kalifikazioa erabiltzeko eskubidea.
- b) Kirol-ekipamenduen arloko laguntzak jasotzeko eta dirulaguntza-programetan sartzeko lehentasuna.
- c) Lurralde historikoetako foru-organoek onura publikoko elkarteen alde erabakitzen dituzten zerga-onurak.
- d) Beste xedapen batzuek ezartzen dituzten beste onura batzuk.
- e) Kirolari lotutako xedapen orokorrak prestatzeko garaian entzunak izateko eskubidea.

48. artikulua.-Bideragarritasun Plana.

1.- Tutoretzako Administrazio Publikoak kirol-federazioei beren betebeharrak betetzea eragozten dien egoera ekonomiko bat detektatzen duenean baina bideragarria dela ondorioztatzen duenean, egoera horren arrazoiak bilduko dituen txosten xehatu bat egingo du, eta Bideragarritasun Plan bat onartuko du. Plan hori eraginpean hartutako erakundeak berak proposatu ahal izango du. Aurrekoa gorabehera, konkurtso-legeria aplikatu ahal izango da, hala badagokio.



2.- Bideragarritasun Planak osorik betetzera behartuko du kirol-federazioa.

3.- Bideragarritasun Plana justifikaziorik gabe betetzen ez bada, tutoretzako Administrazio Publikoak ahalmena izango du:

- a) Dagokion federazioko gobernu-organoak ordezteko.
- b) Aldi batez beste administrazio bat izendatzeko.
- c) Federazioak kirol-jardueraren jarraitutasuna ziurtatzeko finkatutako programei lotutako ordainketak eta betebeharrak bere gain hartzeko.
- d) Bideragarritasun Plana betetzeko beharrezkoak diren kudeaketa-neurriak hartzeko.
- e) Bideragarritasun Plana aldatzeko, bete ezin dela ikusten denean.

4.- Bideragarritasun Plana bete ezin denean eta federazioa bideraezina denean, Administrazio Publikoak errebokatzea erabakiko du.

49. artikulua.-Desegitea.

1.- Kirol-federazioak Batzar Nagusiaren erabaki bidez edo ebazpen judicial bidez desegingo dira.

2.- Kirol-federazio bat desegiten denean, haren ondare garbia (baldin badago) antzeko jarduerak egiteko erabiliko da. Euskal federazioen etorkizuna kirol-arloan eskumena duen Zuzendaritzak finkatuko du, eta lurralde-federazioen etorkizuna, berriz, lurralde historikoetako bidezko foru-organoek.

50. artikulua.- Kirol-federazioen aitortpena errebokatzea.

1.- Kirol-arloan eskumena duen Autonomia Erkidegoko Administrazio Orokorreko Sailaren Zuzendaritzak errebokatu ahal izango du Lege honetan federazioak ofizialki aitortzeko ezarritako baldintzak une jakin batean betetzeari uzten dioten euskal federazioen aitortpena. Euskal federazioen aitortpena errebokatzeak, Jarduera Fisikoaren eta Kirolaren Euskal Kontseiluaren txostena beharko da. Era berean, lurralde historikoetako foru-organoek lurralde-federazioen aitortpena errebokatu ahal izango dute, eta horretarako ere, adierazitako txostena beharko da.

2.- Kirol-federazioen aitortpena errebokatzeak honako hauek eragingo ditu:

- a) Euskal Autonomia Erkidegoko Kirol Erakundearen Erregistroko inskripzioa ofizioz ezerezteak.
- b) Lege honek emandako eskubide eta funtzio guztien titulartasuna galtzea.
- c) Desegiteko betebeharra.



3.- Kirol-federazioa desegiteko betebeharra betetzen ez bada, erantzukizun pertsonalak eskatuko dira, dagokion administrazio-organoak desegite judiziala eskatzeko duen eskubidea galarazi gabe.

VI. KAPITULUA

EUSKAL KIROL FEDERAZIOEN BATASUNA ETA EUSKAL SELEKZIOAK

51. artikulua.-Euskal Kirol Federazioen Batasuna.

1.- Euskal Kirol Federazioen Batasuna euskal kirol-federazioez osatuta dagoen eta nortasun juridikoa duen elkarte-oinarriko eta irabazi-asmorik gabeko erakundea da, eta euskal kirol federatua hobetzeko eta garatzeko oinarri komunak bilatzea, kirol-helburuak babestea eta hobeto betetzea eta kirol-erakundeen administrazio-egitura edo laguntza teknikoko egitura komunak ezartzea du helburu. Halaber, bere eskumenen esparruan, Euskadiko kirol-administrazioa aholkatzeko funtzioa bete ahal izango du, kirol-federazio bakoitzak bere kirol-esparruan duen aholkularitza-ahalmen espezifikoa galarazi gabe.

2.- Euskal Kirol Federazioen Batasuna euskal kirol-federazio guztiak ordezkatuko dituen erakundea izango da, kirol-federazio bakoitzak bere kirol-esparruan duen ordezkaritza espezifikoa galarazi gabe.

52. artikulua.- Euskal selekzioak.

1.- Euskal Kirol Federazioen Batasunak euskal selekzioak Estatuko eta nazioarteko lehiaketetan parte hartzeko aukera sustatu eta bultzatu ahal izateko beharrezkoa den babesa eta estaldura emango die euskal federazioei.

2.- Euskal federazioek hautatu beharko dituzte beren eskumeneko kirol-modalitateetan beren selekzioak ordezkatuko dituzten kirolariak.

3.- Selekzio horietan sartzen diren kirolariek baimena eman beharko diete kirol-federazioei beren irudia kirol-ekipamenduen bitartez publizitate-helburuekin erabiltzeko. Erabilera hori, nolana ere, kirolarien selekzioaren kirol-lahiaketetan agertzeraz edo parte hartzeraz mugatuko da.

53. artikulua.- Araubide juridikoa.

1.- Euskal Kirol Federazioen Batasunak, eraketari, inskripzioari, azkentzeari, antolamenduari eta funtzionamenduari lotutako alderdi guztietan, Lege honen arauari eta garatzen duten xedapenei, bere estatutu eta erregelamenduari eta bere organoek balio osoz hartutako erabakiei jarraituko die.



2.- Euskal Kirol Federazioen Batasunaren estatutuek erregelamenduz finkatzen diren alderdiak arautu beharko dituzte, beren barne-egitura eta funtzionamendu-araubidea printzipio demokratikoei eta ordezkaritza-printzipioei jarraikiz osatuko dute, eta ordezkaritza- eta administrazio-organo guztien hautaketa elkartutako kirol-federazio guztien boto aske, zuzen, berdin eta sekretu bidez egitea ezarriko dute.

3.- Euskal Kirol Federazioen Batasunaren estatutuak kirol-arloan eskumena duen Autonomia Erkidegoko Administrazio Orokorreko Zuzendaritzak onartu beharko ditu, eta Euskal Autonomia Erkidegoko Kirol Erakundeen Erregistroan inskribatu beharko dira.

VII. KAPITULUA

EUSKAL AUTONOMIA ERKIDEGOKO KIROL ERAKUNDEEN ERREGISTROA

54. artikulua.- Izaera.

Euskal Autonomia Erkidegoko Kirol Erakundeen Erregistroa kirol-arloan eskumena duen Autonomia Erkidegoko Administrazio Orokorreko Sailari organikoki atxikitako zerbitzua izango da, eta helbidea Euskal Autonomia Erkidegoan duten kirol-erakundeak inskribatzea du helburu.

55. artikulua.- Erregistro publikoa.

Euskal Autonomia Erkidegoko Kirol Erakundeen Erregistroa publikoa da, eta pertsona orok du kontsultatzeko eskubidea. Publizitatea erregelamenduz finkatutako baliabideen bitartez egingo da.

56. artikulua.- Inskribatu beharreko egintzak.

Honako egintza hauek inskribatu beharko dira Euskal Autonomia Erkidegoko Kirol Erakundeen Erregistroan:

- a) Kirol-kluben, kirol-elkarteen eta kirol-federazioen eraketa.
- b) Euskal Kirol Federazioen Batasunaren eraketa.
- c) Estatutuen onarpena eta aldaketa.
- d) Federazioen erregelamenduen onarpena eta aldaketa.
- e) Kirol-erakundeen ordezkaritza- eta administrazio-organoetako kide hautetsien izendapena eta kargu-uztea.
- f) Kirol-erakundeen desegitea eta likidazioa.
- g) Kirol-federazioen aitorpenaren errebokatzea.



h) Oro har, beste xedapen batzuetan inskribatzeko aurreikusitako egintzak.

57. artikulua.-Onurak eta lankidetzak.

1.- Kirol-erakunde bat Euskal Autonomia Erkidegoko Kirol Erakundeen Erregistroan inskribatzeak haren aitorten ofiziala eragingo du Lege honen ondorioetarako, eta ezinbesteko baldintza izango da Euskal Autonomia Erkidegoko Administrazioaren kirol-programa espezifikoetarako laguntza publikoak lortu ahal izateko, kirol-lehiaketa ofizialetan parte hartzeko eta kirol-legerian jasotako gainerako onurak baliatzeko.

2.- Euskal Autonomia Erkidegoko Kirol Erakundeen Erregistroak inskribatutako erakundeen izena babestuko du, inork erabili ahal izan ez dezan izen berdinik edo antzekorik.

3.- Kirol-arloan eskumena duen Autonomia Erkidegoko Administrazio Orokorreko Sailak beharrezkoa den aholkularitza teknikoa eta laguntza eskainiko die kirol-erakundeak sortzeko edozein proiekturi ekiten diotenei.

58. artikulua.- Erregelamendu bidezko garapena.

Erregelamendu bidez finkatuko dira Euskal Autonomia Erkidegoko Kirol Erakundeen Erregistroaren egitura, funtzioak eta funtzionamendu-araubidea, baita informazioa beste erregistro batzuekin elkartrukatze sistema ere.

VI. TITULUA

KIROL-LEHIAKETAK ETA LIZENTZIAK

I. KAPITULUA

KIROL-LEHIAKETAK

59. artikulua.- Lehiaketen sailkapena.

1.- Lege honen ondorioetarako, Euskal Autonomia Erkidegoan egingo diren kirol-lehiaketak honela sailkatuko dira:

a) Lehiaketa ofizialak, lehiaketa ez-ofizialak eta lehiaketa mistoak edo konposatuak.

b) Kirol federatuko, eskola-kiroleko eta unibertsitate-kiroleko lehiaketa ofizialak.



2.- Lege honen ondorioetarako, federazioek dagokion urteko egutegian aurrez horrela kalifikatutakoak hartuko dira lehiaketa ofizial federatutzat. Lehiaketa horietan, Lege honen babesean emandako lizentzia duten kirolariek eta kirol-erakundeek baino ezin izango dute parte hartu dagokion titulu ofiziala lortzeko.

3.- Lehiaketa mistoetan edo konposatuetan, lizentzia eta dagokion titulu ofiziala lortzeko eskubidea duten kirolariek eta lizentziarik ez duten eta titulu ofiziala lortzeko norgehiagokan esku hartzen ez duten kirolariek parte hartzen dute.

60. artikulua.- Kirol-lehiaketen antolamendua, antolaketa, kalifikazioa eta baimena.

1.- Lehiaketa ofizial federatuak antolatu, kalifikatu eta baimentzeko funtzioak kirol-federazioei dagozkie. Federazio horiek beren funtzioak koordinatu beharko dituzte, eta Autonomia Erkidegoko eta beheagoko lurralde-esparruko kirol-lehiaketen piramide-egitura bermatuko dute.

2.- Lehiaketa ofizial federatu horien antolaketa materiala ez da administrazio-funtzio publiko bat, eta edozein pertsona fisiko edo juridikori, publiko edo pribaturi eskuordetu ahal izango zaio.

3.- Lurralde-esparruko eskola-lehiaketa ofizialak antolatu, kalifikatu eta baimentzeko funtzioak foru-aldundiei dagozkie, eta Autonomia Erkidegoko eskola-lehiaketei lotutakoak, berriz, kirol-arloan eskumena duen Autonomia Erkidegoko Administrazio Orokorreko Sailari.

4.- Unibertsitate-lehiaketa ofizialak antolatu, kalifikatu eta baimentzeko funtzioak unibertsitate bakoitzari dagozkie. Unibertsitate arteko lehiaketetan, funtzio horiek kirol-arloan eskumena duen Autonomia Erkidegoko Administrazio Orokorreko Zuzendaritzak beteko ditu, Unibertsitate Kirolaren Euskal Azpibatzordearen laguntzarekin.

5.- Aurreko ataletan aipatutako erakundeak izango dira titulu ofizialak emateko ahalmena duten bakarrak.

61. artikulua.- Arbitroen hutsegiteak eta zuzenketak kirol-lehiaketetan.

1.- Kirol-lehiaketak zuzentzeko ahalmena kirol-modalitateetan aurreikusitako epaile motei dagokie.

2.- Organo horiek kirol-lehiaketak zuzentzeko ahalmen hori baliatuta hartzen dituzten erabakiak zuzentzat hartuko dira, eta haien aktek egiazkotasun-presuntzioa izango dute eta lehiaketak behar bezala egiteko beharrezkoak diren dokumentu-baliabideak izango dira. Izaera bera izango dute adierazitako



organoek ofizioz edota diziplina-organoek eskatuta izenpetzen dituzten akten azalpen handiagoek edo argibideek.

3.- Era berean, ordezkari/informatzaileen eta kirol-lehiaketako edozein ofizialen aktak egiazkotzat hartuko dira kirol-arloko diziplina-ahala baliatzeko garaian, betiere kargu eta funtzio horiek dagokion kirol-erakundearen araudian berariaz jasota badaude.

62. artikulua.- Kirol-lehiaketen emaitzen aldaketa. Diziplina-organoek kirol-lehiaketak berriz arbitratzeko debekua.

1.- Diziplina-organoek kirol-lehiaketen emaitzak aldatu ahal izango dituzte egindako diziplinazko arau-haustearen izaera dela eta beharrezkoa denean, batez ere lehiaketaren emaitzak aurrez ezartzera bideratutako ekintzen edo ez-egiteen, bidegabeko jokalaria-zerrenden, nortasun-ordezpenen, lizentzia lortzeko faltsututako datuen eta antzeko ekintzen kasuan.

2.- Diziplina-organoek debekatuta izango dute probak edo partidak berriz arbitratzeko eta arbitroen erabakiak berrikusteko aukera, erabaki horien diziplina-ondorioak salbuetsita.

63. artikulua.- Kirol-lehiaketen integritatea.

1.- Kirol-erakundeek, kirolariek, teknikariek, epaileek, zuzendariak eta kirol-federazioetako, kirol-klubetako, kirol-elkarteetako eta beste kirol-erakunde batzuetako beste edozein pertsonak debekatuta izango dituzte honako hauek:

- a) Pertsonalki edo beren erakundearen bitartez parte hartzen duten probekin, partidekin edo lehiaketekin zuzenean edo zeharka lotuta dauden apustuak egitea.
- b) Apustu horietan iragarle, aholkulari eta abar gisa parte hartzea.
- c) Apustu horiek sustatzen, negoziatzen, antolatzen edo zuzentzen dituzten enpresetan interesak edo eskubideak edukitzea eta enpresa horiekin lan-lotura, merkataritza-lotura edo antzeko lotura bat izatea.

2.- Kirol-federazioek eta kirol-lehiaketak antolatzen dituzten beste edozein erakundek lehiaketen integritatea bermatzeko neurriak hartu beharko dituzte, hala nola liga erregularren azken jardunaldietako ordutegiak bateratzea eta hirugarrenei emaitza positiboak lortzeko pizgarriak emateko aukera debekatzea.

64. artikulua.- Kluben eta elkarten parte-hartzea beste lurralde historiko batzuetako kirol-lehiaketetan.



Kirol-klub bat edo kirol-elkarte bat bere egoitza sozialari dagokionaz bestelako lurralde historiko mugakide batean lehiatu izan den kasuetan, lehiaketa-jarduera egin duen lurraldeari dagokion lehiaketan inskribatzen jarraitu ahal izango du.

65. artikulua.- Kirol-lehiaketen leihatila bakarra.

1.- Kirol-arloan eskumena duen Autonomia Erkidegoko Administrazio Orokorreko Sailak kirol-ekitaldiak antolatzeko leihatila bakarraren sorkuntza sustatuko du, ekitaldi horiek Euskal Autonomia Erkidegoan antolatzeko eta garatzeko lana errazte aldera. Leihatila bakar hori antolatzailleek behar dituzten komunikazioen, erantzukizunpeko deklarazioen, administrazio-baimenen edo kontratazioen inguruko informazioa, aholkularitza eta izapidetze elektronikoa kudeatzeko bulego zentralizatua izango da.

2.- Kirol-ekitaldien leihatila bakarra ezartzeak ez du inolako aldaketarik eragingo administrazio-organoen eskumenetan.

II. KAPITULUA

KIROL-LIZENTZIAK

66. artikulua.- Lizentziaren beharra.

1.- Lege honetan aurreikusitako kirol-lehiaketa ofizialetan parte hartzeko, beharrezkoa izango da lizentzia edukitzea, garapen-xedapenetan ezartzen diren baldintzei jarraikiz.

2.- Kirol-federazioek, halaber, borondatez eskuratuko diren jolas-txartel edo zerbitzu-txartel ez-ofizialak eman ahal izango dituzte. Txartel horiek ez dute emango ezein lehiaketa ofizialetan parte hartzeko eskubidea, eta ez dute adieraziko dagokion kirol-federazioan sartuta egotea. Txartel horiek lehiaketa ez-ofizialetan parte hartzeko eta zerbitzu jakin batzuk lortzeko aukera baino ez dute emango.

67. artikulua.- Lizentziak ematea.

1.- Eusko Jaurlaritzak erregelamenduz finkatuko du dagokion lizentzia eman aurretik azterketa medikoak egiteko betebeharra, kirolarien osasunerako arriskuei hobeto aurrea hartzeko beharrezkotzat hartzen den kirol-modalitateetan edo kirol-azpimodalitateetan.



2. Azterketa mediko horien helburua kirol-jardueran kirolarien osasuna babestea da. Hori dela eta, azterketak diseinatzeko eta kirol-modalitate bakoitzean aplikatzeko garaian, honako hauek hartuko dira kontuan:

- a) Egin beharreko kirol-modalitatearen ezaugarriak.
- b) Dagokion kirol-modalitatean aritzeko beharrezkoa den esfortzua eta gainerako gaitasun fisikoak.
- c) Ingurune-baldintzak.
- d) Emakumeen eta gizonen, adingabeen eta desgaitasuna duten pertsonen premia espezifikoak.

3.- Lizenziak arau batzuen arabera emango dira, eta ezin izango dira ukatu eskatzaileak lizentzia lortzeko beharrezkoak diren baldintzak betetzen dituenean.

4.- Lizentzia federatuak, eskola-lizenziak edo unibertsitate-lizenziak ematean, sexu-identitateagatiko diskriminaziorik ez dagoela bermatuko da. Dena dela, berdintasun-printzipioa hutsaldu dezakeen lehiaketa-abantaila oro saihesteko neurriak txertatu ahal izango dira lehiaketan arauetan. Neurri horiek beharrezkoak, arrazoizkoak eta proportzionalak izango dira.

5.- Lizentzia eskatu eta erregelamenduz finkatutako epea igaro ondoren berariazko ebazpenik eman ez bada, isiltasunez emanda dagoela ulertuko da.

68. artikulua.- Lizenzien titularren aseguramendua.

1.- Federazio-lizenziek, eskola-lizenziek eta unibertsitate-lizenziek aseguru bat izango dute. Aseguru horrek honako arrisku hauen estaldura bermatuko du:

- a) Erantzukizun zibila.
- b) Galera anatomiko edo funtzionalen edota heriotzaren kasuetarako kalte-ordaina.

2.- Lizenzien titularrek Lege honetan araututako kirol-lehiaketetan parte hartzeari lotutako osasun-laguntza dagokien osasun-sistema publikoaren ohiko prestazioa da.

3.- Kirolari horiek Estatuko edo nazioarteko lehiaketa ofizialetan parte hartzeari lotutako osasun-laguntzaren aseguramendua Estatuko edo nazioarteko araudian ezarritakoa izango da.

69. artikulua.- Federazio-lizenziak.

1.- Euskal federazioak dira Euskal Autonomia Erkidegoan federazio-lizenziak izapidetzeko eta emateko eskumena duten erakundeak.



2.- Lizentzia horiek izapidetzeko eta emateko baldintza ekonomikoak eta prozedura-baldintzak erregelamenduz finkatuko dira.

3.- Kirolari federatuek euskal selekzioen deialdietara joateko betebeharra izango dute, kirol-lehiaketetan parte hartzeko edo lehiaketa horiek prestatzeko.

4.- Eskola-lizentziak federazio-lizentzien baliokideak izango dira erregelamenduz finkatzen diren ondorioetarako.

VII. TITULUA

ESKOLA-ADINEKO, UNIBERTSITATEKO ETA LANBIDE-HEZIKETAKO JARDUERA FISIKOA ETA KIROLA

I. KAPITULUA

ESKOLA-ADINEKO JARDUERA FISIKOA ETA KIROLA

70. artikulua.- Kontzeptua.

Lege honen ondorioetarako, 16 urtera bitarteko ikasleek eskola-orduetatik kanpo egiten duten jarduera antolatua hartzen da eskola-adineko jarduera fisiko eta kiroltzat.

71. artikulua.- Funtzioak eta ezaugarriak.

Eskola-adineko jarduera fisikoa eta kirola kirol anitzekoa izango da ahal bada, eta ez da lehiaketara soilik bideratuko, ikasle guztiek jarduera fisikoa eta kirola beren borondatearen, gaitasun fisikoaren eta adinaren arabera ezagutzeko eta egiteko aukera dutela bermatu ahal izan dadin.

72. artikulua.- Oinarri eta printzipio orokorrak.

Eusko Jaurlaritzari dagokio eskola-adineko jarduera fisikoaren eta kirolaren oinarri eta printzipio orokorrak arautzea, eta ereduaren ahalik eta homogeneizaziorik handiena bermatzen saiatuko da hiru lurralde historikoetan.

73. artikulua.- Programak.

1.- Eskola-adineko jarduera fisikoko eta kiroleko programak lurralde historikoetako foru-organoei onartuko dituzte urtero, eta prestakuntza integralera, nortasunaren garapen orekatura eta geroago jarduera fisikoa eta



kirola egiten jarraitzea ahalbidetuko duten baldintza fisikoak eta osasun-baldintzak lortzera bideratuta egongo dira.

2.- Eskola-adineko jarduera fisikoko eta kiroleko programek desgaitasuna duten ikasleak beren ikaskideekin integratzeko aukera sustatu beharko dute. Hori ezinezkoa denean, desgaitasuna duten pertsonen kolektiboentzako jarduera espezifikoak aurreikusi beharko dira programetan.

3.- Eskola-adineko jarduera fisikoko eta kiroleko programen aurretik, genero-inpaktuaren ebaluazioa egin beharko da, nesken eta mutilen arteko desberdintasun oro, generoari lotutako estereotipoak, azpimodalitate batzuen maskulinizazioa edo feminizazioa eta antzeko alderdiak behar bezala lantzeko. Programek, halaber, ekitatea bermatu beharko dute zailtasun ekonomikoak eta sozialak dituzten kolektiboetako hurrei programetako jarduerak egiteko aukera ematean.

4.- Eskola-adineko jarduera fisikoko eta kiroleko programek jardueretan eskola-jazarpenari aurrea hartzeko neurri espezifikoak jaso beharko dituzte, eta behar bezala jaso beharko dute adin horietan sexu-identitateari lotuta agertzen den problematika.

5.- Adin txikienetan, eskola-kiroleko programetan lehiaketa-jarduerak saihestuko dira, eta haurren motrizitatea eta nortasuna aberastera bideratuko dira jarduerak.

6.- Hamabost urtetik beherako ikasleen kirol-lehiaketak, oro har, eskola-adineko jarduera fisikoko eta kiroleko urteko programetan jasotakoak izango dira. Hala eta guztiz ere, erregelamenduz ezarri beharreko baldintzak betetzen badira, hamabost urtetik beherako ikasleei zuzendutako jarduera fisikoko eta kiroleko urteko programetan jasota ez dauden kirol-lehiaketak antolatzeko, ikasle horiek lehiaketa federatuetan parte hartzeko eta kirol-modalitate batzuetan teknifikazio-unitateak garatzeko aukera baimenduko dute lurralde historikoetako foru-organoek.

7.- Eskola-adineko jarduera fisikoko eta kiroleko programek euskararen erabilera sustatu beharko dute ikasleen kirol-jardunaren esparruan.

74. artikulua.- Egituraketa.

1.- Eskola-adineko jarduera fisikoaren eta kirolaren antolaketa ikastetxeen bitartez egituratuko da funtsean, kirol-kluben, kirol-elkarteen eta guraso-elkarteen lankidetzaz aktiboarekin.

2.- Kirol-federazioak izango dira, funtsean, eskatzen zaienean programa horiek antolatzeko eta gauzatzeko beharrezkoa den laguntza teknikoaz eta lankidetzaz arduratuko diren erakundeak.



3.- Udalerriek laguntza eskainiko die ikastetxeei eta lurralde historikoetako foru-organoei eskola-adineko jarduera fisikoko eta kiroleko programak gauzatzeko garaian. Horretarako, doan lagako dute udaleko kirol-ekipamenduen erabilera, ikasleek beren instalazioetan egindako kirol-jarduerak kontrolatuko dituzte, eta programak toki-mailan egituratuko dituzte.

II. KAPITULUA

UNIBERTSITATEKO JARDUERA FISIKOA ETA KIROLA

75. artikulua.- Unibertsitateen autonomia.

1.- Beren autonomiaren esparruan, unibertsitate publikoei zein pribatuei dagokie beren unibertsitate-esparruan jarduera fisikoa eta kirola antolatzea eta sustatzea, egokitzen hartzen dituzten irizpideei eta antolamendu-egiturari jarraikiz.

2.- Autonomia hori galarazi gabe, kirol-arloan eskumena duen Autonomia Erkidegoko Administrazio Orokorreko Sailak Autonomia Erkidegoan kokatutako unibertsitateen artean egiten diren lehiaketako kirol-jarduerak koordinatzeko beharrezkoak diren gidalerroak zehaztuko ditu. Horretarako, eta Jarduera Fisikoaren eta Kirolaren Euskal Kontseiluaren barruan, Unibertsitate Kirolaren Euskal Azpibatzordea aholkularitza, kontsulta, jarraipen eta eztabaidako organoa izango da, eta haren osaera, izendapen-sistema, funtzionamendu-araubidea eta funtzioak erregelamenduz ezarriko dira.

76. artikulua.- Programak.

1.- Jarduera fisikoko eta kiroleko unibertsitate-programek desgaitasuna duten unibertsitateko ikasleen integrazioa sustatu beharko dute. Hori ezinezkoa denean, desgaitasuna duten pertsonen kolektiboentzako jarduera espezifikokoak aurreikusi beharko dira programetan.

2.- Unibertsitateko jarduera fisikoko eta kiroleko programen aurretik, genero-inpaktuaren ebaluazioa egin beharko da, unibertsitateko ikasleen arteko desberdintasun oro, generoari lotutako estereotipoak, azpimodalitate batzuen maskulinizazioa edo feminizazioa eta antzeko alderdiak behar bezala lantzeko. Programek, halaber, jardueretan jazarpenari aurrea hartzeko neurri espezifikokoak jaso beharko dituzte, eta behar bezala jaso beharko dute sexu-identitateari lotutako problematika.

77. artikulua.- Administrazio publikoen lankidetzak.



1.- Administrazio publikoek, beren eskumenen esparruan, unibertsitateekin lankidetzan jardungo dute unibertsitate-esparruan jarduera fisikoa eta kirola sustatzera zuzendutako programetan.

2.- Kirol-arloan eskumena duen Autonomia Erkidegoko Administrazio Orokorreko Zuzendaritzak bereziki lagundu beharko du unibertsitate arteko programetan.

III. KAPITULUA

LANBIDE-HEZIKETAKO JARDUERA FISIKOA ETA KIROLA

78. artikulua.- Jarduera fisikoaren eta kirolaren sustapena

1.- Lanbide-heziketako ikastetxeei dagokie beren esparruan jarduera fisikoa eta kirola sustatzea, egokitzat hartzen dituzten irizpideei eta antolamendu-egiturari jarraikiz.

2.- Administrazio publikoek, beren eskumenen esparruan, lanbide-heziketako ikastetxeekin lankidetzan jardungo dute esparru horretan jarduera fisikoa eta kirola sustatzera zuzendutako programetan.

79. artikulua.- Programak.

1.- Lanbide-heziketaren esparruan jarduera fisikoa eta kirola sustatzeko onartzen diren programek desgaitasuna duten pertsonen integrazioa sustatu beharko dute. Hori ezinezkoa denean, desgaitasuna duten pertsonen kolektiboentzako jarduera espezifikokoak aurreikusi beharko dira programetan.

2.- Lanbide-heziketaren esparruan jarduera fisikoa eta kirola sustatzeko onartzen diren programek genero-inpaktuaren ebaluazio bat izan beharko dute, ikasleen arteko desberdintasun oro, generoari lotutako estereotipoak, azpimodalitate batzuen maskulinizazioa edo feminizazioa eta antzeko alderdiak behar bezala lantzeko. Programek, halaber, jardueretan jazarpenari aurrea hartzeko neurri espezifikokoak jaso beharko dituzte, eta behar bezala jaso beharko dute sexu-identitateari lotutako problematika.

VIII. TITULUA

IKERKETA, BERRIKUNTZA ETA KIROL-TEKNIKARIEN PRESTAKUNTZA BOLUNTARIOAK

80. artikulua.- Ikerketa eta berrikuntza.



Jarduera fisikoaren, kirolaren, hezkuntzaren, teknologiaren eta garapen ekonomikoaren arloan eskumena duten Autonomia Erkidegoko Administrazio Orokorreko Sailek jarduera fisikoaren eta kirolaren zientzien esparruko ikerketa- eta berrikuntza-jarduketak bultzatzeko, garatzeko eta gauzatzeko aukera sustatuko dute, eta beste administrazio publiko batzuekin, unibertsitateekin, profesionalen elkargoekin eta kirolaren arloko hainbat entitate eta agenterekin lankidetzan aritzeko formulak ezarriko dituzte.

81. artikulua.- Jarduera Fisikoaren eta Kirolaren Euskal Eskola.

1.- Jarduera Fisikoaren eta Kirolaren Euskal Eskola kirol-arloan eskumena duen Autonomia Erkidegoko Administrazio Orokorreko Sailari atxikita dagoen administrazio-zerbitzu bat da, eta honako funtzio hauek ditu esleituta:

- a) Jarduera fisikoari eta kirolari lotutako prestakuntzen arloko sail arteko koordinazioa egitea.
- b) Teknikarien, epaileen eta zuzendarien prestakuntza-programak planifikatzea eta koordinatzea.
- c) Ikerketa- eta berrikuntza-programak sustatzea eta bultzatzea.
- d) Jarduera fisikoaren eta kirolaren esparruko prestakuntza-ekintzei buruzko informazio-plataforma elektronikoa osatu, sistematizatu eta eguneratu bat sortzea eta kudeatzea.
- e) Jarduera fisikoaren eta kirolaren arloko azterlanak zabaltzea.
- f) Jarduera fisikoaren eta kirolaren esparruari buruzko dokumentazio-zerbitzu bat antolatzea.
- g) Etengabeko prestakuntzako eta kirol-teknifikazioko ikastaroak, mintegiak, hitzaldiak eta programak antolatzea edo egitea.
- h) Kirol-federazioei eta beste zentro batzuei prestakuntza-programen inguruko aholkularitza eskaintzea.
- i) Kirol-federazioek eta gainerako prestakuntza-zentro publiko eta pribatuek prestakuntza-programetan genero-ikuspegia eta kirolaren integritateari, joko garbiari, errespetuari, inklusioari eta antzeko balioei lotutako edukiak txerta ditzaten sustatzea.
- j) Arauz esleitzen zaizkion beste guztiak.

2.- Jarduera Fisikoaren eta Kirolaren Euskal Eskolak sektore publikoko gainerako prestakuntza-zentroekin koordinatu beharko du giza baliabideak eta baliabide materialak optimizatzeko.

3.- Jarduera Fisikoaren eta Kirolaren Euskal Eskolak prestakuntza- eta informazio-programak sustatuko ditu kirol federatuaren, eskola-kirolaren, unibertsitate-kirolaren eta lehiaketa-izaerarik gabeko beste kirol-adierazpen batzuen esparruan. Programa horien eskaintza bi hizkuntza ofizialetan egingo da, baina, ahal bada, euskara lehenetsiko da 18 urtetik beherako pertsonei zuzendutako programetan.



4.- Jarduera Fisikoaren eta Kirolaren Euskal Eskolaren antolamendua, eskumenak eta funtzionamendua erregelamenduz finkatuko dira.

82. artikulua.- Kirol-boluntarioak.

1.- Lege honen ondorioetarako, herritarrek Euskal Autonomia Erkidegoko kirolaren jarduketa-eremuan boluntariotza-ekintzako programak ezartzearen bidez irabazi-asmorik gabeko erakundeek garatutako boluntariotza-ekintzetan era antolatuan parte hartzea hartuko da kirol-boluntariotzat; eta, hori guztia, boluntariotzaren arloko xedapen orokorretan xedatutakoaren esparruan.

2.- Kirol-arloan eskumena duen Autonomia Erkidegoko Administrazio Orokorreko Sailak kirol-boluntariotza sustatu eta bultzatuko du beste administrazio publiko batzuekin, eta, bereziki, toki-erakundeekin, unibertsitateekin, kirol-erakundeekin eta jarduera fisikoaren eta kirolaren esparruan boluntariotza-ekintzako programak garatzen dituzten eta Euskal Autonomia Erkidegoan kirol-boluntariotzan laguntzea, parte hartzea eta boluntariotza hori zabaltzea helburu duten beste batzuekin.

IX. TITULUA

KIROLARIENTZAKO LAGUNTZA ETA BABESA

I. KAPITULUA

XEDAPEN OROKORRAK

83. artikulua.- “Kirolari” kontzeptua.

Lege honen ondorioetarako, kirol-modalitate batean aritzen diren pertsona guztiak hartzen dira kirolaritzat.

84. artikulua.-Kirolariei lotutako atxikipen-eskubideak eta antzekoak.

1.- Autonomia Erkidegoan kokatutako erakundeen artean ezin izango da atxikipen, luzapen, prestakuntza eta konpentsazioko eskubiderik eta antzekorik eskatu hamasei urtetik beherako kirolariengatik.

2.- Hamasei urtetik gorako kirolarien kasuan eta aurreko atalean aurreikusi gabeko gainerako kasuetan, horrelako eskubideak ezarri ahal izango dira Eusko Jaurlaritzak alde aurretik araututako irizpide, baldintza, muga eta ondorioen arabera.



3.- Administrazio publikoek eta kirol-federazioek kirol-elkarteak oinarrizko kirolean lan garrantzitsua egitera bultzatzeko neurriak hartu beharko dituzte. Halaber, babes-neurriak hartu beharko dira, elkarte horiek oinarrizko kirola sustatzeko egin beharreko lan hori neurritz gainekoa izan ez dadin.

II. KAPITULUA

ARRISKUEN ESTALDURA ETA ERANTZUKIZUN ZIBILA

85. artikulua.- Botere publikoen betebeharra.

Botere publikoek, dagokien eskumen-esparruan, edozein kirol-jardueratan parte hartzen duten pertsonen eta hirugarrenen segurtasun egokia eta arriskuen estaldura bermatzeko bidezkoak diren arauak eta erabakiak hartuko dituzte.

86. artikulua.- Erantzukizun zibileko aseguruak.

1.- Kirol-zentroak ustiatzeko, kirol-jarduerak antolatzeko eta kirol-zerbitzuak emateko, ezinbestekoa izango da erantzukizun zibileko aseguru-kontratu bat egitea, erabiltzaileei, parte-hartzaileei eta beste edozeini instalazioen egoeraren edo bertan egindako jardueraren ondorioz eragin dakizkiekeen kalteei erantzuteko.

2.- Poliza horien gutxieneko estaldurak erregelamenduz finkatuko dira, instalazioen eta jardueren ezaugarrien arabera. Estaldura horiek onartzen ez diren bitartean, jendaurreko ikuskizunei eta jolas-jarduerei buruzko araudian ezarritakoak aplikatuko dira.

III. KAPITULUA

OSASUN-LAGUNTZA ETA KIROL-MEDIKUNTZA

87. artikulua.- Osasun-laguntza.

1.- Euskal Autonomia Erkidegoko herritarren kirol-jardun askeari lotutako osasun-laguntza osasun-sistema publikoak emango du bere kontura. Era



berean, Euskal Autonomia Erkidegoko esparruko lehiaketetan parte hartzen dutenen osasun-laguntza osasun-sistema publikoaren kontura emango da.

2.- Osasun-sistema publikoaren kontura emandako laguntza horretatik kanpo geratuko dira honako hauek:

- a) Kirol-medikuntzako zerbitzu espezializatuak.
- b) Estatuko eta nazioarteko kirol-lehiaketetan parte hartzeari lotutako osasun-laguntza.
- c) Azterketa medikoak egitea eta kirola egiteko gaitasunari eta egokitasunari buruzko txostenak eta ziurtagiriak egitea.
- d) Maila desberdineko kirolariak prestatzeko prozesuei lotutako plangintza, kontrol eta jarraipen medikoa.
- e) Kirolarien errehabilitazioa eta errekupeazio funtzionala kirol-lesioen ondoren, osasun-sistema publikoaren osasun-prestazioetatik kanpo geratzen direnean.

3.- Kirol-medikuntzako zerbitzuak jarduera fisikoaren eta kirolaren arloan eskumena duten administrazio publikoek finantzatuko dituzte, osorik edo zati batean.

88. artikulua.- Kirol-jardueren debekua eta osasunaren babesa.

Kirol-arloan eskumena duen Autonomia Erkidegoko Administrazio Orokorreko Sailaren Zuzendaritzak, pertsonen osasuna babesteko beharrari datxekion interes publikoari lotutako arrazoiak direla eta, oro har debekatu ahal izango du Autonomia Erkidegoan kirol-jarduera jakin batzuk antolatzea.

89. artikulua.-Jarduera fisikoaren eta kirolaren medikuntzaren esparruko ikerketa eta espezializazioa.

Euskal Autonomia Erkidegoko botere publikoek jarduera fisikoaren eta kirolaren medikuntzaren esparruko ikerketa eta espezializazioa sustatuko dute, honako helburu hauekin:

- a) Kirola egiteko gaitasun fisikoa behar bezala kontrolatzea, pertsonen osasuna babesteko.
- b) Pertsonen kirol-jarduerak egiteko orientazioa ematea.
- c) Kirolgileei lotutako arrazoiengatik edo kanpoko arrazoiengatik gerta daitezkeen kirol-istripuei aurrea hartzea.
- d) Kirolarien errendimendua hobetzea.

90. artikulua.-Kirol-medikuntzaren arloko funtzioak.



Kirol-arloan eskumena duen Autonomia Erkidegoko Administrazio Orokorreko Sailari honako funtzio hauek esleitu zaizkio:

- a) Goi-mailako kirolariei kontrol medikoak egitea.
- b) Kirol-medikuntzaren arloan ikertzea.
- c) Erakunde publiko eta pribatuei hainbat motatako kirol-programak egiteko aholkularitza teknikoa ematea, goi-mailako kirolari dagokionez bereziki.
- d) Kirol-medikuntzari lotutako irakaskuntza-jardueretan laguntzea, kirol-teknikarien prestakuntzaren esparruan batez ere.
- e) Eusko Jaurlaritzak erregelamenduz esleitzen dizkion funtzio guztiak.

91. artikulua.-Azterketa medikoak eta kirolariaren osasun-txartela.

Azterketa medikoen datuak eta kirolarien osasunari buruzko beste informazio batzuk kirolariaren osasun-txartelean txertatuko dira, erregelamenduz ezarritako baldintzetan.

X. TITULUA

GOI-MAILAKO KIROLA

92. artikulua.- Interes publikoa.

Goi-mailako kirola interes publikokotzat hartuko da, funtsezko faktorea baita Euskal Autonomia Erkidegoko kirolaren garapenean, oinarrizko kirola sustatzeko eragingarri gisa duen garrantziagatik eta Estatu eta nazioarteko kirol-lehiaketa ofizialetan betetzen duen ordezkartza-funtzioagatik.

93. artikulua.- Goi-mailako kirolaren antolamendua eta sustapena.

1.- Eusko Jaurlaritzak antolatuko du goi-mailako kirola Euskal Autonomia Erkidegoan, Basque Team Fundazioaren laguntza teknikoarekin.

2.- Eusko Jaurlaritzak, Jarduera Fisikoaren eta Kirolaren Euskal Kontseiluaren txostena jaso ondoren eta bidezko federazioen parte-hartzearekin, goi-mailako kirolariak, epaileak eta teknikariak kalifikatu ahal izateko irizpideak eta baldintzak ezarriko ditu.

3.- Goi-mailako kirolaren sustapena administrazio publiko guztiek lanaren, funtzio publikoaren, hezkuntzaren eta kirol-ekipamenduen arloetako eta lotutako beste arlo batzuetako eskumenen esparruan duten erantzukizuna da.



94. artikulua.- Laguntza-programak.

1.- Kirol-arloan eskumena duen Autonomia Erkidegoko Administrazio Orokorreko Sailak goi-mailako kirola babesteko onartzen dituen programek profesionalak ez diren kirolariei emango diete lehentasuna, eta beren funtsezko helburua goi-mailako kalifikazioa lortzen duten kirolariei, epaileei eta teknikariei beren kirol-prestakuntzarako baliabide egokiak eta erabateko gizarte- eta lanbide-integrazioa errazteko laguntza zientifikoa, hezkuntza-arlokoa eta medikoa ematea eta bestelako neurriak hartzea izango da.

2.- Goi-mailako kirola babesteko programek, halaber, desgaitasuna duten eta beren izaerari dagokion lehiaketa-elitean parte hartzen duten kirolarientzako laguntzak jasoko dituzte.

3.- Programa horiek foru-aldundiek etorkizun handiko kirolariei laguntzeko onartutako planekin osatuko dira. Lege honen ondorioetarako, kirol-arloan eskumena duen Autonomia Erkidegoko Administrazio Orokorreko Sailak onartutako goi-mailako kirolarien zerrendan ez badaude ere maila horretara iristeko oinarri handiko aurreikuspenak dituzten kirolariak hartuko dira etorkizun handiko kirolaritzat.

4.- Lege honen ondorioetarako, beren kirol-ibilbideagatik edo beren kirol-emaitzengatik lehiaketak egiteko goi-mailara iristeko bereziki hurbil dauden etorkizun handiko kirolariak hartuko dira talentuko kirolaritzat. Lurralde historikoetako foru-organoei eta kirol-arloan eskumena duen Autonomia Erkidegoko Administrazio Orokorreko Zuzendaritzak elkarrekin lankidetzan jardungo dute talentuko kirolari horiek goi-mailako kirolariek jasotzen dituzten prestazio batzuk lortu ahal izan ditzaten.

5.- Goi-mailako kirola babesteko programak bultzatu nahi dituzten udalerriek bikoiztasunik ezaren eta finantza-jasangarritasunaren baldintzak betetzen direla justifikatu beharko dute txosten batean, Euskadiko Toki Erakundeei buruzko apirilaren 7ko 2/2016 Legearen 16.7 artikuluan ezarritakoari jarraikiz.

6.- Goi-mailako emakume kirolariek goi-mailako kirolari gisa dituzten eskubideak gordeko dituzte haurdunaldian eta ama izan ondoren, erregelamenduz ezarritako baldintzetan.

95. artikulua.- Goi-mailako kirolariak aholkatu, ebaluatu eta kontrolatzeko zerbitzuak.

Kirol-arloan eskumena duen Autonomia Erkidegoko Administrazio Orokorreko Sailak goi-mailako kirolariak aholkatu, ebaluatu eta erabat kontrolatzeko zerbitzuak emango ditu, erregelamenduz ezartzen diren baldintzetan.



96. artikulua.- Goi-mailako kirol-zentroak.

Goi-mailako kirolariak prestatzeko, kirol-arloan eskumena duen Autonomia Erkidegoko Administrazio Orokorreko Sailak, zuzenean edo erakunde publiko eta pribatuekin egindako hitzarmenen bitartez, goi-mailako kirol-zentroen sorkuntza eta funtzionamendua bultzatuko du. Teknikazio-programak eta entrenamendu-plan bereziak kirol-zentroek egingo dituzte, kirol-federazioen laguntzarekin. Programa horiek kirol-arloan eskumena duen Autonomia Erkidegoko Administrazio Orokorreko Sailak baimendu beharko ditu.

97. artikulua.- Goi-mailako kirolerako ekipamendu-plana.

Kirol-arloan eskumena duen Autonomia Erkidegoko Administrazio Orokorreko Zuzendaritzak nagusiki goi-mailako kirolera zuzendutako kirol-ekipamenduen arloko premiei eta lehentasunei erantzuteko plan bat landu beharko du aldizka.

98. artikulua.- Goi-mailako kirolarien onurak.

Goi-mailako kirolariaren kalifikazioak honako onura hauek lortzeko aukera emango du:

- a) Laguntza ekonomikoak jasotzea.
- b) Teknika hobetzeko zentroen programetan eta goi-mailako kirol-zentroen kirol-programetan sartzea.
- c) Kalifikazio hori administrazio publikoetan kirol-jarduerari lotutako lanpostuak eskuratzeko meritu ebaluagarritzat hartzea.
- d) Unibertsitate-ikasketak edo unibertsitateaz kanpokoak egiteko plaza kopuru gehigarri bat gordetzea, betiere beharrezkoak diren baldintza akademikoak betetzen badira.
- e) Ikasketak eta kirol-jarduera bateragarri egiteko neurri akademiko bereziak hartzea.
- f) Kirol-teknikarien tituluak lortzera bideratutako ikasketak egin ahal izateko probetarako erregelamenduz finkatzen diren baldintzetatik salbuetsita geratzea.
- g) Eusko Jaurlaritzak erakunde publiko edo pribatuekin kirolariak laneratzeko izenpetzen dituen hitzarmenen ondoriozko onura guztiak.
- h) Eusko Jaurlaritzak arauz ezartzen dituen onura guztiak.

99. artikulua.-Goi-mailako kirolariaren estatutua.

Eusko Jaurlaritzak, kirol-federazioen eta Jarduera Fisikoaren eta Kirolaren Euskal Kontseiluaren aholkularitzarekin, goi-mailako kirolarientzako estatutu bat onartuko du.



100. artikulua.- Enplegu-baldintzak.

1.- Botere publikoek goi-mailako kirolariei beren entrenamenduarekin eta lehiaketa ofizialetako parte-hartzearekin bateragarriak izango diren enplegu-baldintza batzuk ematera bideratutako xedapenak eta erabakiak hartzea bultzatuko dute.

2.- Administrazio publiko guztiek meritu ebaluagarritzat hartuko dute goi-mailako kirolariaren kalifikazioa, dagokion kirol-jarduerari lotutako plazak lortzeko hautespen-probetan zein jarduera horri lotutako lanpostuak betetzeko lehiaketetan, betiere meritu espezifikoa balorazioa aurreikusita badago.

XI. TITULUA

KIROL-EKIPAMENDUAK ETA KIROL-ZERBITZUAK

101. artikulua.- Plangintza.

1.- Euskal Autonomia Erkidegoan, kirol-ekipamenduen plangintza lurralde-antolamenduko eta hiri-antolamenduko bidezko tresnen bitartez egingo da. Plangintza hori egitean, arreta berezia eskainiko zaie kirol-arloko irizpide teknikoiei.

2.- Adierazitako tresnak lantzean, honako printzipio hauek hartuko dira kontuan:

- a) Aisialdi- eta kirol-eremuen eta kirolgune ez-konbentzionalen sorkuntza eta mantentzea bermatuko beharko dute, herritar guztiek kirola egin ahal izan dezaten.
- b) Herritarrek jarduera fisikoa egin ahal izateko guneen sorkuntzari eta kirol anitzeko ekipamenduen aurreikuspenari eman beharko diete lehentasuna.
- c) Inbertsioak azpiegitura-defizitik handieneko eremuetara bideratu beharko dituzte, eremu funtzional gisa lurralde-oreka bat lortzeko. Ildo horretan, biztanlegune handiei zerbitzuak emateko moduko udalaz gaindiko kirol-azpiegiturak bultzatu beharko dituzte.
- d) Kirol-instalazioak ikastetxeei hertsiki lotuta dimentsionatu eta kokatu beharko dituzte.
- e) Genero-ikuspegia eta kirolgune seguruak bermatu beharko dituzte, emakumeentzat bereziki.

102. artikulua.- Ikastetxeetako kirol-ekipamenduak.



1.- Hezkuntza-administrazioak, zentro pribatuekin eta udalerriekin lankidetzan, ikastetxeetako eta unibertsitateetako kirol-ekipamenduak kirol anitzekoak izan daitezzen eta eskola-orduetan zein ordu horietatik kanpo erabiltzeko aukera bermatuko duten giza baliabideak eduki ditzaten sustatuko du.

2.- Hezkuntza-administrazioak sustatuko du unibertsitateak, nolana ere, unibertsitate-komunitateak jarduera fisikoa eta kirola egiteko beharrezkoak diren kirol-ekipamenduez eta zerbitzu osagarriez hornituta egon daitezzen.

103. artikulua.- Kirol-ekipamenduen arloko politika publikoak.

1.- Eusko Jaurlaritzari dagokio Autonomia Erkidegoaren intereseko kirol-ekipamenduen arloko kirol-politikaren esparru orokorra zehaztea.

2.- Lurralde-plan partzialak eta lurralde-plan sektorialak izango dira kirol-ekipamenduen lurralde-ezarpenaz arduratu beharko duten lurralde-antolamenduko tresnak.

104. artikulua.- Kirol-ekipamenduak eta desgaitasuna duten pertsonak.

Kirol-ekipamenduek, irisgarritasun-arloko araudia betetzeaz gain, desgaitasuna duten kirolariek behar bezala erabiltzeko diseinatuta eta hornituta egon beharko dute.

105. artikulua.- Kirol Ekipamenduen Lurralde Plan Sektoriala.

1.- Lurralde historikoetako foru-organismoek, lurralde historiko bakoitzaren premien eta berezitasunen arabera, eskumena izango dute Lurralde Antolamenduaren Gidalerroak garatuz kirol-ekipamenduen lurralde-plan sektorialak onartzeko, honako helburu hauekin:

- a) Dagokion lurralde historikoko udalerrri eta eskualde guztiak banan-banan aztertu ondoren, oinarritzko kirol-ekipamenduen mapa bat taxutzea.
- b) Oinarritzko kirol-ekipamendua lortu ondoren, prozesua osatzea, kirol-ekipamenduen sare egoki bat edukitzeko.
- c) Ereku bakoitzeko ekipamenduen eraikuntza sustatzea eta kirol-zerbitzuen kudeaketa mankomunatua bultzatzea.

2.- Halaber, foru-organo horiek eskumena izango dute plan horiek burutzeko beharrezkoak diren finantzaketa-planak onartzeko.

106. artikulua.- Kirol-ekipamenduen udal-planak.



Udalerriek kirol-instalazioen arloko plangintza-tresnak onartu beharko dituzte, kirol-ekipamenduen lurralde-plan sektorialetan jasotako gidalerroei jarraikiz.

107. artikulua.- Ingurune naturaleko kirol-jarduera arriskutsuak.

Eusko Jaurlaritzak, hala badagokio, ingurune naturalean abenturazko kirol-jarduerak edo kirol-jarduera arriskutsuak antolatzeke erregelamenduzko xedapen berezi bat onartuko du.

108. artikulua.- Kirol-ekipamenduen erroldak.

1.- Kirol-arloan eskumena duen Autonomia Erkidegoko Administrazio Orokorreko Sailak, lurralde historikoetako foru-organismoek eta udalerriek beren lurralde-esparruetako kirol-ekipamendu publiko eta pribatuen errolda bat egin beharko dute, eta gutxienez bost urtean behin eguneratu beharko dute, Eusko Jaurlaritzak erregelamendu bidez onartuko dituen irizpide komun batzuei jarraikiz.

2.- Lurralde historikoetako foru-organismoek lurralde historiko bakoitzeko datuen eguneratzea koordinatuko dute udalerriekin, kirol-arloan eskumena duen Autonomia Erkidegoko Administrazio Orokorreko Sailak horretarako onartzen duen plataforma elektronikoaren bidez.

3.- Kirol-ekipamendu horien titularrak diren erakunde publiko eta pribatuek dagokion errolda egiteko eta eguneratzeko eskatzen dizkieten datu guztiak eman beharko dituzte horretarako antolatutako plataforma elektronikoaren bitartez.

109. artikulua.- Segurtasun-neurriak eta osasuna babesteko neurriak.

1.- Kirol-ekitaldien antolatzaileek eta kirol-instalazioen jabeek beharrezkoak diren segurtasun-neurriak bermatu beharko dituzte kirol-esparruetan, ikuskizun publikoen eta jolas-jardueren arloan legez eta erregelamenduz ezarritakoari jarraikiz. Aurrekoa gorabehera, Eusko Jaurlaritzak kirol-ekipamendu eta kirol-ekitaldi berezien arloan beharrezkoak diren egokitzapenak ezarri ahal izango ditu erregelamendu bidez.

2.- Kirol-ekipamenduen titularrak diren administrazio publikoek eta kirol-ekitaldien antolatzaileek kirolarien eta kirol-ikuskizunetan parte hartzen duen edo ikuskizun horietara joaten den edonoren osasunerako kaltegarriak diren zarata-mailak eragiten dituzten objektuak mugatzeko beharrezkoak diren xedapenak hartuko dituzte.



XII. TITULUA

INDARKERIAREN, ARRAZAKERIAREN, XENOFIARIAREN ETA INTOLERANTZIAREN PREBENTZIOA JARDUERA FISIKOAN ETA KIROLEAN

110. artikulua.- Jarduera fisikoan eta kirolean indarkeriari, arrazakeriari, xenofobiari eta intolerantziari aurre egiteko Azpibatzordea.

1.- Jarduera fisikoan eta kirolean indarkeriari, arrazakeriari, xenofobiari eta intolerantziari aurre egiteko Azpibatzorde bat egongo da, eta Jarduera Fisikoaren eta Kirolaren Euskal Kontseiluaren mende egongo da organikoki.

2.- Azpibatzordearen funtzioak honako hauek izango dira:

a) Jarduera fisikoan eta kirolean agertzen den indarkeriari, arrazakeriari, xenofobiari eta intolerantziari buruzko datuak urtero biltzea eta argitaratzea.

b) Jarduera fisikoan eta kirolean agertzen den indarkeriaren, arrazakeriaren, xenofobiaren eta intolerantziaren arrazoiei eta ondorioei buruzko txostenak eta azterlanak egitea.

c) Prebentzio-ekintzak sustatzea, emakumeen aurkako indarkeriaren esparruan eta sexu-jazarpenaren edo sexuan oinarritutako jazarpenaren esparruan bereziki.

d) Kirol-arloko klub, elkarte eta federazioentzako, kirol-lehiaketak antolatzen dituzten gainerako erakunde edo pertsonentzako eta kirol-instalazioen titularrentzako gomendioak egitea.

e) Kirol-lehiaketen, kirol-diziplinaren eta kirol-instalazioen arloko xedapen-proiektuei buruzko informazioa ematea.

f) Jarduera fisikoari eta kirolari lotutako indarkeria, arrazakeria, xenofobia eta intolerantzia desagerrarazten lagunduko duten beste funtzio guztiak.

3.- Azpibatzordea arlo horretan eskumenak dituzten administrazio publikoak, kirol-erakundeak eta ospe handiko pertsonak ordezkatzeko dituzten pertsonen osatuta egongo da. Haren osaera, kideen izendapena eta funtzionamenduarabidea erregelamendu bidez finkatuko dira.

111. artikulua.- Kiroleko indarkeriaren, arrazakeriaren, xenofobiaren eta intolerantziaren arloko helburuak eta neurriak.

1.- Euskal Autonomia Erkidegoan jarduera fisikoaren eta kirolaren esparruan esku hartzen duten pertsona eta erakunde guztiek errespetuaren, tolerantziaren eta joko garbiaren balioak eta jarduera fisikoari lotutako gainerako balio positibo



guztiak sustatu beharko dituzte, eta aktiboki inplikatuko dira indarkeria, arrazakeria, xenofobia eta beste intolerantzia mota oro desagerrarazteko lanean.

2.- Euskal Autonomia Erkidegoko Administrazioak, sail eskudunen bitartez eta kirolaren, segurtasunaren eta berdintasunaren arloan bereziki, jarduera fisikoan eta kirolean ager daitekeen indarkeria, arrazakeria, xenofobia edo intolerantzia mota orori aurrea hartzeko eta aurre egiteko politika aktibo bat garatuko du.

3.- Kirol-arloan eskumena duen Autonomia Erkidegoko Administrazio Orokorreko Sailak honako neurri hauek hartuko ditu prebentzioaren esparruan:

a) Kirol-jokabidea, joko garbia, errespetua, genero-berdintasuna eta gizarte-integrazioa sustatuko dituzten publizitate-kanpainak egitea, gazteentzat bereziki.

b) Joko garbia eta kirolari lotutako eta Legearen titulu honetan bildutako gainerako balio positiboak bultzatuko dituzten sarietarako deialdiak egitea.

c) Aurkariak diren kirolarien edo zaleen arteko bizikidetzak eta senidetze-ekintzak bultzatzea, proben edo partiden aurretik giro positibo bat sortzeko (elkarrekin egindako jardueren edota keinu sinbolikoen bidez).

d) Teknikariak prestatzeko programetan, balioetan oinarritutako prestakuntzarekin eta indarkeriaren, arrazakeriaren, xenofobiaren eta beste intolerantzia mota ororen aurkako borrokarekin zuzenean lotuta dauden edukiak txertatzea.

e) Indarkeriari, xenofobiari eta ezaugarri edo zirkunstantzia pertsonalak, sozialak eta generoari edo sexu-identitateari lotutakoak direla eta sortutako beste edozein diskriminazio motari aurre egiteko kanpainen eta neurrien ezarpena eta garapena kirol-erakundeei laguntza ekonomikoak emateko irizpide gisa kontuan hartzea.

XIII. TITULUA

KIROL-ARLOKO DIZIPLINA-ARAUBIDEA

112. artikulua.- Aplikazio-esparrua.

1.- Kirol-arloko diziplina-araubidea joko-arauen, lehiaketa-arauen eta kirol-arau orokorren arau-haustek hartzen ditu eraginpean.

2.- Jokoa edo lehiaketa egiten den bitartean haren garapen normala kaltetzen, eragozten edo nahasten duten ekintzak edo ez-egiteak izango dira joko-arauen edo lehiaketa-arauen arau-haustek.

3.- Arau horietan xedatutakoaren aurkako gainerako ekintzak edo ez-egiteak izango dira kirol-arau orokorren arau-haustek.



4.- Kirol-klubek beren kideen gainean duten diziplina-ahalak bere arau propioei jarraituko die, izaera pribatua du, eta ezin izango da haren aurkako errekurtsorik jarri kirol-federazioetan eta Kirol Justiziako Euskal Batzordean.

5.- Estatuko eta nazioarteko kirol-lehiaketetan egindako arau-hausteen kasuan, Estatuko eta nazioarteko diziplina-arauei jarraituko zaie, hurrenez hurren.

6.- Kirol-arloko diziplina-araubidea gorabehera, erantzukizun zibilak, penalak edo beste mota batekoak bere arau propioei jarraituko diete.

113. artikulua.- Diziplina-ahala.

1.- Kirol-arloko diziplina-ahala organo jakin batzuei beren kirol-diziplinari lotuta dauden pertsonak ikertzeko eta, hala badagokio, zehatzeko esleitzen zaien ahalmena da.

2.- Honako hauei dagokie kirol-arloko diziplina-ahala baliatzea:

- a) Kirol-federazioei, pertsona fisiko edo juridiko, zuzendari eta lotura bereziko harreman bat duten gainerako pertsona guztien gainean.
- b) Eskola-kirolaren eta unibertsitate-kirolaren esparruan eskumena duten organoei, parte-hartzaileen gainean.
- c) Kirol Justiziako Euskal Batzordeari, aurreko pertsona eta erakunde beren gainean.

3.- Probak edo partidak zuzentzeko ahalmena (epaileei esleitzen zaiena eta kirol-modalitate bakoitzeko arau teknikoak aplikatzearen bidez burutzen dena) baliatzea ez da kirol-arloko diziplina-ahalaren baliatzetzat hartuko.

114. artikulua.- Diziplina-prozedurak: motak. Ordezko araubidea.

1.- Diziplina-erantzukizunei ohiko prozeduraren eta ezohiko prozeduraren bidez egingo zaie aurre.

2.- Nolanahi ere, hutsunerik izanez gero, zehapen-prozedura administratiboa arautzen duen Estatuko legeria aplikatuko da, ordezko gisa, kirol-arloko diziplina-prozeduretan.

115. artikulua.- Ohiko prozedura.

1.- Ohiko prozedura lehentasunaren eta sumariotasunaren printzipioetan oinarrituta dago, eta garapen normala bermatzeko diziplina-organoen berehalako esku-hartzea beharrezkoa denean aplikatuko da. Prozedura hori,



zehazki, jokatzean egin diren eta arbitroaren aktan, haren eranskinetan edo federazio-txosten ofizialetan agertzen diren arau-hauste guztiak epaitzeko eta, hala badagokio, zehatzeko aplikatuko da, betiere parte-hartzaileei jakinarazten bazaizkie edota partidak edo probak amaitu eta hogeita lau orduko epean haien eskura jartzen badira.

2.- Ohiko prozedurak ez du hasteko erabaki formalik behar, eta interesdunei entzuteko betebeharra betetzeko izapide laburtu bat jasoko du. Entzunaldi-izapide hori automatikoa da, eta ez da beharrezkoa diziiplina-organoak alde zurretik errekerimendua egitea.

116. artikulua.- Ezohiko prozedura.

1.- Ezohiko prozedura aurreko artikulua barnean hartu gabeko kasu guztietan aplikatuko da.

2.- Ezohiko espedientea ebazteko, sei hilabeteko epea egongo da, eta, hori igaro ondoren, iraungi egingo da.

3.- Kirol-arloko diziiplina-ahala ezohiko administrazio-prozedura bidez baliatzean, nolana ere, instrukzio-fasea eta zehapen-fasea bereizi beharko dira, eta organo desberdinak arduratuko dira fase horietaz.

117. artikulua.- Ezohiko prozeduran espedienteari hasiera ematea.

1.- Ezohiko prozeduran, espedientea, nolana ere, ofizioz hasiko da, organo eskudunak erabakita.

2.- Espedientearen hasiera norberaren ekimenez, kirol-arloan eskumena duen Autonomia Erkidegoko Administrazio Orokorreko Zuzendaritzaren komunikazioaren ondorioz, beste administrazio-organo batzuen eskaera arrazoitu bidez edota salaketa bidez erabaki ahal izango da.

3.- Hasteko eskumena esleituta duen organoak prozeduraren xede diren zirkunstantziak, jokabideak edo gertakariak zuzenean edo zeharka ezagutzearen ondoriozko jarduna hartuko da norberaren ekimentzat.

4.- Prozedura hasteko eskumenik ez duen eta ustekabean edota ikuskapen, miaketa edo ikerketako funtzioak esleituta izateagatik prozeduraren xede diren zirkunstantzien, jokabideen edo gertakarien berri izan duen edozein organok prozedura hasteko egindako proposamena hartuko da eskaera arrazoituztat.



5.- Edozein pertsonak, betebeharrak bat betetzean edo ez, diziplina-organo bati administrazio-prozedura bat ofizioz hasita justifikatu lezakeen gertakari jakin baten berri ematea hartzen da salaketatzat.

6.- Salaketetan, aurkezten dituen pertsonaren (edo pertsonen) identitatea eta diziplina-organoari jakinarazten zaizkion gertakarien kontaketa adierazi beharko dira. Gertakari horiek diziplinazko arau-haustea izan daitezkeenean, haien datuak jasotzeko beharko da, eta, ahal denean, ustez erantzukizuna duten pertsonen identifikazioa ere bai.

7.- Salaketa bat aurkezteak ez dio, berez, interesdunaren izazera ematen pertsona edo erakunde salatzaileari kirol-arloko diziplina-prozeduran.

118. artikulua.- Eskola-kirolaren eta unibertsitate-kirolaren esparruko diziplina-xedapenak.

Eusko Jaurlaritzak (eskola-kirolaren eta unibertsitate-kirolaren esparruan) eta Euskal Autonomia Erkidegoko kirol-federazioek diziplina-erregelamenduak onartzeko dituzte. Erregelamendu horietan, honako alderdi hauek jasotzeko beharko dira:

- a) Arau-hausteen sistema tipifikatua, arau-haustek astuntasunaren arabera mailakatuko dituenak.
- b) Zehapen-sistema, arau-hausteen erantzukizuna arindu edo larriagotzeko duten zirkunstantziak eta diziplina-erantzukizuna iraungitzeko baldintzak.
- c) Honako hauek bermatuko dituzten zenbait arau: gertakari berengatik zehapen bikoitzik ez ezartzea, zehapenen proportzionaltasuna, arauen atzeraeragina erruztatuaren aldekoak direnean, eta egin aurretik tipifikatu gabeko arau-hausteengatik zehatzeko debekua.
- d) Zehapenak ezartzeko diziplina-prozedurak.
- e) Emandako ebazpenen aurkako errekurtsio-sistema.

119. artikulua.- Arau-hauste motak eta tipifikazioa.

1.- Kirol-arloko diziplinazko arau-haustek oso astunak, astunak eta arinak izan daitezke.

2.- Titulu honetan deskribatutako arau-hausteez gain, erakundearen erregelamenduek, Lege honetan eta bere arauzko garapenean ezarritako printzipio eta irizpide orokorrekin jarraituz, arau-hauste oso astunak, astunak eta arinak diren jokabideak tipifikatu ahal izango dituzte, kirol eta erakunde bakoitzaren berezitasunen arabera.

3.- Lege hau garatzen duten erregelamenduzko xedapenak, halaber,



zehaztapenak edo mailakatzeak sartu ahal izango dituzte Lege honetan ezarrita dauden arau-hausteen koadroan. Zehaztapen eta mailakatze horiek ez dute arau-hauste berririk sortuko, ez dituzte aldatuko Legean jasotzen diren arau-hausteen izaera edo mugak, eta jokabideak hobeto identifikatzen lagunduko dute.

120. artikulua.- Arau-hauste oso astunak.

Edozein kasutan, arau-hauste oso astuntzat hartuko dira honako hauek:

a) Jaiotza, arraza, sexu, orientazio sozial, genero-identitate, erlijio eta iritziagatik edo beste edozein ezaugarri edo zirkunstantzia pertsonal edo sozialengatik jazarpena edo diskriminazioa dakarten, jarduera fisikoetan eta kirol-jardueretan aritzeko eta parte hartzeko aukera eragozten edo larriki zailtzen duten edota kirol-instalazioak erabiltzeko aukera eragozten edo larriki zailtzen duten portaerak.

b) Kirol-instalazioetan edo haietarako sarbideetan desordena publikoetan parte hartzea, pertsonen edo ondasunen arrisku larriak eragin diezazkienean.

c) Jarduera fisikoaren eta kirolaren esparruan indarkeria, arrazakeria, xenofobia eta intolerantziarako ekintzak eta emakumeen duintasunaren aurkako ekintzak antolatu, bultzatu, erraztu, estali, defendatu edo sustatzea eta haietan parte hartzea.

d) Aurreko letran deskribatutako emaitza duten kantikak abestea.

e) Kirol-instalazioetan indarkeria, arrazakeria, xenofobia eta intolerantziarako portaerak bultzatzen edo sustatzen dituzten edota emakumeen duintasunaren aurkako portaerak bultzatzen edo sustatzen dituzten pankartak, sinboloak, ikurrak edo legendak erakustea.

f) Aurreko letran adierazitako ekintzak saihesteko arauak, instrukzioak edo neurriak borondatez eta ezagueraz ez betetzea.

g) Kirol-lehiaketak egiten diren instalazioetan edozein arma mota, parte-hartzaileei edo ikusleei arrisku larria eragin diezaiekeen edozein objektu mota, bengalak, petardoak edo adierazitako arriskua dakarren beste edozein elementu sartzea, eramatea edo erabiltzea.

h) Jarduera fisikoan eta kirolean indarkeriara, arrazakeriara, xenofobiara edo intolerantziara larriki bultzatzen duten adierazpenak eta ekintzak, eta emakumeen duintasunaren aurkakoak.

i) Kirol-organoen eskudantziak edo eskumenak legez kontra usurpatzea.

j) Kirol-erakundeetako gobernu, administrazio, hauteskunde edo diziplinako organoetako kideen betebeharren ez-betetze oso larria.

k) Kirol-instalazioen segurtasunari eta higienerari lotutako kirol-arauak ez betetzea, instalazio horietara joaten direnentzat oso arrisku larria dakarrenean.

l) Kirol-erakundeen estatutuetako eta erregelamenduetako arauak eta erabakiak behin eta berriz eta nabarmenki ez betetzea.



m) Kirol-kargu bat betetzeagatik ezagutzen diren datu eta informazioen konfidentzialtasuna gordetzeko betebeharra edo sekretuak urratzea.

n) Segurtasunari eta arriskuen estaldurari buruzko arauak betetzen ez dituzten kirol-jarduerak antolatzea, jarduera egiteak hirugarrenentzat oso arrisku larriak dakartzanean.

o) Kirol-jardueretan osasun-arloko profesionalak edo baliabideak egoteko betebeharra ez betetzea.

p) Epaileak, kirolariak, teknikariak, kirol-agintariak eta kirol-ekitaldietan esku hartzen duten beste pertsona batzuk larderiak, hertsatzea edo haiei erasotzea.

q) Sexu-jazarpena, sexuan oinarritutakoa edo sexu-identitatean oinarritutakoa.

r) Aurreko letretan adierazi ez diren eta bereziki larriak diren kirol-esparruko indarkeria, arrazakeria, xenofobia eta intolerantziako ekintzak eta emakumeen duintasunaren aurkako ekintzak.

s) Autoritate-abusua eta arauak kirol-organoei esleitzen dizkieten eskumenak edo ahalmenak baliatzean agertutako edozein gehiegikeria.

t) Partida, proba edo lehiaketa bat egitea eragozten duten edo aldi baterako edo behin betiko etetera behartzen duten protesta edo jarduketa kolektiboak edo kirol-legearen kontrako portaera oro.

u) Kirol Justiziako Euskal Batzordearen eta beste kirol-organo batzuen ebazpenak ez betetzea.

v) Justifikatutako arrazoirik gabe kirol-lizentziak ez ematea edo atzeratzea, betiere tartean asmo txarra badago.

w) Kirol-esparruko duintasunaren edo lotsaren aurkakoak diren ekintza nabariak eta publikoak egitea, bereziki larriak direnean.

x) Jokoaren edo lehiaketaren emaitza aurrez ezartzera bideratutako ekintzak edo ez-egiteak.

y) Proben edo lehiaketen emaitzaren iruzurrezko aldaketak, proba edo lehiaketa horiek egin aurretik akordio, larderia, prezio edo iruzurrezko beste edozein baliabideren bidez emaitzan eragitera bideratuta dauden edo helburu hori duten jokabideak barnean hartuta.

z) Kirol-ekipamenduko materiala arau teknikoaren aurka manipulatuzea edo aldatzea, proben emaitza alda daitekeenean edo pertsonen integritatea arriskuan jartzen denean.

aa) Kirol-lehiaketa batzuei lotuta egonik lehiaketa horien inguruko apustueta parte hartzea eta lehiaketa horietan iragarle-zerbitzuak edo antzekoak egitea.

bb) Kirol-erakundearen organoek ondarea administratu eta kudeatzeko arauak ez betetzea, ondarean kalte larria eragiten denean.

cc) Erregelamenduzko baldintzak ez betetzeagatik kirolarien bidegabeko zerrenda egitea, nahita egiten denean.

dd) Kirolarien, teknikarien edota kirol-lehiaketetan parte hartzen duen beste edozein pertsonaren nortasuna ordeztzea.

ee) Justifikaziorik gabe probetan, partidetan edo lehiaketetan ez agertzea eta lehiaketa, proba edo partida uztea, bereziki larria denean.



- ff) Arbitroaren ordainsariak behin eta berriz ez ordaintzea.
- gg) Arbitroaren aktak asmo gaiztoz idaztea, aldatzea edo manipulatztea.
- hh) Kirolariak, taldeak edo kirol-lehiaketetan parte hartzen duen beste edozein pertsona inskribatzeko datuak edo dokumentuak faltsutzea.
- ii) Diziiplina-organoei laguntzeko betebeharraren ez-betetze larria.
- jj) Arau-hauste astunengatik edo oso astunengatik ezarritako zehapenak urratzea.
- kk) Arau-hauste astunak behin eta berriz egitea.
- ll) Kautelazko neurrien ez-betetze larria.
- mm) Joko-arauen, lehiaketa-arauen edo kirol-arau orokorren edozein ez-betetze, arau-hauste astuntzat edo arintzat hartu ezin denean.
- nn) Kirol-federazioen estatutuetan edo erregelamenduetan izaera horrekin ezartzen direnak.

121. artikulua.- Arau-hauste astunak.

Edozein kasutan, arau-hauste astuntzat hartuko dira honako hauek:

- a) Aurreko artikuluan deskribatutako jokabideak, adierazitako astuntasun-zirkunstantziak agertzen ez direnean.
- b) Arau-hauste arin batengatik ezarritako zehapenak urratzea.
- c) Gobernu, administrazio, hauteskunde edo diziplinako organoetako kideek ez jardutea edo beren funtzioak bertan behera uztea, betebeharren ez-betetze oso larria ez denean.
- d) Justifikaziorik gabe euskal kirol-federazioen selekzioen deialdietara ez joatea.
- e) Deitutako kirolariak aurreko letran adierazitako selekzioen eskura ez jartzea.
- f) Justifikaziorik gabe kirol-lizentziak ez izapidetzea, ez ematea edo atzeratzea.
- g) Jokoaren, probaren edo lehiaketaren garapen normala oztopatzen duen protesta, ekitaldia etetea eragiten ez duenean.
- h) Epailleak, teknikariak, kirol-agintariak, kirolariak edo ikusleak iraintzea eta laidoztatzea.
- i) Epailen eta teknikarien berezko jarduerak beharrezkoa den titulaziorik edo baimenik gabe egitea.
- j) Arau-hauste arinak behin baino gehiagotan egitea.
- k) Ofizial gisa izendatutako kirol-arloko jarduerak, probak edo lehiaketak bidezko kirol-baimenik gabe antolatzea.
- l) Betetzen den funtzioarekin edo egiten den kirol-jarduerarekin bateraezintzat hartutako jarduera publikoak edo pribatuak egitea.
- m) Kirol-lehiaketa egiteko beharrezkoa den duintasunaren edo lotsaren aurkako jarduketa nabaria eta publikoa, arau-hauste oso astuna ez denean.



- n) Kirol-instalazioen segurtasunari eta higienerari lotutako federazio-arauak ez betetzea, instalazio horietara joaten direnentzat arrisku larririk ez dakarrenean.
- o) Kirol-lehiaketetako megafonia ofizialaren erabilerari buruzko arauak ez betetzea, helburua talde edo kirolari aurkariaren jarduketan eragin negatiboa izatea bada eta, betiere, arau-hauste oso astuna edo arina ez bada.
- p) Maskoten edo animazio-taldean jarduketa, horren asmoa proben edo partiden garapena eragozteko edo ikusleak portaera desegokiak egitera bultzatzea denean.
- q) Segurtasuneko indar eta kidegoei joateko ez eskatzea, probak edo partidak egitean ordena asalda daitekeela aurreikusten denean.
- r) Zelaira, kantzara edo proba edo partida egiten den lekura objektuak jaurtitzea, arau-hauste oso astuna edo arina ez denean.
- s) Partidetako ofizialen mahaien eta talde aurkariaren aulkien atzean musikako bandak edo taldeak, animazio-taldeak eta antzeko beste edozein talde kokatzea, helburu bakarra haien kirol-jardunean eragin negatiboa izatea denean.
- t) Kirol-erakundeen estatutuetako eta erregelamenduetako arauak eta erabakiak ez betetzea.
- u) Kirol-erakundeen organoek federazioaren ondarea administratu eta kudeatzeko arauak ez betetzea, ondarean kalte larria eragiten denean.
- v) Segurtasunari eta arriskuen estaldurari buruzko arauak betetzen ez dituzten kirol-jarduerak antolatzea, jarduera egiteak hirugarrenentzat arriskurik ez dakarrenean.
- w) Atxikipenari, nahitaezko luzapenari, prestakuntzari eta antzeko alderdiei lotutako eskubideen arloko debekua ez betetzea.
- x) Kirol-kargu bat betetzean sekretuak gordetzeko betebeharra edo konfidentzialtasun-betebeharra urratzea.
- y) Erregelamenduzko baldintzak ez betetzeagatik kirolarien bidegabeko zerrenda egitea, zabarkeriagatik egiten denean.
- z) Justifikaziorik gabe probetan, partidetan edo lehiaketetan ez agertzea eta lehiaketa, proba edo partida uztea, bereziki larria ez denean.
- aa) Justifikaziorik gabe probetan, partidetan edo lehiaketetan berandu agertzea, haiek egitea eragozten ez denean.
- bb) Partiden antolaketaren berezko betebeharrak eta joko-eremuen baldintzei, baliabide teknikoei, jantziei eta erregelamenduz ezarritako gainerako baldintzei buruzko xedapenak ez betetzea, arau-hauste arina edo oso astuna ez denean.
- cc) Hirugarrenei kirol-emaizta positiboak lortzeko pizgarriak agintzea edo ematea.
- dd) Arbitroaren ordainsariak ez ordaintzea.
- ee) Era osatugabea edo oker betetako arbitroaren aktak zabarkeriaz idaztea.
- ff) Partidetako ordezkariaren betebeharren ez-betetze larria.
- gg) Lizentzien bikoiztasuna, berariaz debekatuta dagoenean.



hh) Kantxen, pisten edo zelaien baldintzak asmo gaiztoarekin aldatzea edota ezinbesteko arrazoiengatik edo ezinbesteko kasuetan leku horietan agertutako hutsuneak nahita edo zabarkeriagatik ez zuzentzea, proba edo partida etetea dakarrenean.

ii) Kirol-ekipamenduan erregelamenduz debekatuta dauden mezuak txertatzea.

jj) Ikusleak probokatzeko ekintzak egitea, oso larriak ez direnean.

kk) Dagokion Gobernantza Onaren Kodean ezarritako betebeharrak ez betetzea.

ll) Kautelazko neurriak ez betetzea, arau-hauste oso astuna ez denean.

mm) Joko-arauen, lehiaketa-arauen edo kirol-arau orokorren edozein ez-betetze, arau-hauste oso astuntzat edo arintzat hartu ezin denean.

nn) Kirol-federazioen estatutuetan edo erregelamenduetan izaera horrekin ezartzen direnak.

122. artikulua.- Arau-hauste arinak.

Edozein kasutan, arau-hauste arintzat hartuko dira honako hauek:

a) Aurreko artikuluan deskribatutako jokabideak, betiere erabilitako baliabideak, emaitzak, asmoa eta beste antzeko zirkunstantzia oro kontuan hartuta astuntasun txikiagoa badute.

b) Epaleei, teknikariei, kirol-agintariei, kirolariei edo ikusleei gauzak esatea edo keinuak egitea, portaera txarra edo begirunerik eza adierazten dutenean.

c) Funtzioak betetzeko garaian epaileengandik eta gainerako kirol-agintariengandik jasotako aginduak eta instrukzioak betetzean jarrera pasiboa hartzea.

d) Hauteskunde edo diziplinako organoetako kideek ez jardutea edo beren funtzioak bertan behera uztea, ez-betetze arina denean.

e) Joko-eremuen baldintzei, baliabide teknikoei, jantziei eta erregelamenduz ezarritako gainerako baldintzei buruzko xedapenak ez betetzea, arau-hauste astuna ez denean.

f) Probak edo partidak egitean ekipamenduak arautzen dituzten xedapenak ez betetzea.

g) Probak edo partidak egiteko ordu eta egun ofizialak eta lekuak kirol-erakunde eskudunaren baimenik gabe aldatzea.

h) Joko-arauen, lehiaketa-arauen edo kirol-arau orokorren edozein ez-betetze, arau-hauste astuntzat edo oso astuntzat hartu ezin denean.

i) Kirol-federazioen estatutuetan edo erregelamenduetan izaera horrekin ezartzen direnak.

123. artikulua.- Zehapenak.



1.- Arau-hauste oso astunak egiteagatik, honako zehapen hauek aplikatu ahal izango dira:

- a) Lizentzia urtebetetik bost urtera bitarteko aldi batean etetea.
- b) Lizentzia behin betiko kentzea.
- c) 6.001-100.000 euroko isuna.
- d) Kirol-instalazioa gutxienez hiru partidarako eta gehienez bi denboraldirako ixtea.
- e) Karguak eta funtzioak betetzeko gaitasuna urtebetetik bost urtera bitarteko aldi batean galtzea.
- f) Kategoriaz jaistea.
- g) Jokotik, probatik edo lehiaketatik behin betiko kanporatzea.
- h) Jokotik, probatik edo lehiaketatik aldi baterako kanporatzea.
- i) Probak edo lehiaketak egiten direnean kirol-instalazioetarako sarrera urtebetetik bost urtera bitarteko aldi batean debekatzea.
- j) Jokoak, probak edo lehiaketak ateak itxita egitea.
- k) Puntuak, partidak edo postuak galtzea (jardunaldi edo proba baten baino gehiagoren baliokideak).

2.- Arau-hauste astunak egiteagatik, honako zehapen hauek aplikatu ahal izango dira:

- a) Lizentzia hilabetetik urtebetera bitarteko aldi batean etetea.
- b) 601-6.000 euroko isuna.
- c) Kirol-instalazioa gehienez ere bi partidarako ixtea.
- d) Karguak eta funtzioak betetzeko gaitasuna urtebetera bitarteko aldi batean galtzea.
- e) Jokotik, probatik edo lehiaketatik behin betiko kanporatzea.
- f) Jokotik, probatik edo lehiaketatik aldi baterako kanporatzea.
- g) Probak edo lehiaketak egiten direnean kirol-instalazioetarako sarrera urtebetera bitarteko aldi batean debekatzea.
- h) Jokoak, probak edo lehiaketak ateak itxita egitea.
- i) Puntuak, partidak edo postuak galtzea (jardunaldi edo proba baten baliokideak).
- j) Kargu-hartze pribatua.
- k) Kargu-hartze publikoa.

3.- Arau-hauste arinak egiteagatik, honako zehapen hauek aplikatu ahal izango dira:

- a) Lizentzia hilabetera bitarteko epe batean etetea.
- b) 600 eurora bitarteko isuna.
- c) Jokotik, probatik edo lehiaketatik behin betiko kanporatzea.
- d) Jokotik, probatik edo lehiaketatik aldi baterako kanporatzea.
- e) Kargu-hartze pribatua.
- f) Kargu-hartze publikoa.



4.- Beren jardueragatik ordainsariak jasotzen dituzten pertsona fisikoei baino ezin izango zaie isun ekonomikoko zehapena jarri.

5.- Bidezko diziplina-espedientearen bitartez ezarritako zehapenak berehala bete beharrekoak izango dira; nolana ere, bidezko errekursoak ebatzi behar dituzten federazio-organismoek, administrazio-organismoek edo jurisdikzio-organismoek kautelaz eteteko dituzten ahalmenak erabili ahal izango dituzte.

6.- Lege hau garatzen duten erregelamenduzko xedapenek mailakatzeak sartu ahal izango dituzte Lege honetan ezarrita dauden zehapenen koadroan. Mailakatze horiek ez dute zehapen berririk sortuko, eta bidezko zehapenak era zehatzagoan finkatzen lagunduko dute.

7.- Adingabeen kasuan, eta zehapenaren hezkuntza-helburua kontuan hartuta, zehapenen ordeko neurriak ezarri ahal izango dira, adina eta zirkunstantzia pertsonalak kontuan hartuta.

124. artikulua.- Erantzuleak.

1.- Pertsona fisikoek edo juridikoek Lege honetan aurreikusitako arau-hausteak egiteagatik duten erantzukizuna dolo edo erruz ezarri ahal izango da. Erantzukizun hori dagoela ulertuko da, aurkakoa egiaztatzen denean izan ezik.

2.- Saiakuntza zein burutzea zehatuko da.

3.- Diziplinazko arau-hauste bat egitera eragiteak diziplina-erantzukizuna ekar dezake.

125. artikulua.- Erantzukizuna aldatzen duten zirkunstantziak.

1.- Diziplina-erantzukizuna aldatzen duten zirkunstantziak aringarriak eta astungarriak izan daitezke.

2.- Zirkunstantzia aringarriak honako hauek dira:

- a) Arau-haustea egin aurretik probokazio nahikoa gertatu izana.
- b) Berez damutu izana.
- c) Errudunak arau-haustearen ondorioak onbideratu edo arindu, biktimak eskatutakoari erantzun edo gertakariak borondatez aitortu izana.

3.- Zirkunstantzia astungarriak honako hauek dira:

- a) Arau-haustea behin eta berriz egitea, berrerortzea izan gabe.
- b) Berrerortzea, arau-hausleari azken urtean izaera bereko arau-hauste batengatik zehapen bat ezarri zaionean.



- c) Lortutako prezioa edo legez kontrako onura.
- d) Aldez aurretik ohartarazi izana.
- e) Arau-haustea arrazakeriatik edota biktimaren ideologiari, erlijioari edo sinesmenei, etniari, arrazari, nazioari, sexuari, sexu-orientazioari, sexu-identitateari, genero-arrazoiei, gaixotasunari edo desgaitasunari lotutako beste diskriminazio mota batengatik egitea.

4.- Kirol-arloko diziplina-ahala baliatzean, diziplina-organoek bidezkoz hartzen duten mailan ezarri ahal izango dute zehapena, honako irizpide hauek kontuan hartuta:

- a) Gertakarien izaera.
- b) Erantzulearen nortasuna.
- c) Arau-haustearen ondorioak edo eragindako kalteen izaera.
- d) Erruduntasun-maila edo intenzionalitatea.
- e) Zehatutako pertsona fisiko edo juridikoaren jardueraren bolumen ekonomikoa.
- f) Arau-haustean esku hartu duten pertsonen kopuru handiagoa edo txikiagoa.
- g) Ekintzak edo ez-egiteak berriz egitea edo egiten jarraitzea.
- h) Arau-haustea diziplina-organoekin agertutako lankidetzaren maila.
- i) Zirkunstantzia astungarriak edo aringarriak agertzea.

5.- Nolanahi ere, zirkunstantzia astungarria izango da arau-haustea arrazakeriatik edota biktimaren ideologiari, erlijioari edo sinesmenei, etniari, arrazari, nazioari, sexuari, sexu-orientazioari, sexu-identitateari, genero-arrazoiei, gaixotasunari edo desgaitasunari lotutako beste diskriminazio mota batengatik egitea.

126. artikulua.- Erantzukizuna azkentzeko arrazoiak.

1.- Kirol-arloko diziplina-erantzukizuna honako arrazoi hauengatik azkenduko da:

- a) Zehapena betetzeagatik.
- b) Arau-haustearen preskripzioagatik.
- c) Zehapenaren preskripzioagatik.
- d) Erruztatutako edo zehatutako pertsonaren heriotzagatik.
- e) Erruztatutako edo zehatutako kirol-erakundea azkentzeagatik.
- f) Zehapena barkatzeagatik.

2.- Pertsona federatuaren izaera galtzea (baita, zenbait kasutan, ezarritako zehapenen eraginkortasunean eragina izan badezake ere) ez da izango diziplina-erantzukizuna azkentzeko arrazoa.

127. artikulua.- Arau-hausteen eta zehapenen preskripzioa.



1.- Arau-hausteeek hiru urteko, urtebeteko edo hilabeteko epean preskribatuko dute, arau-hauste oso astunak, astunak edo arinak diren kontuan hartuta, eta preskripzio-epea arau-haustea egiten den egunetik aurrera hasiko da zenbatzen. Jarduera jarraitu baten ondoriozko arau-hausteetan, zenbatzen hasteko eguna jarduera amaitzen den eguna edo arau-haustea burutzen duen azken ekintzaren eguna izango da.

2.- Preskripzio-epea diziiplina-prozedura hasiko dela jakinarazten denean etengo da. Prozedura hori hilabetetik gorako epe batean geldi badago eta arrazoia prozedura horri lotutako pertsona edo erakunde erantzuleari egotzi ezin bazaio, epeak aurrera egingo du berriz.

3.- Zehapenek hiru urteko, urtebeteko edo hilabeteko epean preskribatuko dute, arau-hauste oso astunak, astunak edo arinak diren kontuan hartuta, eta preskripzio-epea zehapena ezarri zuen ebazpenak irmotasuna hartu eta hurrengo egunetik aurrera edota betetze hori (hasi bada) urratzen denetik aurrera hasiko da zenbatzen.

128. artikulua.- Zehapenen publizitatea.

1. Kirol-erakundeek diziiplina-zehapenak ezartzen dituzten ebazpenak argitaratu ahal izango dituzte dagokion webgunean.

2. Argitalpenak honako muga hauek errespetatu beharko ditu:

- a) Publizitatea zehapenetara mugatuko da betearazleak direnean.
- b) Argitalpenak arau-hauslearen identifikazioa, ekipamendua, urratutako agindua eta ezarritako zehapena jasoko ditu.
- c) Argitalpenak ezin izango du jarraitu zehapenaren iraupena amaitu ondoren.
- d) Ez du barnean hartuko hamalau urtetik beherakoak eraginpean hartzen dituen zehapenik, lehiaketaren izaera kontuan hartuta argitaratzearen bidez kotasuna baloratzen denean izan ezik.
- e) Informazio hori lehiaketan parte hartzen duten pertsonak baino ez dute eskuratuko.
- f) Argitaratutako informazioa bilaketa-motorren bidez hartu edo indexatu ezin izateko neurri teknikoak hartu beharko dira.
- g) Nolanahi ere, dagokion webgunean ohartarazi beharko da argitaratutako informazioa ezin izango dela geroago kirol-arloko diziiplina-helburuez bestelako helburuekin tratatu.

129. artikulua.- Diziiplina-erantzukizunak eta erantzukizun penalak aldi berean agertzea.

1.- Kirol-arloko diziiplina-organoek, ofizioz edo interesdunak eskatuta, delitu izan daitezkeen gertakarien berri eman beharko diote Fiskaltzari. Kasu horretan,



kirol-arloko diziplina-organoek, zirkunstantziak kontuan hartuta, prozedura dagokion ebazpen judiziala eman arte etetea erabakiko dute.

2.- Diziplina-organoak, halaber, diziplina-prozeduraren izapidetzea etengo du, zirkunstantziak kontuan hartuta, gertakari horiek berak auzibidean daudela jakiten duenean, geroago, bidezkoa bada, izapidetzeari berriz ekiteko aukera galarazi gabe.

3.- Bi kasuetan, kirol-arloko diziplina-prozedura etetea erabakitzen denean, kirol-arloko diziplina-organoek ere beharrezkoak diren kautelazko neurriak hartu ahal izango dituzte.

130. artikulua.- Diziplina-erantzukizunak eta administrazio-erantzukizunak aldi berean agertzea.

1.- Gertakari berak Lege honen XIV. Tituluan araututako administrazio-erantzukizunez gain diziplina-erantzukizunak sortzen baditu, kirol-arloko diziplina-organoek, ofizioz edo alde batek eskatuta, administrazio-organo eskudunari jakinarazi beharko diote, diziplina-prozeduraren izapidetzea galarazi gabe.

2.- Kirol-arloko diziplina-organoek administrazio-erantzukizuna baino sortzen ez duten gertakarien berri dutenean, aurrekariak administrazio-organo eskudunei helaraziko dizkiete.

3.- Gertakari berak oinarri juridikoaren identitaterik ez dagoenean baino ez ditu jaso ahal izango administrazio-zehapena eta diziplina-zehapena.

XIV. TITULUA

KIROL-IKUSKAPENA ETA ZEHAPEN-ARAUBIDEA

I. KAPITULUA

KIROL-IKUSKAPENA

131. artikulua.- Funtzioak.

Kirol-arloan eskumena duen Autonomia Erkidegoko Administrazio Orokorreko Sailak kirol-ikuskapeneko funtzioak beteko ditu, eta kirol-arloko legezko eta erregelamenduzko xedapenak betetzen direla kontrolatuko du. Eskumen hori gorabehera, foru-aldundiek eta udalerriek kirol-ikuskapenaren arloko eskumena dute beren esparruetan.

**132. artikulua.- Ikuskatzeko eskumena.**

Kirol-instalazioen eta kirol-jardueren kirol-ikuskapena lizentziak edo baimenak emateko eskumena duen administrazioak egingo du funtsean.

133. artikulua.- Gaitutako pertsonak.

Funtzio horiek, nolana ere, kasu bakoitzean beharrezkoa den espezializazio teknikoa duten eta kirol-arloan eskumena duen Autonomia Erkidegoko Administrazio Orokorreko Sailak, lurralde historikoetako foru-organismoak edo udalerriek ikuskatzeko gaitzen dituzten pertsonak beteko dituzte.

134. artikulua.- Ahalmenak.

1.- Beren funtzioak betetzean, ikuskatzaileak, behar bezala akreditatuta, agintaritzako agenteak izango dira, eta indarrean dagoen araudiak agintaritzako agenteei ematen dizkien babesa eta ahalmenak izango dituzte.

2.- Beren funtzioak hobeto betetzeko beharrezkotzat hartzen dutenean, ikuskatzaileek beste erakunde batzuen mendeko pertsonen eta zerbitzuen laguntza jaso ahal izango dute.

135. artikulua.- Kirol-ikuskaritzarekiko betebeharrak.

Kirol-zentroetako langile titularrek eta kirolaren esparruan zerbitzuak ematen dituen edozein pertsonak eta erakunde baimena eman beharko diete ikuskatzaileei beren lokaletan sartzeko eta dokumentuak eta ondasunak kontrolatu eta aztertzeko, eta ikuskapenean beharrezkoa den laguntza eskaini beharko dute.

136. artikulua.- Aholkularitza eta laguntza teknikoa.

Kirol-ikuskatzaileak, halaber, kirol-zentroak irekitzeko edo funtzionatzeko baldintzei eta Lege honetan araututako arlo guztiei buruzko aholkularitza hartuko du bere gain, Legea behar bezala betetzen dela bermatzeko.

II. KAPITULUA**ZEHAPEN-ARAUBIDEA****137. artikulua.- Aplikazio-esparrua.**



Kapitulu honetako xedapenak Autonomia Erkidegoaren esparruan gertatzen diren ekintzetan edo ez-egiteetan aplikatuko dira, kirol-lehiaketaren edo jardueraren izaera edo mota edozein izanik ere.

138. artikulua.- Arau-hauste administratiboak eta erantzuleak.

1.- Kapitulu honetan tipifikatutako ekintzak edo ez-egiteak izango dira kirol-arloko arau-hauste administratiboak, eta arau-hauste horiek doloz edo erruz egiten dituzten pertsona fisikoak eta juridikoak izango dira erantzuleak.

2.- Kirol-arloko arau-hauste administratiboak oso astunak, astunak eta arinak izan daitezke.

3.- Lege hau garatzen duten erregelamenduzko xedapenek, halaber, zehaztapenak edo mailakatzeak sartu ahal izango dituzte Lege honetan ezarrita dauden arau-hausteen koadroan. Zehaztapen eta mailakatze horiek ez dute arau-hauste berririk sortuko, ez dituzte aldatuko Legean jasotzen diren arau-hausteen izaera edo mugak, eta jokabideak hobeto identifikatzen lagunduko dute.

4.- Arau-hauste bat egitearen ondoriozko administrazio-erantzukizunak bateragarriak izango dira pertsona edo erakunde arau-hausleari aldatu duen egoera jatorrian zegoen moduan uzteko egin beharreko eskaerarekin eta eragindako kalte-galeren ordainarekin (kalte-ordain hori zehatzeko ahala baliatu behar duen organoak finkatu eta eskatuko du). Kalte-ordaina horretarako eta zenbatekoaren arabera finkatzen den epean ordaintzen ez bada, Administrazio Publikoen Administrazio Prozedura Erkidearen urriaren 1eko 39/2015 Legearen 101. artikuluan aurreikusitako moduan jardungo da.

139. artikulua.- Arau-hauste oso astunak.

Honako hauek hartuko dira arau-hauste oso astuntzat:

a) Jaiotza, arraza, sexu, orientazio sozial, genero-identitate, erlijio eta iritziagatik edo beste edozein ezaugarri edo zirkunstantzia pertsonal edo sozialengatik jazarpena edo diskriminazioa dakarten, jarduera fisikoetan eta kirol-jardueretan aritzeko eta parte hartzeko aukera eragozten edo larriki zailtzen duten edota kirol-instalazioak erabiltzeko aukera eragozten edo larriki zailtzen duten portaerak.

b) Jarduera fisikoari eta kirolari lotutako jarduerak eta zerbitzuak pertsonen osasuna eta segurtasuna larriki kaltetzeko baldintzetan egitea.

c) Kirol-instalazioetan edo haietarako sarbideetan desordena publikoetan parte hartzea, pertsonen edo ondasunen arrisku larriak eragin diezazkienean.



d) Jarduera fisikoaren eta kirolaren esparruan indarkeria, arrazakeria, xenofobia eta intolerantziako ekintzak eta emakumeen duintasunaren aurkako ekintzak antolatu, bultzatu, erraztu, estali, defendatu edo sustatzea eta haietan parte hartzea.

e) Aurreko letran deskribatutako emaitza duten kantikak abestea.

f) Kirol-instalazioetan indarkeria, arrazakeria, xenofobia eta intolerantziako portaerak bultzatzen edo sustatzen dituzten edota emakumeen duintasunaren aurkako portaerak bultzatzen edo sustatzen dituzten pankartak, sinboloak, ikurrak edo legendak erakustea.

g) Aurreko letran adierazitako ekintzak saihesteko arauak, instrukzioak edo neurriak borondatez eta ezagueraz ez betetzea.

h) Jarduera fisikoen eta kirol-jardueren antolaketaren eta kirol-instalazioen arloko segurtasun- eta higiene-arauak ez betetzea, pertsonentzat edo ondasunetarako arrisku larria dakarrenean.

i) Osasun-arloko profesionalak edo baliabideak egoteko betebeharra ez betetzea.

j) Kirol-lehiaketak egiten diren instalazioetan edozein arma mota, parte-hartzaileei edo ikusleei arrisku larria eragin diezaiekeen edozein objektu mota, bengalak, petardoak edo adierazitako arriskua dakarren beste edozein elementu sartzea, eramatea edo erabiltzea.

k) Kirol-federazio baten aitorten ofiziala errebokatu ondoren federazio hori desegiteari lotutako betebeharrak ez betetzea.

l) Jarduera fisikoan eta kirolean indarkeriara, arrazakeriara, xenofobiara edo intolerantziara larriki bultzatzen duten adierazpenak eta ekintzak, eta emakumeen duintasunaren aurkakoak.

m) Epailak, kirolariak, teknikariak, kirol-agintariak eta kirol-ekitaldietan esku hartzen duten beste pertsona batzuk lardieratzea, hertsatzea edo haiei erasotzea.

n) Sexu-jazarpena, sexuan oinarritutakoa edo sexu-identitatean oinarritutakoa.

o) Aurreko letretan adierazi ez diren eta bereziki larriak diren kirol-esparruko indarkeria, arrazakeria, xenofobia eta intolerantziako ekintzak eta emakumeen duintasunaren aurkako ekintzak.

p) Partida, proba edo lehiaketa bat egitea eragozten duten edo aldi baterako edo behin betiko etetera behartzen duten protesta edo jarduketa kolektiboak edo kirol-legearen kontrako portaera oro.

q) Proben edo lehiaketen emaitzaren iruzurrezko aldaketak, proba edo lehiaketa horiek egin aurretik akordio, larderia, prezio edo iruzurrezko beste edozein baliabideren bidez emaitzan eragitera bideratuta dauden edo helburu hori duten jokabideak barnean hartuta.

r) Kirol-materiala edo kirol-ekipamendua arau teknikoen aurka manipulatzeko edo aldatzeko parte hartzea, xedea partiden, proben edo lehiaketen emaitzak aurrez ezartzea denean.

s) Justifikatutako arrazoirik gabe kirol-lizentziak ez ematea edo atzeratzea, betiere tartean asmo txarra badago.

t) Jarduera fisikoa eta kirola egiteko beharrezkoa den duintasunaren edo lotsaren aurkako ekintzak egitea, bereziki larriak direnean.



- u) Kirol-epaileek kirol-lehiaketetan parte hartzen duten pertsona edo talde batzuen alde nahita agertutako alderdikeria.
- v) Administrazio publikoek Lege hau edo garatzen duten xedapenak betetzeko egindako errekerimenduen ez-betetze errepikatuak edo larriak.
- w) Ikuskapen-funtzioa betetzea eragozten duen oztopatzea edo erresistentzia.
- x) Administrazio publikoek kirol-arloan bete beharreko ikuskapen-funtzioaren oztopatze edo erresistentzia errepikatua edo larria.
- y) Lege honetan edo garatzen duten xedapenetan ezarritako arriskuen aseguramendurik eza.
- z) Lanbide-betebeharrak ez betetzea, horren ondorioz pertsonen osasun edo integritate fisiko edo psikikorako kalte larria eragiten denean.
- aa) Falta astunak behin eta berriz egitea.
- bb) Arau-hauste astunengatik edo oso astunengatik ezarritako zehapenak urratzea.
- cc) Kautelazko neurrien ez-betetze larria.

140. artikulua.- Arau-hauste astunak.

Honako hauek hartuko dira arau-hauste astuntzat:

- a) Kirol-instalazioetan, kirol-altzarietan edo kirol-ekipamenduetan kalteak doloz egitea, arau-hauste penala ez denean.
- b) Aurreko artikuluan deskribatutako jokabideak agertzea, arrisku larriaren edo kalte garrantzitsuaren zirkunstantziarik ez dagoenean.
- c) Ardurarik eza jarduera fisikoaren eta kirolaren esparruan indarkeria, arrazakeria, xenofobia edo intolerantziako ekintzak eta emakumeen duintasunaren aurkako ekintzak galarazteko betebeharrak betetzeko garaian.
- d) Pasibotasuna aurreko letran adierazitako ekintzen prebentzioan eta errepresioan.
- e) Jarduera fisikoa eta kirola egiteko beharrezkoa den duintasunaren edo lotsaren aurkako ekintzak egitea, bereziki larriak ez direnean.
- f) Epaileak, teknikariak, kirol-agintariak, kirolariak edo kirol-jardueretan esku hartzen duen beste edozein pertsona iraintzea eta laidoztatzea, eta pertsona horiekin indarkeria arinez jokatzeko.
- g) Zelaira, kantxara edo proba egiten den lekura objektuak jaurtitzea, arau-hauste oso astuna ez denean.
- h) Ikusleak probokatzeko ekintzak egitea.
- i) Ardurarik eza Lege honetan aurreikusitako Gobernantza Onaren Kodea onartzeko betebeharra betetzean.
- j) Segurtasunari eta arriskuen estaldurari buruzko arauak betetzen ez dituzten kirol-jarduerak antolatzea, jarduera egiteak hirugarrenentzat arriskurik ez dakarrenean.



- k) Lege honetan atxikipenari, nahitaezko luzapenari, prestakuntzari eta antzeko alderdiei lotutako eskubideen arloan jasotako debekua ez betetzea.
- l) Hirugarrenei kirol-emaitza positiboak lortzeko pizgarriak agintzea edo ematea.
- m) Epailleek kirol-lehiaketak egitean emandako aginduak behin eta berriz ez betetzea.
- n) Ikuskapen-funtzioa betetzea eragozten duen oztopatzea edo erresistentzia.
- o) Administrazio publikoek kirol-arloan bete beharreko ikuskapen-funtzioaren oztopatzea edo erresistentzia, arau-hauste oso astuna ez denean.
- p) Lege honetan lizentzia federatuak, eskola-lizentziak edo unibertsitate-lizentziak izapidetzearen eta ematearen arloan ezarritako betebeharrak edo baldintzak ez betetzea.
- q) Arriskuen aseguramenduan erregelamenduz ezarritako gutxieneko edukiak ez betetzea.
- r) Lege honetan landutako arloetan edozein baliabideren bidez iruzur egiten duen edo nahastera bultza dezakeen publizitate oro.
- s) Lege honetan bildutako kirolarien eskubideen gutxiespen oro, arau-hauste oso astuna ez denean.
- t) Kirol-federazioen berezko izenak erabiltzea edo jarduerak egitea.
- u) Kirol-arloan eskumena duten administrazioen irudi korporatiboa behar ez bezala erabiltzea, kirol-jardueren izaera ofiziala simulatzeko helburuarekin.
- v) Autonomia Erkidegoko Administrazio Orokorrak eta lurralde historikoetako foru-organismoek baimendu gabeko eskola-arloko kirol-jarduerak antolatzea edo haietan parte hartzea.
- w) Ofizial gisa izendatutako kirol-arloko jarduerak, probak edo lehiaketak bidezko kirol-baimenik gabe antolatzea.
- x) Arau-hauste arinak behin eta berriz egitea.
- y) Arau-hauste arin batengatik ezarritako zehapenak urratzea.
- z) Kautelazko neurriak ez betetzea, arau-hauste oso astuna ez denean.
- aa) Lege honetan ezarritako gardentasun-betebeharren ez-betetze larria.
- bb) Lege honetan edo haren erregelamenduzko garapenean ezarrita dagoen eta arau-hauste oso astuntzat edo arintzat hartu ezin den beste edozein betebehar ez betetzea.

141. artikulua.- Arau-hauste arinak.

Honako hauek izango dira arau-hauste arinak:



- a) Aurreko artikuluan deskribatutako jokabideak, betiere erabilitako baliabideak, emaitzak, asmoa eta beste antzeko zirkunstantzia oro kontuan hartuta astuntasun txikiagoa badute.
- b) Ikusleenganako, kirolarienganako eta kirol-instalazioen erabiltzaileenganako errespeturik eza, ordena publikoaren nahasmendurik ez dakarrenean.
- c) Arretarik eza edo utzikeria kirol-instalazioak, kirol-altzariak edo kirol-ekipamenduak kontserbatu eta zaintzean.
- d) Lege honetan ezarritako gardentasun-betebeharren ez-betetze arina.
- e) Epaillekiko, teknikariekiko, kirol-agintariekiko, kirolariekiko edo kirol-jardueretan esku hartzen duen beste edozein pertsonarekiko begirunerik eza erakusten duten ekintzak edo adierazpenak egitea.
- f) Kirol-lehiaketak egitean epaileen aurkako protestak behin eta berriz egitea.
- g) Arbitroaren instrukzio edo erabakiak betetzean jarrera pasiboa hartzea.
- h) Ikuskapen-lanean ez laguntzea, betiere arau-hauste astun edo oso astun gisa tipifikatu ez bada.
- i) Jarduera fisikoaren eta kirolaren esparruan lanbide-betebeharrak ez betetzea, horren ondorioz pertsonen osasun edo integritate fisiko edo psikikorako kalterik eragiten ez denean.
- j) Euskal Autonomia Erkidegoko Kirol Erakundeen Erregistroari lotutako betebeharrak ez betetzea.
- k) Lege honetan edo haren erregelamenduzko garapenean ezarrita dagoen eta arau-hauste astuntzat edo oso astuntzat hartu ezin den beste edozein betebehar ez betetzea.

142. artikulua.- Ondorioak.

Arau-hauste administratibo orok honako ondorio hauek izango ditu:

- a) Zehapenak ezartzea, beste edozein motatako erantzukizunak galarazi gabe.
- b) Eragindako kalte-galerak ordaintzeko betebeharra.
- c) Urratutako ordena juridikoa berrezartzeko beharrezkoak diren neurri guztiak hartzea eta arau-haustea eragindako ondorioak deuseztatzea.

143. artikulua.- Zehapenak.

1.- Aurreko artikuluetan deskribatutako arau-haustea egiteak honako zehapen hauek eragin ahal izango ditu:

- a) Isun ekonomikoa.



- b) Jarduera etetea.
- c) Administrazio-baimena errebokatzea.
- d) Kirol-instalazioak ixtea.
- e) Dirulaguntzak edo laguntza publikoak lortzeko eskubidea galtzea.
- f) Kirol-instalazioetan sartzeko debekua.
- g) Kirol-jarduerak antolatzeko gaitasuna galtzea.

2.- Arau-hauste arinek 1.000 eurora bitarteko isuna jaso ahal izango dute, astunek 1.001 eurotik 10.000ra bitarteko isuna, eta oso astunek 10.000-100.000 euroko isuna.

3.- b), d), e), f) eta g) letretan adierazitako zehapen osagarriak gehienez ere lau urterako ezarri ahal izango dira arau-hauste oso astunengatik.

4.- b), d), e), f) eta g) letretan adierazitako zehapen osagarriak gehienez ere bi urterako ezarri ahal izango dira arau-hauste astunengatik.

5.- Zehapenen eta erantzukizunen zenbatekoak premiamendu administratibo bidez eskatu ahal izango dira.

6.- Adingabeen kasuan, eta zehapenaren hezkuntza-helburua kontuan hartuta, zehapenen ordeko neurriak ezarri ahal izango dira, adina eta zirkunstantzia pertsonalak kontuan hartuta.

144. artikulua.- Erantzukizuna aldatzen duten zirkunstantziak.

1.- Administrazio-erantzukizuna aldatzen duten zirkunstantziak aringarriak eta astungarriak izan daitezke.

2.- Zirkunstantzia aringarriak honako hauek dira:

- a) Arau-haustea egin aurretik probokazio nahikoa gertatu izana.
- b) Berez damutu izana.
- c) Errudunak arau-haustearen ondorioak onbideratu edo arindu, biktimak eskatutakoari erantzun edo gertakariak borondatez aitortu izana.

3.- Zirkunstantzia astungarriak honako hauek dira:

- a) Arau-haustea behin eta berriz egitea, berrerortzea izan gabe.
- b) Berrerortzea, arau-hausleari azken urtean izaera bereko arau-hauste batengatik zehapen bat ezarri zaionean.
- c) Lortutako prezioa edo legez kontrako onura.
- d) Aldez aurretik ohartarazi izana.
- e) Arau-haustea arrazakeriatik edota biktimaren ideologiari, erlijioari edo sinesmenei, etniari, arrazari, nazioari, sexuari, sexu-



orientazioari, sexu-identitateari, genero-arrazoiei, gaixotasunari edo desgaitasunari lotutako beste diskriminazio mota batengatik egitea.

4.- Gainera, zehapenak ezartzean, honako zirkunstantzia hauek hartuko dira kontuan:

- a) Gertakarien izaera.
- b) Erantzulearen nortasuna.
- c) Arau-haustearen ondorioak edo eragindako kalteen izaera.
- d) Erruduntasun-maila edo intenzionalitatea.
- e) Zehatutako pertsona fisiko edo juridikoaren jardueraren bolumen ekonomikoa.
- f) Arau-haustean esku hartu duten pertsonen kopuru handiagoa edo txikiagoa.
- g) Ekintzak edo ez-egiteak berriz egitea edo egiten jarraitzea.
- h) Arau-hausleak diziplina-organoekin agertutako lankidetzeta-maila.

145. artikulua.- Zehapenen bateragarritasuna.

1.- Ezein kasutan ez da zehapen bikoitzik ezarriko gertakari berengatik eta babestutako interes beren arabera.

2.- Titulu honetan aurreikusitako arau-hausteen ondoriozko zehapenak ezartzeak ez du eragotziko, hala badagokio eta oinarri desberdina kontuan hartuta, kirol-arloko diziplina-erantzukizunei aurre egin beharra.

146. artikulua.- Preskripzioa.

1.- Arau-hauste oso astunek hiru urtean preskribatuko dute, astunek urtebetean eta arinek sei hilabetean, eta preskripzio-epea arau-haustea egiten den egunetik aurrera hasiko da zenbatzen. Jarduera jarraitu baten ondoriozko arau-hausteetan, zenbatzen hasteko eguna jarduera amaitzen den eguna edo arau-haustea burutzen duen azken ekintzaren eguna izango da.

2.- Preskripzio-epea zehapen-prozedura hasiko dela jakinarazten denean etengo da. Prozedura hori hilabetetik gorako epe batean gelditu badago eta arrazoia prozedura horri lotutako pertsonari edo erakundeari egotzi ezin bazaio, epeak aurrera egingo du berriz.

3.- Arau-hauste oso astunen ondoriozko zehapenak hiru urtean preskribatuko dute, astunen ondoriozkoek urtebetean eta arinen ondoriozkoek sei hilabetean.

147. artikulua.- Behin-behineko neurriak.



1.- Zehapen-espedientea hasteko eskumena duten organoek emango den ebazpenaren eraginkortasuna ziurtatzeko eta ondasunen eta pertsonen segurtasuna bermatzeko behin-behineko neurri egokiak erabaki ahal izango dituzte behar bezala arrazoituta.

2.- Neurri horiek ez dute zehapen-izaerarik izango, eta honako hauek izan daitezke:

- a) Fidantzak jartzea.
- b) Zerbitzuak, jarduerak edo baimenak aldi baterako etetea.
- c) Kirol-instalazioak ixtea.

148. artikulua.- Zehatzeko ahala.

1.- Zehatzeko ahala Autonomia Erkidegoko Administrazio Orokorrak, foru-aldundiek eta udalerriek baliatuko dute dagozkien eskumenen esparruan.

2.- Zehatzeko ahala hautsitzat hartutako araua eman duen Estatuko, Autonomia Erkidegoko, Foru Aldundiko edo udalerriko Administrazio Publikoak baliatuko du.

3.- Baimena behar duten kirol-jardueren kasu zehatzetan, administrazio publiko eskuduna dagokion baimena eman duena edo eman beharko zukeena izango da.

XV. TITULUA

KIROL-JUSTIZIA

I. KAPITULUA

GATAZKAK KONPONTZEA

149. artikulua.- Administrazio-gatazkak.

Lege honen administrazio-funtzio publikoei lotutako gatazkak Lege honetan aurreikusitako administrazio-errekurtsoen bidez eta Administrazio Publikoen Administrazio Prozedura Erkidearen urriaren 1eko 39/2015 Legean eta Administrazioarekiko Auzien Jurisdikzioa arautzen duen uztailaren 13ko 29/1998 Legean hurrenez hurren aurreikusitako administrazio-errekurtsoen eta jurisdikzio-errekurtsoen bidez ebatziko dira.

**150. artikulua.- Gatazka pribatuak.**

1.- Kirol-federazioen antolamenduari eta funtzionamenduari lotutako gatazkak pribatuak izango dira.

2.- Kirol-federazioek gatazkak auzibidetik kanpo konpontzeko sistema komun baten aplikazioa ezarri ahal izango dute beren estatutuetan, erregelamenduetan edo Batzar Nagusiaren erabakien bidez, erregelamendu bidez finkatzen diren baldintzekin. Baldintza horien artean, edukiaren publizitate-sistema bat eta agenteek sistema era askean, borondatez eta berariaz onartzen dutela adierazteko eskubidea aipa daitezke (sistemaren inposaketa baztertu egingo da). Nazioarteko sistema bat bada, hartzen diren laudoak edo erabakiak gauzatzeko modu bat ezarriko da berariaz.

II. KAPITULUA**KIROL JUSTIZIAKO EUSKAL BATZORDEA****151. artikulua.- Izaera.**

1.- Kirol Justiziako Euskal Batzordea Euskal Autonomia Erkidegoko administrazio-organo gorenaren da kirol-justiziaren arloan.

2.- Kirol Justiziako Euskal Batzordea kirol-arloa eskumena duen Autonomia Erkidegoko Administrazio Orokorreko Sailari atxikita dago organikoki, harekiko erabateko independentziarekin jardungo du, eta bere eskumeneko gaiei buruz erabakiko du azken administrazio-auzialdian.

152. artikulua.- Eskumenak.

Kirol Justiziako Euskal Batzordearen eskumenak honako hauek dira:

- a) Kirol-arloko diziplina-ahalaren titularrak diren kirol-organoen erabakien aurka jarritako errekurtsioak aztertzea eta ebaztea.
- b) Kirol-federazioen hauteskunde-batzordeen erabakien aurka jarritako errekurtsioak aztertzea eta ebaztea.
- c) Federazioek lehiaketa ofizialen kalifikazioari eta baimenari buruz hartutako erabakien aurkako errekurtsio oro aztertzea eta ebaztea.
- d) Federazio-lizentziak emateari, ukatzeari, ezerezteari, eteteari eta antzeko ekintzei lotutako errekurtsio oro aztertzea eta ebaztea.
- e) Federazioen artean beren administrazio-funtzioak betetzean sor daitezkeen gatazkak aztertzea eta ebaztea.



f) Aurreko arloen inguruan ofizioz edo kirol-arloan eskumena duen Autonomia Erkidegoko Administrazio Orokorreko Zuzendaritzak eskatuta landu nahi dituen alderdi guztiak aztertzea eta ebaztea.

153. artikulua.- Izapidetzea eta ebazpenak.

1.- Kirol Justiziako Euskal Batzordeak bideratzen dituen espedienteak izapidetu eta ebazteko prozedurak Administrazio Publikoen Administrazio Prozedura Erkidearen urriaren 1eko 39/2015 Legean xedatutakoari jarraituko dio ordezko izaeraz.

2.- Kirol Justiziako Euskal Batzordearen ebazpenek amaiera emango diote administrazio-bideari, eta administrazioarekiko auzien jurisdikzioan baino ezin izango da haien aurkako errekurtoa jarri.

3.- Kirol Justiziako Euskal Batzordearen ebazpenak, hasiera batean, kirol-ekitaldiaren titularra den erakundeak betearaziko ditu, eta erakunde hori arduratuko da behar bezala betetzeaz. Titularra ez badago, batzordeak berak betearaziko ditu ebazpenak.

154. artikulua.- Osaera.

1.- Kirol Justiziako Euskal Batzordea Zuzenbideko lizentzia edo gradua duten sei kide titularrek osatuko dute. Kide horiek kirol-arloan eskumena duen Autonomia Erkidegoko Administrazio Orokorreko Sailak izendatuko ditu. Kide titularrez gain, Sailak ordezko bi kide izendatuko ditu.

2.- Indarrean dagoen legerian aurreikusitako abstentzio- edo errekusatze-arrazoiak aplikatuko zaizkie batzordeko kideei.

3.- Kirol Justiziako Euskal Batzordeko kideek lehendakari bat eta lehendakariorde bat aukeratu beharko dituzte beren artean. Batzordeko idazkaria kirol-arloan eskumena duen Autonomia Erkidegoko Administrazio Orokorreko Sailak izendatuko du bere funtzionarioen artean.

4.- Batzordeko kideen karguek ez dute ordainsaririk jasoko, eta jarduera dela eta bidezkoak diren dietak jasotzeko eskubidea baino ez dute sortuko.

5.- Nolanahi ere, osaerak martxoaren 22ko 3/2007 Lege Organikoaren (emakumeen eta gizonen berdintasunerako Legea) lehen xedapen gehigarrian eta otsailaren 18ko 4/2005 Legean (emakumeen eta gizonen berdintasunerako Legea) osaera orekatuari buruz ezarritako irizpideari jarraituko dio.

**155. artikulua.- Erregelamendu bidezko garapena.**

Lege hau garatzen duten erregelamenduzko xedapenek zehaztuko dituzte Kirol Justiziako Euskal Batzordearen osaera eta funtzionamendua.

II. KAPITULUA**ARBITRAJEA****156. artikulua.- Estatutuen edo erregelamenduen aurreikuspenak.**

1.– Kirol-federazioen estatutuetako edo erregelamenduetako arauak kideen artean planteatzen diren desadostasunak auzibidetik kanpo ebazteko arbitraje-formulak aurreikusi eta arautu beharko dituzte, hurrenez hurren. Formula horien aplikazioa arbitrajeari buruzko legeria orokorraren zehaztasunen, baldintzen eta ondorioen arabera egiaztatuko da.

2.– Arau horietan, honako alderdi hauek jaso beharko dira:

- a) Arbitrajearen xede izan daitezkeen gaien zerrenda.
- b) Eraginpean hartutako pertsonen arbitraje-formula horiek onartzeko moduak.
- c) Arbitraje-formula horiek aplikatzeko prozedura; nolana ere, kontraesanaren eta berdintasunaren printzipioak errespetatuko dira.
- d) Desadostasunak konpontzeaz arduratutako organoak edo pertsonak eta haiek izendatzeko prozedura.
- e) Laudoak betearazteko formulak.

157. artikulua.- Borondatez eskumendean jartzea.

Zuzenbidearen arabeko edo ekitatezko arbitraje-sistemen eskumendean jartzea, nolana ere, borondatezkoa izango da, eta debekatuta geratuko da epaileak, teknikariak, kirolariak eta gainerako pertsonak edo kirol-erakundeak beren gatazkak arbitraje-formulen bidez ebaztera behartzen dituen arau edo erabaki oro.

158. artikulua.- Arbitrajearen sustapena.

Euskal Autonomia Erkidegoko botere publikoek arbitraje-funtzioak beteko dituzten erakundeen sorkuntza sustatu beharko dute, eta arbitrajearen kultura zabaltzeko beharko dute kirol-mugimenduko kideen artean, kirolaren esparruan agertzen diren gatazkak ebazteko formula egoki gisa.



XEDAPEN GEHIGARRIAK

Lehena. - Euskal federazio-sistemaren berrantolamendua.

1.- Kirol-federazioen berregituraketa 2024ko hauteskunde-prozesuaren aurretik egingo da.

2.- Eusko Jaurlaritzak egitura, gutxieneko lizentzia kopurua eta federazio-sistemari gaur egun dagoen bezala eusteko beharrezkoak diren gainerako baldintzak finkatuko ditu kirol-modalitate bakoitzean.

3.- Eusko Jaurlaritzari ahalmena emango zaio berregituraketa hori gauzatzeko beharrezkoak diren neurri ekonomiko, ondare-neurri edo beste edozein motatako neurri guztiak dagokion Dekretuaren bidez ezar ditzan.

Bigarrena. - Bertako kirol-diziplinak Euskal Autonomia Erkidegoko kultura-ondare immaterial deklaratzeko espedientea hastea.

Euskal kultura-ondarearen arloan indarrean dagoen legerian xedatutakoari jarraikiz, kulturaren arloan eskumena duen Autonomia Erkidegoko Administrazio Orokorreko Sailak azterlan bat egingo du bi urteko epean, herri-kirolen, euskal pilotaren eta arraunketaren diziplinak Euskal Autonomia Erkidegoko kultura-ondare immaterialaren babes-kategorian deklaratzeko administrazio-espediente bat hasteko aukera ebaluatze aldera.

Hirugarrena. - Jarduera Fisikoaren eta Kirolaren Euskal Kontseilua.

Lege hau indarrean jartzen denetik aurrera, indarreko araudiak Kirolaren Euskal Kontseilua aipatzen duen guztietan Jarduera Fisikoaren eta Kirolaren Euskal Kontseilua aipatzen duela ulertuko da.

Laugarrena. - Jarduera Fisikoaren eta Kirolaren Euskal Eskola.

Lege hau indarrean jartzen denetik aurrera, indarreko araudiak Kirolaren Euskal Eskola aipatzen duen guztietan Jarduera Fisikoaren eta Kirolaren Euskal Eskola aipatzen duela ulertuko da.

Bosgarrena. - Gobernantza Onaren Kodea.

1.- Gobernantza Onaren Kodea, euskal kirol-federazioek ez ezik, kirol-arloan eskumena duen Autonomia Erkidegoko Administrazio Orokorreko Sailak kudeatutako laguntzak jasotzen dituzten kirol-erakundeek eta bestelako erakundeek ere hartu beharko dute, erregelamenduz ezartzen diren zenbateko ekonomikoak gainditzen direnean.



2.- Kirol-erakunde eta bestelako erakunde horiei Lege honetan euskal kirol-federazioen Gobernantza Onaren Kodeari buruz xedatutakoa aplikatuko zaie beren jarduerarekin bateragarria den guztian.

Seigarrena. - Jarduera Fisikoaren Euskal Agentziaren jardueren hasiera eta langileen integrazioa.

1.- Jarduera Fisikoaren Euskal Agentziaren jarduerak abiarazteko eta hasteko eguna Agentziaren antolamendu- eta funtzionamendu-erregelamendua onartzen duen Dekretuan ezartzen dena izango da, eta, nolana ere, Lege hau indarrean jarri eta urtebeteko epean onartu beharko da.

2.- Jarduera Fisikoaren Euskal Agentziaren Artezkaritza Kontseiluko kideak izendatu egin beharko dira, eta, era berean, agentziako organoak jarduerak hasi aurretik eratu beharko dira.

3.- Jarduerak dagokion aurrekontuen legea indarrean jartzean hasten ez badira, Gobernu Kontseiluak agentziaren ustiapen- eta kapital-aurrekontuak eta jarduerak hasten diren ekitaldi ekonomikoari dagozkion behin-behineko egoera- orri finantzarioak onartuko ditu, eta horren berri emango dio Eusko Legebiltzarreko aurrekontu-batzordeari 15 eguneko epean. Horretarako, aurrekontuen arloan eskumena duen Euskal Autonomia Erkidegoko Administrazio Orokorreko Sailari ahalmena emango zaio aurrekontu horiek osatzeko beharrezkoak diren aurrekontu-aldaketak egiteko; nolana ere, aldaketa horiek ez dute ekarriko erakunde publikoaren jarduerak hastean indarrean dauden aurrekontu orokorretako partidetan kontsignatutako zenbateko orokorra igotzea.

4.- Euskal Autonomia Erkidegoko Administrazio Orokorrean zerbitzuak egiten dituzten eta Lege honi, erakunde publikoaren antolamendu- eta funtzionamendu-erregelamenduari eta ezartzen den araudiari jarraikiz Jarduera Fisikoaren Euskal Agentziak bere gain hartzen dituen funtzioak betetzen dituzten langile lan-kontratudunak Agentzian txertatuko dira, lan-araudian enpresaren ondorengotzarako aurreikusitako mekanismoa aplikatzearen bidez.

5.- Euskal Autonomia Erkidegoko Administrazio Orokorrean zerbitzuak egiten dituzten eta Lege honi, erakunde publikoaren antolamendu- eta funtzionamendu-erregelamenduari eta ezartzen den araudiari jarraikiz Jarduera Fisikoaren Euskal Agentziak bere gain hartzen dituen funtzioak betetzen dituzten funtzionarioak Agentzian txertatuko dira, atxikpenaren unean zuten administrazio-egoera berarekin eta aitortuta dituzten eskubide guztiak (antzinatasuna, besteak beste) gordez.

6.- Gobernu Kontseiluak, Dekretu bidez, Administrazio Orokorrek eta haren erakunde autonomoetako sailen egitura organikoak egokituko ditu, Jarduera Fisikoaren Euskal Agentziari Lege honek eta antolamendu- eta funtzionamendu-



erregelamenduak agintzen dizkioten helburuak lortzeko beharrezkoak diren funtzioak eta baliabide pertsonalak esleitzeko. Bidezkoak diren ondasunen eta baliabide materialen atxikipena ogasun-arloan eskumena duen Autonomia Erkidegoko Administrazio Orokorreko Sailak egingo du.

Zazpigarrena. - Kirol-kluben onura publikoaren deklarazioa.

1.– Lege honetan adierazitako kirol-klubek onura publikoaren deklarazioa jaso ahal izango dute Eusko Jaurlaritzak erabakita, betiere honako baldintza hauek betetzen badituzte:

- a) Euskadiren interes orokorrean laguntzea.
- b) Bazkideen kopurua mugatua ez izatea, gaitasun fisikoari eta kirol-instalazioen edukierari lotutako arrazoen kasuan izan ezik.
- c) Bazkideen kuotek erregelamenduz finkatzen diren zenbatekoak ez gainditzea.

2.– Onura publikoaren deklarazioak Lege honetan ezarritako onurak ekarriko ditu.

Zortzigarrena. - Eskola-kiroleko lankidetzeta-hitzarmenak.

Eskola-kirolaren arloan euskal eskola publikoan txertatutako zentroen, kirol-elkarteen eta gainerako erakunde publiko edo pribatuen artean egiten diren lankidetzeta-hitzarmenak zabaldu ahal izateko, adierazitako zentroetako zuzendariak baimenduta egongo dira lankidetzeta-hitzarmen horiek izenpetzeko, hezkuntza-arloan eskumena duen Autonomia Erkidegoko Administrazio Orokorreko Sailak erregelamenduz finkatzen dituen mugekin eta baldintzekin.

Bederatzigarrena. - Kirolaren esparruan sexu-jazarpenari eta sexuan oinarritutako jazarpenari aurrea hartzeko planak.

1.- Kirol-federazioek kirolaren esparruan sexu-jazarpenari eta sexuan oinarritutako jazarpenari aurrea hartzeko planak landu, onartu eta gauzatu beharko dituzte bi urteko gehieneko epean.

2.- Betebehar berdina izango dute erregelamenduz ezarritakoa baino zenbateko handiagoa duten dirulaguntza publikoak urtero jasotzen dituzten kirol-klubak.

Hamargarrena. - Ikuskapen-plan orokorra.

Lege honetan bildutako aurreikuspenak eraginkortasunez betetzen direla bermatzeko, kirol-arloan eskumena duen Autonomia Erkidegoko Administrazio Orokorreko Sailak ikuskapen-plan orokor bat onartuko du urtebeteko epean, Lege hau indarrean jartzen denetik aurrera zenbatzen hasita. Plan horrek egin



beharreko ikuskapenen helburu orokorrak, lehentasunak eta egutegia finkatuko ditu gutxienez.

Hamaikagarrena. - Udalerrietan kirol-arloko elkarte-sarea sendotzeko plana.

1.- Kirol-arloan eskumena duen Autonomia Erkidegoko Administrazio Orokorreko Zuzendaritzak lurralde historikoetako foru-organoekin eta udalerriekin koordinatuko du Euskal Autonomia Erkidegoko udalerrietako kirol-arloko elkarte-sarea sendotzeko plana landu eta gauzatzeko zeregina.

2.- Plan horren helburu nagusiak honako hauek izango dira:

a) Modalitate bakarreko kirol-klub txiki asko biltzen dituen eta gutxienerako lege-betebeharrak eta kirol-sustapeneko helburuak behar bezala betetzeko giza baliabiderik eta baliabide materialik ez duen elkarte-sare horren atomizazioaren arazoa konpontzea.

b) Udalerrietako elkarte-egitura berriz dimentsionatzea eta egitura sendo eta profesionalizatuago batzuk izango dituzten kirol anitzeko klubak sustatzea; egitura horiei esker, giza baliabideak eta baliabide materialak partekatu ahal izango dira, eta jarduera fisikoa eta kirola sustatzeko erronkei aurre egin ahal izango zaie.

Hamabigarrena. - Jarduera fisikoaren eta kirolaren industria sustatzeko plana.

1.- Kirol-arloan eskumena duen Autonomia Erkidegoko Administrazio Orokorreko Zuzendaritzak, garapen ekonomikoaren eta berrikuntzaren arloan eskumena duten zuzendaritzekin batera, jarduera fisikoaren eta kirolaren industriak sustatzeko plan bat landuko du, berrikuntza teknologikoaren esparruan bereziki.

2.- Plan horren helburu nagusiak honako hauek izango dira:

a) Kirol-industriarako kluster baten sorkuntza sustatzea, industria hori jarduera fisikoaren eta kirolaren industriako enpresa eragileen arteko lankidetzaren bideratzailea baita.

b) Jarduera fisikoaren eta kirolaren arloan espezializazio adimentsuaren enpresa-estrategiak (RIS3) sustatzea.

XEDAPEN IRAGANKORRAK

Lehena. - Kirol-federazioen estatutuak egokitzea.



Kirol-federazioek Lege honetara egokitu beharko dituzte beren estatutuak eta erregelamenduak bi urteko gehieneko epean, indarrean jartzen denetik aurrera zenbatzen hasita.

Bigarrena. - Aurreko kirol-legeria garatzeko xedapenak.

Lege honen erregelamenduzko garapenari buruzko aurreikuspenak burutu arte, indarren dauden erregelamendu-arauak aplikatzen jarraituko da.

Hirugarrena. - Diziplina- eta zehapen-espeditentak.

Lege hau indarrean jarri aurretik hasitako diziplina- eta zehapen-espeditentak aurreko funtsezko araudiari jarraikiz izapidetuko dira, Lege honen aurreikuspenak aplikatzeko aukera galarazi gabe (espeditentea jaso duenaren aldekoak direnean).

XEDAPEN INDARGABETZAILEAK

Lehena. - 14/1998 Legea, ekainaren 11koa, Euskadiko Kirolarena.

Erabat indargabetuta geratuko da ekainaren 11ko 14/1998 Legea, Euskadiko Kirolarena.

Bigarrena. - Klausula indargabetzaile orokorra.

Indargabetuta geratuko dira Lege honetan ezarritakoaren aurkakoak diren maila berdineko edo txikiagoko arau guztiak.

AZKEN XEDAPENAK

Lehena. - Zehapenen zenbatekoaren eguneratzea.

Eusko Jaurlaritzari dagokio diruzko zehapenen zenbatekoa eguneratzea, urteko kontsumoko prezioen indizeari jarraikiz.

Bigarrena. - Legearen garapena.

Eusko Jaurlaritzari ahalmena ematen zaio Lege hau garatzeko beharrezkoak diren xedapenak emateko.

Horrenbestez, Euskadiko herritar guztiei, partikularrei eta agintariei agintzen diet Lege hau betetzeko eta betearazteko.

Vitoria-Gasteiz, 2020koaren ...a.



Lehendakaria,
IÑIGO URKULLU RENTERIA.